

中國方志叢書·華南地方·第二六號

據清·鄭祖庚纂修本

影印

福建省

閩縣鄉土志



成文出版社有限公司印行



10098553

奏定鄉土志例目

奏定學堂章程所列初等小學堂學科於歷史則講鄉土之大端故事及本地古先名人之事實於地理則講鄉土之道里建置及本地先賢之祠廟遺蹟等類於格致則講鄉土之動物植物礦物凡關於日用所必需者使知其作用及名稱蓋以幼稚之知識遽求高深之理想勢必鑿枘難入惟鄉土之事爲耳所習聞目所常見雖街談巷論一山一水一木一石平時供兒童之嬉戲者一經指點皆成學問其引人入勝之法無逾此者然

必由府廳州縣各撰鄉土志然後可以授課海內甚廣
守令至多言人人殊慮或龐雜用是擬撰例目以爲程
式守令雖事繁但能徵本地讀書能文者二三人按日
考查依例編撰不過數月卽可成書事必求其詳核文
必期於簡雅俟采輯成編一面將清本郵寄京師編書
局一面錄副詳報本省大吏以免轉折遲延經局員審
定刪潤俾歸一律訂成定本並各種教科書發交各府
廳州縣以爲小學課本庶可成完全之學科迪童蒙之
知識他日進學成才皆基於此賢守令幸勿忽視

鄉土凡分爲四曰府自治之地

所轄之州
縣不與焉

曰直隸州自治

之地

所轄之州
縣不與焉

曰州曰縣今於四者均名曰本境

歷史

本境何代何年置

所謂本境者即現
在之府州縣名也

未置本境以前

唐虞夏商周屬何州

春秋戰國屬何國

秦漢以降何代屬何郡縣

何代改何

州
縣名

既置本境以後

何代屬何

州郡府

政績錄

官本境者有惠政均紀之以年月先後爲次

約分三大端

通古今而言後仿此

興利

去害

聽訟

兵事錄

有全在本境者 或本境有何叛黨或他境有何叛黨來犯本境均敘其事之本末

有涉及本境者 如一大兵事或在本境爲戰地或
以本境爲險要或在本境屯駐則節錄在本境一
段事

耆舊錄 以本境之鄉賢爲後學之感動約分爲二

事業

以實行爲憑孝

善於父母

友

善於兄弟

睦

親於九族

嫻

親於外親

任

信於友道

卹

卹振憂貧

是也

學問 以著述爲憑經史子集小學輿地算學校勘

醫學理化是也

凡歷代名儒名臣功臣名將循吏忠節爲本境

人者均應收入惟已見正史 國史有傳者不必詳錄全傳但著錄姓名註明見何史何傳其事蹟果能感動人心者亦須節錄一二不見正史 國史者應稍詳

附名宦祠

鄉賢祠

忠義節烈祠附人

人類 本境於旗漢戶口外有他種人者務考其源流叙其本末世系現在戶口若干聚居何村何山其風俗大略均應編入其種約分

回 番 畬 獯 苗 猺 獐 狔 狼

皿 狹 打姓 貂 黎 土司

如土司不屬府州縣者則由布政司查明編輯

戶口 本境戶口丁數務查明現在實數編入如有兵
荒疾疫及因農商各事情形變遷致與生齒盛衰聚
散有相關之設者悉詳載入並查近年來本境

旗戶

男口若干
女口若干

漢戶

男口若干
女口若干

氏族 本境有何大姓

某姓如何受氏 何時自何處遷居本境 至今傳

幾代

宗教 本境所有外教務查明編入

回教人若干 回教與回種有分別回種係真阿刺

伯人可編入人類回教有阿刺伯人有旗漢人入

教者均編入此

喇嘛黃教紅教人若干

天主教人若干

耶穌教人若干

實業 凡齊民不入他教者務查明實業分而爲四

士若干

農若干

工若干

商若干

地理

本境在省城之何方向若干里

凡言方向分四正四隅
言里數以人行道計

在府

城之何方向若干里

凡府與直隸州
自治地無此條

本境四界係何境 如本境之界不止四境者則以

四隅向明之

本境分爲若干區 或名爲鄉或名爲村或名爲團
或名爲里各就其舊稱記之

何區在城之何方向若干里

區之四界係何區

全本
境

城內區內有何古蹟祠廟坊表橋梁市鎮學堂

山 某山在本境治所之何方向若干里何區內或盤

互數區 山之何方距何水若干里指最近處如近

山有數水均詳之 山內有何水源其水向何方流

水 叙水道之源委約分爲四

有源委全在本境者 某水源出本境治所之何方
向若干里何區何山其水向何方流經歷何區何
市鎮至何處與何小水會其小水發源何區何山
向何方流經歷何處來會又向何方流至何處入
何水約行若干里

有源委均不在本境者 某水發源何境何山何方

流至何處入本境

入本境處在本境治所之何方若干里

向何方流至何

處有何水自何方來注又向何方流過何城何區
何鎮市何大山之麓

須明山之何方向

至何處出本境

出本境處

在本境治所之
何方若干里

入何境內行境內若干里

有源在本境而委在他境者 叙法略同源委全在
本境者但後不言入何水而言至何處出界入某
境行境內若干里耳

有源在他境而委在本境者 叙法略同源委均不
在本境者但後不言出本境而言入何水行境內
若干里耳

又有人力溝通之水道務載明何方自何處上承
何水向何方行過何地至何處注何水 凡水之

可通舟楫者務註明自委上溯至何區何地可行
大船自何區何地至何地可行小船可以所載之
石計大小或
可行筏 凡瀕海之境則須明海岸之灣曲港汊
及所轄之島嶼並註明海岸島岸之灣港何處可
泊輪船何處可泊民船瀕長江大湖之境亦須記
江湖之港何處可停泊凡山間之水道可行船者
務註明何處爲急流何處爲平流 水有春夏漲
而秋冬枯者須分別註明

道路

自本境治地起出城之何方行若干里爲何地

每十里必記一

地名

又行若干里逾何山嶺渡何水至何地與何支路

會其支路何方自何地來經何地過何山水行若干

里來會本路又向何方行若干里

逾山渡水過何地同前

至何地

或左或右分一支路其支路向何方行

計里逾山渡水過地同前

至

何地或會何路或出界或止本境路又向何方行若

千里

同前

至何地出何界與何境何路接

物產 分天然產製造產二端天然產動物植物礦物

是也用三者之本質製成器物則製造產也今以天

然產列上製造產列下

動物

動物製造

植物

植物製造

鑛物

鑛物製造

製造之品雖多其本質不外動植鑛三類如虎豹牛羊皆天然動物產也其骨革齒毛所製之物皆動物製造也絲出於蠶蠶爲動物產絲則爲動物製造布出於棉棉爲植物產布則爲植物製造他如金銀銅鐵錫玉石所製之器皆然茲舉一二以概其餘或有

合數質爲一器者則取其多數而歸類焉惟天然產製造產均應分大宗常產特產而註記之又有本境之天然而在他境製造者或他境之天然而在本境製造者尤應分別詳載

商務

本境所產之物 所製之品

何項在本境銷行每歲若干

何項運出本境

註明水運陸運

在何地銷行每歲若干自他


境何地運入本境之何貨物

註明水運陸運

在何地每歲銷

行若于

九



蘇子瞻
知不足齋
PDG

新撰閩縣鄉土志

審定者

督修福州府知府補用道

永嘉呂渭英

邑文

贊成者

籌辦同知銜閩縣知縣

平湖朱景星

五縣

總理同知銜知縣戊子科經魁

閩縣李駿斌

彰允

纂修者

總纂 戊子科舉人

閩縣鄭祖庚

快新

副纂汀州府教授己丑科舉人

侯官陳永鑫

雲瑞

副纂 優行生員
分纂 壬寅科舉人

閩縣張紹九
閩縣王際鎬

訪事者

調查委員福建候補巡檢
調查委員福建候補縣丞
總採訪蘆川學堂教習監生
分採訪甲午科副舉人

番禺馬衍奇
番禺沈福田
閩縣鄭毓寅
閩縣徐德楓

在事者

膳錄育菁學堂教習監生

閩縣李鼎金

收核校謄謄謄

掌對錄錄錄錄

監監監監廩監

生生生生生生

長樂鄭承渾

閩縣陳秉規


侯官劉商

閩縣沈瑞麟

連江魏鎔

閩縣韓其棟





閩縣鄉土志叙目

叙一

閩雖首劇邑乘闕如徵文述獻謂之閩書其目曰攷者摭其實以辨其虛也曰錄者舉其要以概其餘也

建置沿革考

未建置前
已建置後

政績錄

興利
去害
聽訟

兵事錄

本境之事
涉及之事

耆舊錄

德行
學業
廣錄
餘錄

叙二

江淮遷後衣冠入閩風猶關洛謂之閩民其目曰略者最其大凡以聯吾之人也

版籍略

人類之異種 旗漢之戶口 民族之大姓 回景之宗教 四民之實業

叙三

某山某水比物此志區而程焉謂之閩地其目亦曰略者紀其衝要以統其歧異也

地形略

區 山 水 路

叙四

經綸藍縷廣斥草萊農工商學謂之閩財其目曰
瑣記者富閩之厓胎也曰雜述者疆閩之介媒
也曰附載者保閩之富彊不可以無才也

物產瑣記

動植礦物天然品

大宗 常產
特產

動植礦物製造品

本境自製木產之物 本境加製
他產之物 他境加製本產之物

商務雜述

商會

公司

本境自售貨


輸出貨

茶業 木業
紙業 雜貨

輸入貨

鴉片 各種洋貨
米豆 各處土貨

附載
船政
鐵路



閩縣建置沿革攷

未置本境以前

唐虞屬揚州極南徼外

山海經海內南經閩在海中西北有山一曰閩中山
在海中禹貢以前東南一區不通大陸府志列表唐
虞屬揚州南境本九州既定後而言

夏商屬揚州南境

通志云閩當海滙亦揚州地列表但載揚州未云南
境略之耳府志定爲揚州南境考禹貢揚州貢橘柚

閩亦產橘則爲揚之南境無疑矣夏少康封少子無餘於會稽實爲越祖然其時閩尙未通上國卽汲冢周書附述伊尹朝獻商書正東越漚正南甌鄧亦僅及甌而不列閩也

周屬七閩地

周成王封熊繹於楚蠻五世孫熊渠伐庸揚粵至於鄂立少子執疵爲越章王在楚蠻江上之地周禮職方紀七閩康成注閩蠻之前熊渠之後叔熊自楚如蠻後子孫分七種故謂七閩

春秋戰國屬越地邊徼

無餘國於會稽二十傳至句踐又六世至無疆滅於楚播遷海上七世無諸起王閩越姓騶一作駱

秦屬閩中郡

秦并天下悉廢諸侯無諸之地改置爲郡後諸侯畔秦無諸亦遂佐漢

漢屬閩越國元封後爲冶縣建武後屬會稽南部

無諸佐漢誅秦擊楚屢有戰功高帝復立爲閩越王王閩中故地都冶卽今越王山南布政司北屬閩縣

界孝惠再叙越功分東甌地封東海王搖搖與無諸
皆句踐後孝武建元三年閩越擊東甌漢救之以其
衆徙江淮其地亦全屬閩越六年餘善殺其見郢漢
立無諸孫丑爲越繇王餘善殺郢後威行於國自立
爲王漢不禁因亦立之爲東越王元鼎五年閩越亂
漢擊餘善元封元年繇王居股殺餘善降漢封居股
東城侯徙民江淮虛其地閩越亡厥後民逃山谷者
頗出自立爲冶縣有今福建通省及浙溫台處等府
之大漢撫之屬會稽郡置侯官都尉漢書地理志會

稽統縣二十六其一治師古曰本閩越地後漢書郡

國志會稽統十四城其一章安註故冶閩越地光武

更名其後分侯官都尉爲東南二部章安縣屬南部

有謂章安之治當作治字後去其旁卽今台州者而至建安初置侯

故治在會稽東南久稱東治以別於金陵之冶城官縣長轄今福興泉漳四屬之大

東之者以別於北地張掖之侯官又黠向亭集亦言後漢郡國志東部侯國卽東侯官之譌

國三 吳屬建安郡

孫氏永安三年分會稽南部立建安郡縣爲侯官地

屬建安

晉屬晉安郡

太康三年分建安爲晉安郡本東侯官故地省建安

典船

或作曲郡

校尉置原豐縣爲閩縣胞胎時代晉安郡

領縣八原豐爲首自是之後歷代皆爲首邑原隸揚州元豐元年隸江州

南北朝宋屬揚州晉安郡昌國郡晉平郡

宋元嘉間改昌國郡

見雲臺福建通志

尋復故孝建元年柳元

景封郡公地屬之大明三年景以改封而去四年劉子助封晉安王領其地泰始二年地屬晉安縣子周

盤龍龍後改封沌陽四年晉平郡王休佑領其地尋廢立其子宣彥爲原豐縣侯

齊屬揚州晉安郡

建元四年地屬晉安王王武帝七子名子懋有才學撰春秋例苑三十卷尋遇害建武元年隱王竇義領郡治封晉安王

梁屬東揚州晉安郡

簡文帝於天監五年王晉安

或云其時併侯官於原豐合爲一縣名爲東侯官此說未據

承

聖元年封蕭方智晉安郡王撫其地方智元帝子啟

帝也普通六年晉安與建安南安俱隸東揚州

陳屬閩州豐州晉安郡

永定初分東揚州升晉安郡爲閩州治原豐

按梁陳之原豐一作

東侯官隋志註舊日東侯官改原豐一統志讀史方輿紀要及福州府志重纂通志皆云梁曾改原豐縣爲東侯官縣至隋而復然未見歷史正文非實事也似沿後溪東侯官而誤

天嘉六年仍隸東揚州光大元年取原豐

之名復升郡治爲豐州領縣四原豐侯官

原豐與侯官並列可見東侯官

之羅江溫麻

見福建前志表

時州久爲侯官人陳寶應所據寶

應父羽有才幹爲郡雄豪梁末侯景之亂晉安太守

蕭雲以郡讓羽寶應實典兵權侯景平因卽以羽守

晉安羽求傳位寶應許之

寶應但封侯官縣侯史亦未云封東侯官縣侯也此又一証

尋反

伏誅文帝乃封六子伯恭王晉安原豐爲晉安首邑地卽今閩縣也此未置本境以前之大略

既置本境以後

隋閩縣屬泉州大業後改屬閩州又改屬建安郡

文帝開皇十二年以原豐爲閩縣閩縣之名始見方九年時改晉安爲泉州至是復改原豐爲閩縣煬帝大業初年縣爲閩州治三年改爲建安郡治

唐閩縣屬建州泉州閩州福州長樂郡

武德初閩縣屬建州六年後建州屬泉州都督府貞觀初改隸嶺南道景雲二年屬閩州都督府開元十三年屬福州都督府天寶元年改隸江南道尋復改長樂郡元和間王潮據其地乾甯三年唐擢潮弟審知爲威武軍節度使縣地屬焉

代五梁唐晉閩縣又名長樂縣屬閩國漢周閩縣據於錢氏

梁開平三年封王審知爲閩王縣沿舊制審知光州固始人兄潮爲縣吏唐末隨王緒自固始南奔越南

康入臨汀陷漳浦緒性猜忌潮擒緒囚之緒自殺軍士推潮爲主此爲王氏入閩之始潮復引兵圍泉州廖彥若得其地景福元年唐以潮爲福建觀察使潮以審知爲副使潮卒審知代立爲節度儉約禮賢建學四門以教閩士歷四主而亡唐長興四年僞閩延鈞改元升爲長樂府領縣十四縣更名長樂縣清泰二年復舊石晉之時僞閩建東都天福六年縣復改名長樂明年復舊後漢天福十二年李仁達降於吳越乾佑元年地爲吳越所有周廣順元年屬彰武軍

時無所建革縣仍其舊

宋閩縣屬福州

宋太平興國六年析閩縣九鄉地增置懷安縣並屬福州威武軍景炎元年改福州爲福安府端宗卽位於此

元閩縣屬福州路


至元十五年改爲福州路閩其領縣也

明閩縣屬福州府

萬歷八年省懷安併入侯官而閩縣地界始定

國朝因之

此自隋以後爲旣置閩縣本境之情形



政績錄一

興利

晉

嚴高

按高所開水利閩侯宮二邑均受其惠故兩志互見

太康三年爲晉安太守寬惠得民時初置郡詔治閩越故城高更築子城以廣之嘗鑿迎仙館前連澳橋通舟楫之利又於城外濬東西二湖溉田數萬畝利尤大焉

南朝宋

阮彌之

江左人元嘉時改晉安爲昌國郡

詳見重纂
福建通志

彌之爲太守俗

未知學彌之教稼穡興學校家有詩書市無囂門連平峒
夷海寇之亂文帝遣袁滄覘其吏治滄數稱彌之仁聲惠
政帝欲大用之聞檀道濟之死歎曰檀公社稷臣我在內
必不使上有此失遂以憂卒謚忠惠閩人祠之弟仁之永
之相繼襲其任彌之入閩興學在虞愿李椅常袞諸君之
前乃人不知昌國之卽晉安而畧之也久矣

按昌國太守阮公
祠一在烏石山已

圯一在本境東
門外歸善里

虞愿

字士恭餘姚人泰始末爲晉平太守初立學堂教授子弟
爲政廉平人懷其惠

按愿能見越王石
事至今傳爲美談

唐

李椅

唐宗室大曆七年都督福興泉汀漳五州軍事領觀察處
置等使考禮正刑頒賦定役削去苛政興教勸學德洽荒
服遠平粵亂哥舒冕就殄卒諡曰成

按今府學在本境興
賢坊卽椅當年所建

常袞

京兆人建中初以故相觀察福建初閩人自樂其土不願

仕袞設鄉校課文章鄉郡小民有能誦習作文者必具賓
主之禮親加勸導閩俗爲變

袞墓一在馬鞍山一在永福葛嶺其裔
恒及大淳官闈知葛嶺坟爲確往拜之

沈亞之

字下賢吳興人長慶初爲福建團練副使爲民興利著有
勞績

李茸

太和中閩縣令縣東近海每歲六月潮水鹹鹵驟至敗禾
苗茸奉詔脩築海隄瀦溪水其地三百餘頃皆爲良田利
周於民

五季

張睦

固始人從王潮入閩審知使領榷務招徠商賈歛不加暴
用日以饒審知表請於朝授三品官王閩富強睦有力焉
宋

謝泌

字深淵歛人景德初知福州事有恩於民嘗脩澳橋易木
以石民便之

後元積中來守是郡
書去思二字易橋名

蔡襄

兩志互見
說詳嚴高

仙遊人知福州復五塘以溉民田又奏減五代時丁口之半嘉祐初再知福州作五戒除浮屠巫覡蠱毒之害兩蒞瘠郡弊政陋習一切蠲除雖漢之良二千石不是過也

黃德裕

字仲益邵武人元豐中知閩縣方正有爲

梁克家

晉江人淳熙間以資政殿大學士領福州軍州事克家負海內重名在郡尤留意民事嘗脩三山志四十卷

眞德秀

字希元浦城人端平初以顯謨閣待制知福州戒所部無
濫刑無橫斂無徇私贖貨舊有市令司官市於民則減值
德秀罷之曰物同則價相若公私何異耶又革閩縣里正
發穀賑荒殄海寇迎聘耆儒躬臨講席以教郡之子弟政
績卓然除害聽訟猶其餘事也夫市令里正在昔爲民蠹
者今則議設矣事變無常固不能執古法以繩之也

元
張孝思

字元中大德間

一作至元中恐
是字元中之訛

福建廉訪簽事廉直守法摧擊

奸貪發庾活饑築隄障海寬征均徭戢兵弭盜復置養濟院以居養無告其德政在民者如此

明

王恭

濠州人尙明太祖公主洪武初爲福建行省參政撫循凋敝不遺餘力以指揮李惠城福州並建樓櫓先造一樓於城北跨越王山今名樣樓

楊士英

洪武中知福州爲政嚴明興禮讓厚風俗凡百建置俱有

條理

唐珣

字廷貴華亭人成化間知福州以興學勸農爲先嘗創迎春亭於東郊以省耕歛令民墾江洲可以爲田者築塘五虎以捍海潮均監司徭役修綠榕廣坑等橋置義倉設叢塚禁火葬便民之事知無不爲捍海墾荒尤利在萬世焉

汪文盛

字希周崇陽人嘉靖三年知福州有吏才初至值大祲疏乞蠲租發廩復四鄉社倉倣朱子備荒法行之尤注意水

利開上王舊港塞新河灌田四千餘頃瘠土均爲沃壤仁人之澤洵溥矣哉

許子良

字直卿仁和人隆慶初知閩縣爲政和平簡易催科不擾民皆陰受其益君子不言利而利覆一邑矣後爲都御史

國朝

金光祖

關東人康熙元年官福建右布政值遷界令行光祖多方拊恤俾沿海流移咸得樂業凡向化新附之衆安置有方

而均平賦役釐剔里胥積弊尤爲民稱頌焉

佟康年

字晉公遼人康熙十九年授福建布政使賑災傷施醫藥日以濟人爲事閩侯二邑里胥逋糧拖累有年康年捐數十金代爲償補閩人德之蓋捐俸償逋受惠非獨里胥而已也

張伯行

字孝先儀封人康熙乙丑進士四十六年撫閩甫下車卽以表章道學培植人才爲先務創鰲峯書院建藏書樓徵

士之秀者讀書其中於吏事尤剖決若神閩中買貧女爲婢服勞役有至無齒不嫁者或鬻爲尼獲倍價伯行諭令贖歸或分俸代償嚴幼女爲尼之禁民感其義俗遂革時有爲民如慈母訓士若良師之頌自奉菲約官吏化之

李發甲

字瀛仙雲南舉人康熙五十二年任福建布政使以孝弟化民以清正率屬捐俸修洪山橋建六柱洋亭以便行人道路戴之

趙慎畛

字笛樓武陵人嘉慶丙辰進士道光三年督閩浙謂正民風必先飭吏治端士習時吳荷屋巖使增建鳳池書院慎畛慮無以經久爲定規條捐充膏火於是紳商爭相樂輸乃卽其間建佳士軒以勵多士焉旋調督雲貴閩士思其澤歲時就佳士軒祀之

吳榮光

字荷屋南海人以翰林官福建鹽法道時值嘉慶之季鹽商猶多殷實官都轉者恒視爲利藪榮光獨裁汰陋規續建鳳池書院於省垣其規制視鰲峯尋復開藩八閩於地

方利弊悉心興除卒官湖廣總督所著有吾學錄盛行於世閩士奉其栗主祀鳳池書院

徐宗幹

字樹人南通州人以進士官山東知縣有治績侯官楊慶琛爲布政使保其才堪大用洊擢福建汀漳龍道調臺灣未幾升布政使緣事左遷浙江按察使告歸御史林壽圖又以愒幅無華保之遂以巡撫來閩時左宗棠督閩浙雷厲風行宗幹濟之以寬福州糧米常仰資販運每苦不給紳士郭柏蔭等以採辦請宗幹議官辦不如商辦乃創入



口貨船凡帶米者概免釐稅宗棠良其策會奏准行民食充裕其他善政亦多由宗幹發之故同治間寇亂雖未盡平而民生不蹙以積勞卒官謚清惠

左宗棠

字李高湘陰舉人以軍功洊升閩浙總督時大寇雖平而上下游諸府椎埋攻剽之習尙時有所聞興化民俗尤頑悍會黨蠢動至樹黑白二幟以抗爭仇殺無虛日官不能治宗棠嚴加誅鋤四境粗安於是整吏治禮士人創書局以修正誼堂全書

康熙間張伯行撫閩集十郡名士於鰲峯書院之正誼堂纂訂儒先文集故名爲正誼堂全書

建正誼

書院以課舉貢

在本境東街
今學務公所

開桑棉局於繪春園

耿繼茂故別墅
在水部門外五

六里俗呼耿王莊
今卽爲左文襄祠

以關利源其餘善政不勝枚舉旋改督陝甘

去光緒甲申馬江新敗民日十數驚 廷旨以宗棠督辦

福建軍務旌麾到省民心遂安次年秋以勞卒於軍閩人

罷市巷哭 朝廷勅建專祠祀之

沈源深

字叔眉祥符人光緒庚寅以侍郎來閩按事適學使者烏
拉布卒源深遂留閩督學每試士吏唱名畢劬胥役按名
搜檢得懷挾書籍悉火之扁門後終日危坐堂皇丁役士

子咸懾其威槍代傳遞之弊以絕源深服膺宋學推宗程

朱故所至皆以課士士亦爭加講求文風一變


正誼堂全書戶
誦家絃有洛陽

紙賞
之況

辛卯九月差竣擬北旋而

廷旨仍留庠序相慶逾

年遽卒士無賢不肖皆惜之環請大吏建祠祀之烏石山



政績錄二

去害

唐

閻濟美

貞元末授福建觀察使陞辭日德宗喻以農事且言南方山水之富到官創望耕亭前觀察奏置監牧索部內馬五千匹牛羊稱是濟美奏罷之力除弊政不阿同官常賦之外不加徵奏民瘼關心於此可見遷浙西刺華州擢工部尙書卒諡曰溫

朱璣

字仲齊咸通進士閩帥鄭鑑薦璣由古田令擢爲團練使

按代鄭者實爲陳巖

璣在巖前當是副使

黃巢寇福州璣招集義勇分屯要害寇莫

敢犯

明亦有名將朱璣以指揮破倭烽火門後追海盜曾一本亡於陣

宋

王平

莆田人知福州大中祥符初轉運使王贊言福州官田宜依潭泉例課租平曰是額外增稅也奏止宋代郡守得專奏不受制於上官與今世異

胡則

字子正永康人知福州天聖初張希顏奏請官莊田納二稅外仍輸租米則奏罷之

燕度

字唐卿益都人嘉祐中知福州閩多盜度請假事權治之遂加兵馬鈴轄盜以少戢

元絳

字厚之吳縣人嘉祐間知福州悉罷錢氏時無名之徵數十年民困爲一蘇焉

孫覺

字莘老高郵人元豐初知福州時小民欠市易錢繫獄甚衆有富人出錢五百萬緡蒼佛殿覺諭其代償圜圉一空易無益爲有益是真能權者

曾鞏

字子固南豐人熙甯末知福州將樂盜旣降復合鞏以計致之自歸者二百人又擒海盜數十人境內盜息民以安堵鞏之賜也

韋驥

字子駿錢塘人元祐進士爲福建路轉運判官值年饑驥
以去京師遠擅檄州縣發廩自疏專擅違法之罪詔釋之
閩盜多阻險爲患驥悉擒捕之弭盜賑饑善於權變必求
安民而後已

江常

字少明惠安人靖康初知福州時建賊乘海迫城常諭以
禍福賊羅拜散去州卒驕橫喧噪牙門常治其黠惡紀律
肅然

張守

字子固晉陵人紹興初知福州時右司員外郎張宗臣請築州城守以州人困疲奏止閩自范汝爲擾後公私空乏守撫綏凋瘵奏蠲所貸常平緡錢十五萬初僞閩分八州之產爲三等上給寺觀中給土著下給流寓守斟酌存留有差

方廷實

莆田人紹興中爲福建提刑時海盜竊發廷實引用鄭慶鄭廣輩以盜禦盜遂相次遁去又奏除舖例和買之害發常平米以賑旱饑民賴以濟

張維

字振綱劍浦人紹興進士知閩縣定差役條約賞倍者半其停年民以爲便已而制下更定役法如之維又定丁匠之役歲不過三日民號之曰張太清

宋若水

字子淵雙流人官吏部爲時相所忌出提舉山東常平尋移福州閩俗多不舉子若水力禁之

蔡幼學

字行之瑞安人光宗朝提舉福建常平時朱文公居建陽

幼學每事咨訪嘉定間知福州進安撫使政尙寬大州例
抑員買鹽有差鹽浮鹽名色皆出常賦之外幼學力請蠲
免不報舉舉司令民以田高下藏新會子不如令籍其資
幼學曰罔民而可爲乎拂袖歸

楊長孺

吉水人嘉定間知福州兼安撫使理宗嘗問廉吏真德秀
對曰若楊長孺守閩今之廉史也其推重於名賢如此

徐鹿卿

字德夫豐城人嘉定間幹辦福建安撫司事居官廉約不

私一錢會汀邵寇作鹿卿贊畫備禦凡避寇入城者多方
調濟所活甚衆民頌之

元

百家奴

父峻都有平閩功百家奴亦以平閩廣之功爲海外諸番
宣慰使兼福建市舶司提舉鎮守福建尋兼福建道宣慰
使都元帥時福建水災出私錢市米以賑多所全活

范梈

字亨父一字德機清江人由翰林供奉改閩海道知事闕

有文繡局取良家子爲繡工吏因爲奸悖作歌詩述其弊
廉訪使以聞遂罷遣之棹所至雪理冤滯獄無繫囚案無
積牘龔黃治術亦何多讓

莊嘉

字子敬至正中爲閩海道廉訪使屢勦平寇賊逢歲饑救
荒有法每出閩人羅拜之旣擢去則奉木主祝其長生其
爲民愛戴若此

王翰

字用之靈武人除福州路治中適三魁賊起翰自造其壘

諭降之又戢泉州土寇柳莽元亡屏居山中有薦之者作
絕命詩數首自裁就義從容尤瞻大節焉

明

嚴祿

開化人洪武初知閩縣臨其上者皆大吏而朝使貢蕃絡
繹往來宿頓省垣供億無已祿獨不擾民然事亦自辦閩
邑田賦倍他縣祿力請大府而均之元明後治官之官日
多省會首邑官瘠民痛閩人士益念祿不置

林遜

潮陽人師事蔡希仁洪武乙丑進士卽授閩縣丞歲饑請賑多所全活又疏請豫防海寇厲禁沿海捕魚優詔答之夫承微官耳顧敢言事抑亦難矣然不如連絡漁團振興漁業則海利開海權振而海盜自銷爾

陳敏政

臨安人宣德間知閩縣時中貴旁午閩中求方物敏政以智應變奸徒斂手里胥不擾所保全者多

路璧

安福人福建左布政使先是閩人貢獻供億均取八郡不

計大小暨視民數爲等差而均其役又年徵稅價輸京師
吏胥因緣爲私當事者不之省暨悉釐革之留心利弊可
以風世

陸偁

字君美鄞縣人巡按福建陞按察副使巡視海道時海寇
充斥編戶焚蕩偁演水戰火攻法拒擊之以什伍編海艘
稽其出入立賞格嚴哨探沿海肅然

蔣澐

字子川上饒人宏治中知福州性峻直鎮守太監驕恣澐

不少屈靈濟宮舊遣中使挂袍歲費公帑萬計濫疏罷之
後數歲一遣鴻臚官著爲例與當事不合棄官歸時議稱
之

夏從壽

字如山江陰人福建左布政使時有海舶逾制巡海者欲
沒入之從壽曰海鄉以船爲業奪之是驅其爲盜也已而
失船者果皆入海從壽榜之乃首服適有詔赦民田租之
半計閩當缺軍餉數月從壽請留歲解銀十萬以充懇疏
至再乃得如請後擢鄖陽巡撫

胡文靜

字士甯山陰人巡按福建靈濟宮挂袍糜帛擾民蔣潑疏
罷之然猶閒歲遣中貴文靜奏請從便附資又疏革新設
抽分處所及禁約各鎮守衙門橫索助貢等項銀兩中官
爲之戢平海寇王宏瑀獲其魁解散餘黨勅賜銀幣山寇
詹師富等嘯聚剽掠閩浙粵文靜設計擒獲巡撫王守仁
上其功擢南光祿少卿臨事敢言濟變有識洵稱循吏

魏榮

新建人以吏部郎中出參閩政時古田杉洋盜馬周良等

縱掠至省垣傍近或議屠杉洋槩曰杉洋數千家豈盡盜乎臺使屬槩經畧槩勒兵守要害其黨縛周良詣降餘衆罔治流賊復擾古田槩部署市民二百人啣枚夜伏悉捕斬之終槩任賊無敢入福州界者吏民繪象祀之

聶豹

字文蔚永豐人按閩奏罷鎮守太監及中官之司市舶者行部所至奸民猾吏先得立名悉捕治之建養心書院觀風較士誦小學禮記諸書面訓之其留心吏治洵不可及

樊獻科

字文叔縉雲人按閩先是使者行部有司具驕從供帳甚都獻科先戒罷之單車行部島夷犯瀕海諸郡汀州盜阻山爲寇諸將擁兵鑿城科慨然曰人臣奉璽書境外苟利社稷專之可也山海方螫毒任事者鑿城自守如元元何閩撫聞之投袂起視師諸將始決戰島夷盡殲焉

何維柏

字喬仲南海人按閩值大祲殫心荒政全活數十萬人疏劾嚴嵩五事逮下詔獄民攀送者哭聲振林木嵩敗起官至大宗伯

胡有恆

字貞甫山陽人知福州爲政勤敏先是郡驛傳多役富民
往往破產有恆請更僱役令民出輸官費始有經御史下
其法於七郡

秦淦

向程附

字懋清慈溪人嘉靖時知閩縣值倭亂紳富閉糴淦望門
勸貸設粥廠以活難民獲全者衆又有向程者亦慈溪人
隆慶中來宰閩邑名與相埒民呼秦向有漢召父杜母之
風焉

殷從儉

字汝中臨桂人隆慶間撫閩先是福建以倭寇故籍民田爲戎餉名曰丁四糧六每易撫臣輒增分數卽歲祲必取盈從儉悉復原制省冗費汰虛兵肅吏治所著八閩政畧皆其躬行者也居官廉靜簡約以休息爲事及卒橐餘十數金而已民祀之於西湖

龐尙鵬

字少南南海人萬歷初代殷從儉撫閩甫下車求民利便而張弛之吏民軍帥士卒皆得自達復請於朝蠲八郡五

十邑逋徵五十萬計商賈之征舟航之費冶鑄之利寺觀之租悉哀以予民歲亦不下萬計其所行一條鞭法賦額易知雖下戶里民皆曉輸納之數在浙有所搏擊及撫福建墨吏望風解綬尙鵬更爲寬大踰年擢左副都御史去民遮道哭送聞其卒爲之罷市祀之西湖歲時伏臘呼爲龐公福

閩語謂祀神爲福

惠澤深入人心及今猶未艾云

袁一驥

字希我江陰人萬歷間撫閩稅監高宥被命兼管粵稅造樓船治戒器招集亡命徵集百貨躬出與夷互市粵民集

其門索市直不與因羣譟索殺傷百十人射火箭焚民居
無算復馳入驥門請救一驢叱曰爾虐吾民何救爲宋邀
至通衢百姓將羣殺宋驢止之俄流言以驢鼓民與宋爲
難遂屢疏乞歸閩人祀諸九達之衢

國朝

佟國鼐

遼東人順治三年隨師入閩任巡撫招流亡安反側遠近
懷服戊子歲饑土賊聚衆圍城適大兵進討兩粵留守不
滿千人國鼐探知賊情伏精騎近郊擒斬渠魁王細居李

夫人等賊衆遠遁又令參將王進田勝等剿捕郡邑餘寇境內以安時巡按周世科專任嚴而甬濟之以寬多所全活閩人德之

佟國器

國甬諸弟順治八年任福建左布政十年擢巡撫閩自明季版籍淆亂兼兵燹後戶口散亡吏胥挪移爲奸里民大困國器檄行郡縣履畝受糧現丁輸稅民乃得甦時鄭氏雄海上禁旅征剿飛芻輓粟刻期猝辦又累疏陳請撥給淮浙鹽餉協濟軍食簡選將士歷剿延建各郡山寇悉平

焉閩人與國爾康年並稱三佟

許世昌

遼東人康熙元年撫閩先是鄭氏陸梁沿海諸郡製造戰艦火炮部議以浮價駁減二十餘萬世昌慮依議核減勢必分派民間遂具疏力請准銷又請蠲順治十二年以前牛角等稅一十餘萬免民屯久荒田糧六十餘萬給遷界窮民牛種勸令開墾田園復念播遷之後饑寒癘疫捐俸委官於七門及近郊賑粥施藥全活數百萬人時有萬姓饑病仁天活命之謠爲

國家培元氣洵稱開創功臣

范承謨

字覲公瀋陽人太傅范文程子康熙十一年由浙撫

召對

特簡閩督十二年冬抵閩承凋瘵之餘百務廢弛兼撤藩
旨下奸宄擾攘承謨多方計畫期弭亂消燬然耿逆已蓄異
謀巡撫劉秉政陰附賊給承謨入見承謨不爲屈絕食十
日求死不得被拘禁三年著蒙谷自序百苦吟武夷歌以
見志康熙丙辰秋耿逆勢蹙出降慮承謨發其奸勒殺之

事聞謚忠貞公蒞閩僅五月洞燭逆謀先幾布置惜同官掣肘功弗克就然適以成公之烈公亦可以無憾矣

姚啟聖

號憂菴其先爲浙之紹興人入漢軍籍始任香山縣註誤去官十三年三藩反起爲郡佐遷溫處道隨大師平賊爲福建布政使輕徭賦與民休息而矜慎筭鑰吏莫敢爲奸時鄭氏跳梁海上乃私募壯士有澄清海外之志或謂公文臣奚事此則掀髯笑曰若以文武有二途耶十七年擢福建總督舉循良懲貪墨捕諸豪憇寘之法境內肅清益

毅然以平海爲己任移節駐漳開招徠館禮降者以示寬
大調知泉川施琅習水戰熟悉海上情形疏請授爲大帥
二十二年六月乙酉與琅決策從平海進兵克澎湖七月
丙申克懷率衆降凱還後題復海界遷民俾安舊井又置
通省郡邑學田供貧士膏伙尋以病卒於官櫬出西門士
庶泣奠者相屬祠於洪山之澣舊志云公美鬚髯多奇計
其初議平海也敵遣偵者覘動靜會元夕張燈置酒還珠
門漏下二鼓忽稱疾命屬吏行酒而公已開南關疾馳三
百里至五虎門調將出師在漳州時亦多出奇用閒故其

黨相猜納欸之計遂決崑崙之戰蔡州之捷古今人何必不相及乎

范時崇

字自牧瀋陽人忠貞范公之子初爲福建按察使慈而善斷四十九年又來督閩浙周恤民隱振起人才士飽馬騰疆圉完固建凜訓堂於道山迄今歸然忠貞公爲有子矣

孫爾準

字平叔金匱人久宦閩惟一遷徽撫旋擢閩督歲歉預開海禁廣運海米以賤米價悉平囤積者無可居奇尤留心

會垣水利焉

丁日昌

字雨生豐順名諸生文筆敏捷曲中事理同治初中興諸名臣各開府治事爭欲得日昌爲助旋以軍功累官至巡撫光緒初撫閩歲丙子福州大水居民出不意不及遷徙淹斃甚多其存者又以牆屋傾倒露棲城上日昌躬行撫恤督府縣煮糜爲賑死卽給錢掩埋水旣退分途購致糧米手書函致四方勸賑又念士之貧者最多驟遭水患尤難自存分別散給錢米布帛有差其水後示民語罪已不

職出於至誠故雖值奇災而民得漸復業

下寶第

字頌臣儀徵人同治中撫閩時上下游寇亂初定民苦瘡痍而奸頑者轉以習亂久椎理剽掠之徒紛出於里閭大爲民害寶第風行雷厲痛懲不遺餘力以力爭洋務解職去光緒戊子復督閩浙年已老嚴厲不如昔而豪暴者猶斂手然創行銀圓禁小票其有德於商賈尤大先是福州多開張小票店散行市中奸民因以爲利時倒閉肩挑貿易受害最甚寶第飭倣上海粵東例以小洋抵用設公估


官局一以便民之不辨真贖者始轉運於香港廣州以濟用未幾銀圓局遂開小票店永絕至今稱便壬辰春告病歸旋卒

岑毓英

字彥卿西林諸生以戰功著光緒辛巳撫閩有土豪魚肉良民欲斬之兵民相顧震懼在閩率多惠政下逮行丐咸被膏澤市無強乞之擾廣書院舊額籌加膏火念閩紳之供職京師旅食維艱歲籌常欸以資津貼事未竟督滇命下此舉遂廢

彭鏊

字和菴甯都副舉人知閩縣嚴禁行用小錢市政爲之一肅私鑄者多改業未幾擢永春牧尋任福州府卓著循聲旋以病謝事



家
平
知
和
慶
PDG

政績錄三

聽訟

宋

王臻

字及之汝陰人天禧中知福州閩俗喜訟奸者瞰野葛誣人至有抵死者臻廉其狀奸不得行時服其嚴明

方嶠

字次山莆田人爲福州司理參軍民鄭某以誣繫獄守促令引服嶠力爲辯寃守不能奪其不輕民命以阿上意可

謂強項吏矣

陳麟

字夢兆沙縣人大觀三年進士政和中知閩縣巨室被盜以誣里人麟辯其冤卒得真盜勞家欲徙人幕屬麟麟持不可勢家餌部使者杖縣吏以撼麟亦不爲之動部使者徵諸邑花石麟又弗顧怒曰麟何所恃敢爾答曰孤寒小臣恃潔而已彊項爲一時所僅見與黃綜翁谷號閩中三循吏

黃度

字叔文新昌人嘉定三年知福州始至牒愬猥繁隨事裁
決史稱其守正不阿粹然君子

羅必元

字亨父進賢人嘉定間爲福州觀察推官有勢家李遇奪
民荔枝園必元直之後爲遇所中罷去必元學有淵源風
節甚高人尊慕焉

劉燾

建陽人由連城令改知閩縣治以清簡庭無滯訟興利除
害知無不爲閩俗以健訟聞燾以清簡治之不屑屑以聽

訟見長循吏高風倜乎遠矣

杜杲

邵武人初授海門鹽場尋攝閩縣尉民有子溺死誣人殺之杲驗髮中得沙謂曰而舍旁池沙也奈何誣人其片言折獄如鏡取影物無遁形可謂神矣

元

王暉

字仲謀汲縣人任閩海道廉訪使黜官吏不法數十人繫囚冤滯盡行決遣別造營屋俾戍兵無得寓民舍吏民稱

便明

鄭湜

字仲持浦江人洪武初爲人誣告湜與兄濂爭下獄太祖
義而釋之特拜福建布政司參議嘗有商被殺盜旣獲以
無屍不服湜夜縛羣盜於庭而匿人案下聽之果得藏屍
處人以爲神聽斷不尙刑求總以得情爲貴彼刑訊何爲
乎

王璉

洪武中爲福建按察司副使以激濁揚清爲己任尤精名法聽斷不恃鞭撻以理探之無敢隱者朴責不施案牘無隱璉其仁智兼用者乎

周新

字志新南海人永樂初爲御史方正敢言巡按福建興利除害雪冤獄如神

呂升

永樂中任福建按察司僉事篤學勵操獄稱平卽僕從亦訓以論語孝經無不守法聲譽大著



邢宥

字克寬文昌人景泰初以御史治宦官王振黨獄有聲出按福建議海禁數十人疑獄剖決明允使數十人重慶再生洵慎刑之君子也

劉鈺

安福人天順間按閩時巡方多擊搏鈺獨慎持憲度治獄察吏寬和有法時有鎮守中官誣都指揮僉事錢輅罪以反狀聞兵圍其第鈺奏解輅得釋寬以濟猛保全者多明慎之稱當之無愧

江祖

字崇善歙人天順間爲福州推官廉謹而明郡無冤獄夫治獄無冤于公所以得名也祖其庶幾近之

吳山

字靜之吳江人福建按察使每念閩中爲其父洪懋棠之地聽斷公明法中行恩民爲之歌鳳雛官至刑部尙書

葉溥

字時用龍泉人正德間知福州溥少從師於閩稔知人情風土及爲郡片言折獄無敢欺者親民之官當任土著卽

此可見

王尙學

馬平人嘉靖間爲福州推官雅有志操浦城巨姓以計殺
三人獄具郡不能決監司移尙學訊之當事得賄欲釋其
罪尙學堅持不可慮囚謹慎不爲勢撓執法士師與毛鷺
者有間矣

戴愬

天長人嘉靖中任閩令性明敏吏民一見輒記姓名健訟
者畏其有過人之資無敢欺之者

陶大順

字景熙會稽人萬歷中轉福建右布政時藩庫亡金左藩逮吏卒五十人榜掠於庭大順以爲冤請代治獄旬日詗得鐵工爲人銷金皆元寶訊之爲吏舍奴開鑰盜藏五十人得釋嗚呼詰盜有方不敢妄陷平民可謂仁明兼著矣

潘順龍

字躍卿錢塘人知福州有風裁斷獄精敏吏民嚴憚

徐世蔭

開化人任福建按察使立法嚴明人不敢犯有衛弁領運

解京以乾沒株累平民數十家蔭摘發奸狀立斃杖下由
是地方肅然

趙繼鼎

德州人官福州司理公明堅決不畏強禦凡所平反多得
情奸猾斂迹人號趙鐵面

國朝

于成龍

永甯人康熙十八年按察福建寬厚慈仁折獄平允自奉
儉約清節爲天下第一

張所志

字淡明遼東人康熙十八年代于成龍爲按察使剛正嚴明讞決不滯遇有冤獄立爲昭雪閩俗健訟所志欲矯敝俗不輕受民牒刁風遂息

王裕璜

山右大同籍浙東山陰人再任閩縣均有聲剛正精明人莫敢干以私嚴禁胥卑需索遇事卓然有主不爲浮議所撓案牘皆手裁虛僞之辭罔敢妄瀆訟牒以減乾隆十八年升知府未入 覲卒閩民咸追思其惠

陳宏謀

字榕門臨桂人雍正癸卯翰林乾隆十七年以湘撫調福建十九年疏言閩俗多訟案必速審立限清查每月稽覈一次以案件已完未結之多寡考各屬之勤惰庶幾塵案漸清嗣又請開閩民出洋之禁均報可官終大學士謚文恭

曹繩柱

字匪石新建人閩俗殺人多賄人代償繩柱爲閩臬奏嚴其科條弊爲一清又謂閩多械鬥宜專其責於地方有司

擢閩藩旋以勞卒

李賡芸

字許齋嘉定人由汀漳道擢閩臬屢雪疑獄活人無數再遷布政使爲屬吏朱履中所訐主者持之急不肯誣服跟鍊控辱受迫而縊民寃之哭其門累月不絕事聞抵誣者罪并斥主者許立祠民祀之懷德坊顏曰遺愛

裴蔭森

字樾岑淮安人官福建按察使清理滯獄尤多平反民悅服焉光緒甲申馬江師燬之第三日英國領事入督署民

尾其後以爲官通夷也相與譁於轅門勢洶洶幾不測蔭
森馳至民皆斂手曰賢臬司來相率退其平日有以平民
之情而深得其心若此後以光祿卿督福州船政肇畫過
勞致疾告歸卒

龍錫慶

字仁陔善化人官福建鹽法道數權臬司其聽訟最精審
於大姓鉅族尤不苟恕豪強斂迹民間其回任鹽道也則
蹙然以悲聞其復權臬司也則相慶於道然錫慶尤留心
水利開河鑿井必日臨視閩省貢院號舍萬餘惟明遠樓

左右二井又深不盈數尺每試必取水於外既苦不潔且
易以叢弊錫慶躬相形勢廣開數十井自是入闡者皆得
飲甘泉逢乾旱則居民尤資其利故至今士民樂道其遺
事而惜不竟其用云

錫慶擢浙江
布政卒於任

兵事錄一

本境兵事

春秋

歐冶鑄劍之初

冶山者

湛山也

越鑄湛盧

因湛山爐而名

諸寶劍於此

松溪又有湛盧山劍峰劍池湛盧書院蓋若會

垣越王山原名泉山晉江清源山亦稱泉山

山下有劍池亦名歐冶池相傳越允常使

歐冶子鑄劍焉

見吳越春秋

勾踐繼鑄

見吳錄並宋書州郡志

且令將軍徵兵

於閩

池濱一阜曰將軍山

卒以援公與處子

居括蒼今處州

所授劍術

蓋若台灣生蕃飛標

沼

吳稱霸不忘閩士勞苦因稱其地為冶地

又呼東冶

其城為冶

五十四

城以識其功蓋事雖難考今有餘榮誠閩人最初之一大
紀念也案之逸周書謂正東漚深九夷十蠻越漚郭璞山
海經註言永甯縣卽東甌在歧海中閩越今建安郡卽西
甌亦在岐海中然則所謂歐冶者殆非箇人名氏其卽甌
人甌漚
歐通之劍冶歟戰國無疆滅於楚後徙居冶實亦用兵
時代史不及書故從其略

戰國及漢

無諸佐漢

秦并天下以閩爲郡無諸失其封因率閩中兵歸番君吳

芮佐漢從東冶起兵轉戰入關又佐滅項此無諸戰績之始見於歷史者也高帝五年叙功立爲閩越王

其詳見侯官志

莊助救甌

漢孝惠重叙越功封東海王搖都東甌景帝時懼漢討罪購殺吳王濞漢子奔閩勸閩擊甌爲閩甌兵事之原因建元三年東甌困告急漢遣會稽太守莊助發郡兵浮海閩兵遂退此爲海上用兵發軔之秋助固范蠡後第一人也

范蠡不過轉漕江淮莊助居然軍艦

中國海權發達亦久矣夫

越人相攻

建元六年閩擊南越南越以聞漢以謹守約也分遣王恢韓安國伐閩未踰嶺騶郢發兵距險其弟餘善不順縱殺之漢因立無諸孫繇君丑爲越繇王然不能制餘善漢謂餘善不足復煩師旅卽立爲東越王與之並處元鼎五年南越反餘善請以兵從然實陰持兩端六年餘善反以騶力等爲吞漢將軍入白沙武林梅嶺皆殺其校尉刻武帝璽自立漢又分遣橫海樓船諸將軍伐之先使故越衍侯吳陽歸諭餘善弗聽及橫海先至陽以其邑七百人反攻閩軍於漢陽從建成侯敖

徐廣注敖東越臣

與繇王居股謀殺餘善

以其衆降漢以閩越恃其地險數反覆遂徙其民江淮而虛其地自古恃險塞而外挑強國內相攻擊未有不俱歸覆滅者閩越王卒滅於漢蓋原諸此審勢合羣乃足以永其廟社有國者可弗兢兢焉

後漢侯官長商升兵事許侯官志故本志不復見以下多做此

南朝宋及梁陳

劉瞻竊據

明帝泰始二年

或作廢帝景和元年今據福建通志易之

晉安內史劉瞻以郡叛應

晉安王子勛建安內史趙道生起義討之不克沈思仁遣姚宏祖討斬之於羅源縣

按羅源常是羅江宋仍晉郡羅江爲領邑之一州郡志羅江註吳屬臨海恐在甌境若今羅源

趙宋改永貞縣而置
非劉宋羅江明甚

臧厥弭盜

梁大通間臧厥

字獻卿東莞莒人

爲晉安太守郡居山海結聚逋逃

時有所聞前二千石雖募兵捕討而竊盜不止厥下車宣風化諸凶皆束手聽命居民復業

羊侃討逆

闕阻山海古多伏莽時中原多事有陳稱吳滿者尤強橫

爲之渠帥前後太守莫能撫定梁大通六年羊侃

字祖忻秦山梁甫人

出爲雲麾將軍晉安太守以兵擊斬二人於是郡內肅清

莫敢犯者漢宣帝思共治者惟二千石觀厥與侃之守郡益以其言爲信

陳寶應叛陳

陳高祖受禪使陳寶應領閩州刺史寶應娶緝州刺史留異女爲妻異反寶應助之 朝廷討寶應執送建康斬於市方寶應之叛也虞寄屢諫寶應不聽使焚寄舍不爲動縱火者尋自熄鄉人傳爲虞公庵寶應有臣若此而不能用其覆滅宜哉

此節關係侯官者詳侯官志關係本境者則詳本志餘仿此

隋

劉揚死事

文帝開皇間越州賊高智慧攻泉州

州治原豐
卽今福州

刺史劉宏誓

衆守百餘日無援糧盡煮鐵剝樹皮食之城破執宏欲脅
降之宏不屈大罵而死士卒數百人無一降者煬帝大業
十年夏六月辛未賊帥鄭文暉林宗護等衆三萬陷建安
郡

時建安郡仍
治今之福州

太守楊景祥死之守土之臣與城存亡大義

也二公爲首見矣閩人鮮有知之者豈年代久遠耶

唐

謝元治平賊

高祖武德四年妖賊武遇陷建州卽福州次年州刺史謝元治討平之武德距開皇爲年未幾而三被陷城之禍方隋唐之交吾福州兵燹之災亦烈矣

福州軍亂

德宗貞元四年福州軍亂殺觀察使吳銳大將郝誠溢自稱留後唐自肅代以後扼塞之區擁兵者莫不擅殺命吏自稱將帥福州亦不免此風焉王者所以謹法令不敢稍存姑息誠慮習爲暴亂而莫之能挽也

黃巢陷城

曹州冤句人黃巢以不得第倡亂於乾符二年

僖宗

五年

三月由江西直趨建州崇安鎮將鄧光布帥兵禦之中流

矢死遂屠沙縣等處十二月進攻州城刺史李乾祐遣鎮

將上官洎及子蘭皆戰死有陳巖者

黃連

鳩丁壯保鄉里

力擊却之朝廷賜鼓角號九龍軍六年春巢由別道陷福

州

通鑑紀事本末作前年十二月重
纂通志則作是年二月今以之

殺人如麻尋退去福州於用兵

爲絕地其罕逢兵禍者以此巢起自中原突由江右入閩

殆非閩人所能意料然上游節節天險使預備有素以主

待客何至遭茲荼毒大抵昇平久武備不修無古今一也

民生竭蹶思亂躍躍莫謂無巢之酷者守土之吏其加意哉

李連叛變

中和四年

僖宗年號

泉州左廂都虞侯李連叛攻福州時觀察

使鄭鑑以陳巖有禦黃巢功表爲副使兼泉州刺史連在州驕慢不法巖至將按誅連連遂奔谿洞中合衆攻福州巖擊敗之鑑因表以自代爲治有威惠閩人後祀之於蘆州地方不患有寇賊之變而患吾無以禦之若陳巖之於李連是矣儲將才以待非常凡爲疆臣皆宜留意也

五季

王氏有閩

唐末僭亂紛起壽州人王緒攻陷光州固始時王潮及弟

審知

固始人

以材勇著緒召署軍正蔡州秦宗權以緒爲光

州刺史尋又攻之緒率衆南奔自南康入臨汀陷漳浦緒

性猜忌每因事誅部將潮潛謀殺之衆卽推爲主泉牧廖

彥若貪暴潮畧地至其境耆老遮道乞留遂引兵圍彥若

克之光啟二年

懿宗年號

觀察使陳巖表爲泉州刺史景福元

年

昭宗年號

巖卒婿范暉自稱留後潮遣審知攻福州破殺之

唐卽以潮觀察福建審知爲副潮卒審知代

審知狀貌雄偉常乘白馬軍中號白

馬三郎昭宗乾寧三年潮卒代其任

唐以福州爲威武軍拜審知節度使同平章

事封瑯琊王朱梁加拜中書令封閩王凡唐臣之不仕梁者若王溥子淡楊涉弟沂名士徐寅等皆依之建四門學以教士之秀者招徠商賈苦黃崎風濤之阻一夕震開爲港人號甘棠港謂德政所致云後唐同光二年莊宗年號漢主引兵侵閩屯於汀漳境上審知擊却之三年十二月卒諡曰忠懿審知事潮盡敬爲副使有過潮猶加捶撻無怨色焉故潮舍其子先命審知知軍府事潮薨審知以讓其兄

審邦辭不受自唐之末四海鼎沸王氏入閩閩里獨晏然則審知外修臣節內措民庶之功也宜千百年後尸祝弗衰云

忠懿諸子爭立

延翰審知長子也自稱留後汀州民陳本聚衆圍汀州延翰遣兵討之時同光四年也既斬本唐拜爲節度會莊宗遇弒中國多故延翰乃取史記東越傳示將吏曰閩古王國也於是百僚知指勸進遂建閩國然猶奉後唐正朔十二月泉州刺史王延鈞與建州刺史王延稟合兵襲福州

殺延翰

延真木姓周審則養子也本與延翰不睦延翰立出其弟延鈞爲泉州刺史延真怒二人因謀作亂十二月合兵入執延翰殺之而延鈞立更名鑄

初二人之連兵也延稟兵先至執殺延翰明日鑄始至

延鈞

更名

延稟自以養子推鑄立之自還州鑄餞於郊延稟謂之

曰善繼先志母煩老兄復來鑄銜之長興二年

明宗年號

延稟

率子攻鑄西南門鑄遣王仁達拒之僞降給繼雄伏發刺殺梟首西門延稟兵見之皆潰亦被執鑄謂之曰予不能繼先志果煩兄來遂殺之其子守建州奔錢塘三年鑄請依馬殷錢鏐加尙書令不報遂絕朝貢道士陳守元以左道見信建寶皇宮以居之守元謂之曰寶皇命王少避其

位後當爲六十年天子鱗卽命子繼鵬權主府事旣而復位受寶皇册稱帝以黃龍見改元龍啟時國計使薛文傑用事與內樞密吳英有隙誣以謀反下獄殺之英營主兵得軍心衆皆怒七日建州豪吳光率衆奔吳其冬與吳將合兵來攻鱗遣將皆不往曰得文傑乃進不得已磔之於市吳兵亦引歸閩人追敗之龍啟三年改元永和是歲十月鱗長子繼鵬與皇城使李倣朋謀弑鱗自立更名昶改元通文以李倣判六軍諸衛事然倣心常自疑陰爲備昶因大享伏甲殺之所部奪倣首奔錢塘晉天福三年

高祖
年號

控鶴都將連重遇作亂夜率衛士火南宮昶挾愛妃子弟

黃門衛士斬關出宿於野

舊志閩亂昶出北關至梧桐嶺爲衆所殺

重遇迎延羲

審知

少子

立之延羲命子繼業襲昶執而殺之更名曦改元永隆

日爲淫虐富沙王延政者曦弟也數貽書諫之曦怒遣林

建崇監其軍

延政爲建州節度使

延政逐之以建州建國稱殷改元天

德

是歲晉天福八年閩永隆五年

四月殷將陳望攻福州入其郛旣而敗歸自

曦與延政積年相攻閩中苦軍旅連重遇恐爲國人所誅與朱文進連姻以自固曦疑之重遇等懼晉出帝開運元年三月曦出遊重遇遣壯士拉殺之推立朱文進王氏兄

弟在福州者皆殺之以黃紹頗守泉州程贇守漳州許文鎮守汀州稱晉年號泉州將軍留從効詐曰富沙兵取福州矣州人乃共殺紹頗迎王繼勳爲刺史漳州聞之亦殺贇迎王繼成爲刺史

二人皆王氏諸子

文鎮懼以汀州降於延政政

已得三州重遇亦殺文進傳首建州裨將林仁翰又殺重遇謀迎延政都福州次年正月延政改國號曰閩以福州爲南都南唐聞亂來攻延政出其子拒守而唐兵方急攻建州福州牧李仁達謂其徒曰富沙不能自保能有閩耶禽繼昌殺之

即延政子

欲自立懼衆不附乃迎立雪峰僧卓儼

明已而又殺之欲自立送款南唐唐以爲威武軍節度使

更名宏義

旋改宏達

唐兵拔建州延政降遷其族於金陵封鄱

陽王次年

晉開運三年

四月宏達遣弟宏通攻泉州留從効執繼

勳送金陵唐置泉州爲清源軍以從効爲節度召李宏達

入朝宏達不從八月唐發兵攻福州克其外郭宏達改名

達奉表吳越乞師而從効亦逐唐戍兵據泉漳唐猶封從

効晉江王漢天福十二年

是歲漢代晉因晉高祖年號

三月吳越遣統軍使

張筠趙承泰等水陸救福州大破南唐兵遂取福州七月

吳越王錢俶更達名曰孺贇以爲威武軍節度使十二月

孺賀謀殺吳越成將復以福州降南唐事覺伏誅福州遂
爲吳越有初楊行密據淮南勢盛常有吞東南之志王審
知憂之使人問休咎於僧上藍者報云不怕羊入屋祇怕
錢入腹乃歎曰福州之患其在錢氏乎至是果驗然王者
言人事不言術數使忠懿諸子克修其父之節內修政事
骨肉無爭彼吳越焉能并有其地淫昏相繼夜郎自大其
召寇也有由來矣天庸獨眷吳越哉

吳程軍功

南唐永安軍留後查文徽引兵攻福州

漢乾祐三年南唐保大八年

文徽貪

功以劍州刺史陳誨率水軍下閩江自以步騎繼之

特有告文徽吳

越戍兵已棄城去者

會大雨水漲誨一夕行七百里抵城下始知有異

文徽勒步騎亦至知威武軍吳程詐迎之而伏兵其後生

擒文徽斬馘萬計獨誨全軍歸劍州及保大

南唐年號

十四年

陳誨獨敗福州兵於台江有吳程之韜畧雖查文徽挾陳

誨借至可以奏功無吳程之守禦一陳誨足以敗福州兵

賢者之有益於人國也蓋若是哉

宋

福軍譁變

靖康元年

欽宗
年號

八月福州調發防兵資糧不繼殺知州事

柳廷俊時變生倉猝合城震駭提刑陳桷偕郡紳李茁入亂軍中諭以禍福賊氣沮激桷奏帥臣自斃詭從其請閒道馳奏以前疏不實乞待罪且廷議以桷知權變釋之叛兵既調發乃追殺首惡二十餘人法紀以伸焉處變生倉猝之時非有識力具足之人必不能旋轉如意桷何其從容戡定不動聲色乎

平葉濃

高宗建炎二年六月建州卒葉濃等作亂初建州軍校張

員既誅

員作亂此
年五月誅

餘黨復懷反側會朝廷調威果卒三千人

入衛未行軍士葉濃等相與謀互殺妻子盜本州觀察使

印突城而出進犯福州甲戌陷焉掠故相衛國公余深家

今名其地
爲丞相坑

欲縱火焚城衆懼獨提刑李莛登城諭之留十

餘日乃去七月復還建州言者論莛專務招安不能平寇

以吏部郎林杞代之遣統制張俊兩浙提刑趙哲將兵討

濃十月大破濃於建州城下哲招濃降後至俊軍中復謀

爲變遂伏誅自唐中葉以後軍變迭紀於史大抵因馭軍

者不得其道健兒益張橫而不可制宋雖首罷藩鎮而此

風未衰焉葉濃以一軍士連陷上下游諸縣幸而張俊爲時名將一舉誅夷否則燎原之火何堪設想哉

招安海寇

紹興六年

高宗年號

海賊鄭慶鄭廣肆掠沿海大爲邊民之患

詔福建安撫張致遠發水軍討之旋以慶廣二人願降許其招撫且補二人保義郎閩地濱海海寇爲患自昔已然然招撫亦正不易無以創之於先彼豈弭首帖服哉審機而行是在夫疆吏之知彼知此者

饑民嘯聚

慶元初福州荐饑民相聚爲盜知州陳居仁擊平之

府尹降元

恭帝德祐二年閏五月丞相陳宜中等立益王昀於福州改爲福安府册淑妃楊氏爲太后改元景炎文天祥自鎮江歸以爲右丞相兼樞密十一月福建制置使王積翁以八郡圖籍獻元帝走入海元兵至閩府尹王剛中以福安降伊古外寇之得入堂室必有內奸以導之元人來從塞外不有爲虎作倂教猱升木之桀魁烏能遂有中原富貴所在非我族類且甘心爲臣僕神州溷濁誰實階之世有

有心人安能無痛恨夫已氏也乎

元

平章招賊

福州行省平章普化帖木兒與廉訪司構兵相攻會泉州萬戶賽甫丁阿迷里丁據城叛帖木兒賂阿迷里丁所部伊巴爾希兵進省爲已援至興化敗回獨賽甫丁入據福州旋阿迷里丁爲泉州阿巫那所殺於是福建行省平章燕只不花會援軍攻賽甫丁敗之賽甫丁航海走遂復福州閱牆不已而復召外兵焉彼民何辜顧使之一再受禍

哉人之無良蓋莫有甚於普化帖木兒者也

友定忠元

陳友定者閩之福清人也爲明溪驛卒喜談兵汀州判蔡公安募士乘城防寇友定應募公安奇焉從討有功尤以敗陳友諒將鄧克明之役爲大朝廷卽以守汀明軍胡深取閩復爲友定所殺乃命爲福建行省平章歲貢大都由海道行未嘗失臣節獨漳州路總管羅良貽書責其擅威福友定怒攻之良戰死友定遂並據漳明太祖吳元年十月命胡美湯和等水陸分道取福州友定自以福州守禦

已密慮上游諸郡爲胡美所乘

胡美入杉關
畧上游諸郡

乃率精銳守延

平而以賴正孫等守福州會東北風起湯和等不數日抵
五虎門遣人入城招諭平章曲出殺之嬰城固守參政袁
仁密納欸焉城陷曲出遁參政尹克仁宣政使朶耳不花
行省郎中柏帖穆爾皆不屈死次年正月延平亦克執友
定送京師明祖親詰殺將拒守之故友定慷慨曰死耳毋
多談遂並其子棄市明太祖仁義之師所至望風歸附友
定始終不屈蓋自以驛卒之賤受元人特達知遇不得不
竭力圖報雖未審天命要異夫首鼠兩端者

明

海寇陸梁

景帝景泰初海賊聚衆千餘寇福州海上朝廷以指揮王勝提督海道事勝以計招降之然未幾復跳梁閩安鎮出海有二港元時用鐵索橫港口以禦海寇歲久廢沒成化壬辰閒張瑄復之時有魏懷三者與其黨林壽亦合山海羣盜攻閩安鎮城瑄擒之自是弭平大海汪洋我不有扼要之策示彼以難犯雖一時降附不可恃也當時水戰之道猶未發達故張瑄修復鐵索卽足以成大功然亦可見

備之不可以已也

衛軍譁變

福州府三衛軍卒月餉人給八斗正德十二年布政司伍符以糴賤裁之有秦貴葉元保者富而黠倡率衆人執符子及婿將殺之城中洵懼致仕都御史林廷玉偕副使高文達角巾造壘諭之衆悅服乃散軍士因缺餉譁歷代恆有然使有威望大臣素爲衆所推服者於其方萌從而諭解之則戡定特一舉手之勞耳操之過激與優容失道皆足釀成燎原有闔外之寄者其慎之哉

防倭原始

明太祖既有福建而防倭之策旋起

三年六月五年八月倭連寇福建

以江夏

侯周德興督八閩軍事移置各衛所當要害增設巡檢司分隸於諸衛無事各衛疆場有事則并力勦捕然日久則防懈成祖永樂八年倭復入寇福州

宣德中鄧監鑿新港正德時憂倭害議塞仍沮

東瀛

特一水之隔耳乘瑕蹈隙不難反客以爲主倭患之所由劇者此也

朱統靖內奸

李光頭者閩人也與歙人許棟皆以罪繫獄嘉靖十九年

同逸於海島招集亡命勾引倭寇時承平久海防廢弛內奸從而附焉以故剽掠輒得志都御史朱紘審外寇由於內奸先截捕通番者然後出兵擊之光頭等凡九十六人皆就擒餘黨遁閩寇以盡禍乃少息云林文忠之禦英人議者謂不能效朱紘之捕內奸致功敗於垂成然古今異勢固不能以此而律彼特紘之智畧則實有可師云

嘉靖倭患

朱紘之誅內奸也倭失其奧援遂悉數遁去然海道漸熟二十九年先犯長樂縣旋三寇福甯州最後知州鐘一元

拒戰死

三十五年十二月

兩寇泉州指揮童乾震戰死

三十五年正月

一寇興

化由莆田寇福清海口鎮千總戴洪陣亡楊茂力戰死

三十四年

一年

濱海各郡縣頻遭蹂躪及三十六年三月遂由甯德

達連江逼省垣焚四郊火光燭城中死者枕藉南台洪塘

民居成灰燼焉時朝廷特移浙江巡撫阮鶚於福建鶚不

能措一策乃盡庫藏所有並括金帛賂倭倭擁巨贖擄戰

艦沿途焚劫入海三十七年四月由連江踰嶺復犯會垣

轉犯沿海諸縣陷福清知縣葉宗文死之巡撫王洵

阮鶚已被逮

遣將督舟師擊敗之三十八年四月復由福甯度古嶺達

福州城中戒嚴大掠近郊尋從洪塘江出洋餘賊抵福清
又肆焚掠焉三十九年三月復寇福州新撫劉燾精騎射
家畜健兒俱習戰乃親率兵開城門出擊之賊憚其威名
遁去燾發三矢斃其三酋遂大潰然會垣漸安而下游諸
縣又遭其禍且陷泉州城焉四十年四月復抵福州四十
一年四月復大舉犯閩巡撫游震上章告急詔浙督胡宗
憲檄戚繼光率兵赴之計自嘉靖二十八年後閩無歲不
有倭患省垣且六受兵焉自繼光出而倭乃不能復肆矣
閩人受戚公之恩亦大矣哉

戚繼光平倭

倭寇之深入重地。由內奸導之。凡民具有天良。何以甘爲虎俵。則上實有以迫之。閩中典兵者。騷擾最劇。故民有賊梳兵鎗之謠。繼光入境。秋毫不犯。民大悅。輸餉不絕於道。其滅倭之本。已立。嘉靖四十一年八月朔。至福甯時。倭據橫嶼。甯德。漳灣。一材去。橫嶼最近爲倭耳。目繼光首下。脅從肆赦之令。倭遣奸民僞降。繼光推誠相待。轉以實告。由是大破倭兵。俘馘殆盡。九月兵至福清。復連破牛田諸巢。追至莆田。林墩。盡殲之。十月倭續寇福清。繼光奉檄回浙。

自興化班師至福清又大覲之時倭又謀覬覦省會及是乃止倭聞繼光已旋乘隙又陷上下游諸縣且屠興化城四十二年三月繼光至自浙克復興化及壽寧政和二縣十一月倭寇莆田晉江福甯連江惠安等澳遂圍仙遊縣十二月繼光擊敗之解其圍四十三年繼光復敗之於同安漳浦其自浙江犯福寧者亦爲參將李超所敗穆宗隆慶元年繼光又遣兵敗倭於南澳崇武澳倭自是剪艾殆盡而福州乃得以安閩遭倭患前後將二十年自繼光督師不及五年告肅清焉其將略殆天授乎然考光之用兵

以愛民爲本古今未有兵不愛民而能成滅賊之功者後之將帥其首加意於此哉

朱璣死賊

指揮朱璣破倭寇屢有功鎮守烽火門隆慶二年粵海巨寇曾一本突犯福州璣率水師乘勝追之中礮死同死者有指揮王豪亦破倭有功之人同時死難兵氣一挫焉

馬森定亂

閩省自嘉靖之世倭夷肆逆防軍環集而譁變亦時起有郭天養者衛卒也以巡撫游震斬其隊長遂鼓衆圍副使

汪道昆於教場森時以戶部侍郎在籍出諭解之時嘉靖四十一年三月也及十月天養以索糧不遂又變森復散之次年譚綸代震撫閩以健兒千人自衛乃數天養之罪斬之於轅門及隆慶時森以尙書致仕又值衛卒爲變森復諭解之亦皆撲滅軍符不握而馭悍兵驕卒若父母之於子惟其所命而不敢或違焉固明代在籍人員之夙有威望亦可見森之有足以服人者也

鄧三煽亂

神宗萬曆中福州比歲不登二十二年五月饑民以東門

李章家倉故饒其價乃盡掠其米焚其倉巡撫許孚遠遣將古應科捕其爲首者被逸去奸民鄧三因鼓衆焚應科屋雖爲營卒所擒而城內外聞風相煽者復搶掠四起賴孚遠從容禦止首先發倉平糶始晏然尋新撫金學曾來乃定鄧三罪棄之市大亂之興恆自饑饉民無以食雖慈母不能得之於赤子籌國計者勿張皇於改紀政事而忽根本之所在乎

聿鍵帝閩

國朝順治二年 大兵下江南福王降太祖八世孫聿鍵

行至杭鄭鴻逵等挾之入閩鄭芝龍張肯堂黃道周奉王
監國閏六月丁未稱帝改元隆武以福州爲天興府拜鴻
逵等官有差然政歸鄭氏聿鍵不能有爲 大兵既定江
西卽遣御史黃熙允入閩招撫熙允舊與芝龍同里遂密
使人通款以餉絀不能出師辭道周乃自請募兵江西遠
近頗響應十二月至婺源兵潰不屈死時聿鍵已移駐建
甯次年遣將分道出兵不果行旋移駐延平始聿鍵決意
由汀州入贛與湖南爲犄角芝龍阻之及 大兵連破江
西浙江諸郡閩中大震芝龍撤仙霞關兵回安平鎮託言

海寇入犯八月我征南大將軍貝勒博洛兵克建甯鴻達
駐營關外徒跣走浦城大兵及仙霞嶺關門無一守者
遂長驅入克延平聿鏗奔汀州總兵李成棟兵奄至從官
奔散聿鏗及其妃皆就執九月博洛等克福州遣兵分徇
下游諸郡縣皆下之閩地悉平日月出矣而燭火不容不
息明之諸臣閒關圖延宗祀奉其故王若黃張數公其忠
義良可嘉尙惜夫同寅無協恭之德初志不遂俾其王弗
令其終則可悲也已

國朝

鄭氏始起

鄭成功芝龍子也。大兵下福州，芝龍將降，成功諫不聽，乃獨與其叔鴻逵等收散卒出屯南澳，頻窺福州。已又據廈門而有之。順治十一年，芝龍以書諭令歸降，不從。十三年六月，遂圍福州。時大軍悉赴漳州，省城空虛，閩撫宜永貴方病，瘵力疾登陴，出原任布政周亮工於獄，亮工審察形勢，謂南角一面賊防稍疏，可以伏兵破之。永貴然其策，開水部門出擊之，成功退保閩安鎮羅星塔。十四年三月，成功將何傳等犯侯官，傳等尋降。十月，總督李率泰遣

兵復閩安鎮十六年九月成功師大敗於江南逃回廈門
十七年五月將軍達素等會兵進剿廈門不克 朝命靖
南王耿繼茂由廣東移鎮福建又以都統宗室羅托爲安
南將軍督剿鄭成功明社已屋父已臣服獨奮其乃心朱
氏之氣百折不回以海上一隅之地當中國全力其不順
天命可責其忠於所事亦可憐也

成功有臺灣

順治十八年四月成功攻據臺灣赤嵌城八月進攻王城
荷蘭度不敵引去成功乃以赤嵌城爲天興府設天興萬

年二縣 朝命誅其父芝龍等十一人康熙元年五月成
功卒於臺灣六月繼茂率泰遣使至廈門招降成功子經
經不受命入臺嗣位請稱臣入貢如朝鮮例弗許十三年
五月經遂率兵渡海駐廈門屢圖內犯十九年正月經將
守海壇朱天貴者敗走銅山尋來降劉國軒經將之最饒策者走廈
門陳狀經懼急率眷屬登舟歸臺國軒挽之不能尋亦遁
回澎湖二十年正月經卒長子克壘又爲其下所弑幼子
克挾立二十二年六月靖海將軍施琅大破劉國軒於澎
湖克挾所恃者國軒也國軒走入臺灣兵民洵無戰志

乃倡議投誠克懷從之與遂入臺灣以克懷歸京師總督姚啓聖發蹤指示之功爲多云臺灣雖孤懸海外然在閩之東方一日未靖海上一日不安而福州亦承其弊鄭氏奄有全島三世相襲明代遺臣故老依以完忠者衆故能久抗王師自入版圖閩海不波而東南諸省俱收其利施姚二公之功洵大矣哉

靖忠反覆

耿精忠者靖南王繼茂子也嗣其父王福建撤藩議起平西王吳三桂先反於雲南精忠陰與結福建總督

官制本如此

范

承謨知之而未發康熙十三年正月望承謨稱疾不參謁
精忠詭請議事巡撫劉秉政陰附精忠促之行及門士皆
擐甲露刃知有變挺身罵賊府縣數人皆不屈死衆亂賊
黨大呼剪辮秉政先剪餘從之於是囚承謨自稱總統兵
馬上將軍發兵反分遣其黨曾養性等寇浙江江西諸郡
上遣官賚敕赴閩招撫留不遣復命其弟聚忠賚勅往
衢州拒不納乃勅康親王傑書貝子傅喇塔赴浙進討連
破曾養性等然養性與馬九玉亦靖南將仍各拒所在與浙督
李之芳相持會精忠與鄭經忽相惡襲汀邵諸府大懼急

撤江浙之兵回援大軍乘之首尾不相顧諸僞官各有歸
正之思其媵臣徐文耀密遣馬九玉約大軍入關縛精忠
以降康親王許之九月大軍既收復建甯延平諸屬縣僞
官張瑞午等將乘閒內亂爲所覺殺之慮承謨白其實並
殺承謨擬浮海奔舟山不果行是月二十七日 大兵至
洪塘江精忠率諸僞官肉袒出迎自陳爲范承謨激迫請
討海寇自贖王承制以便宜赦之十月王遂偕寧海將軍
傅喇塔平南將軍賚塔等入福州精忠降後意常快快復
爲諸弟及部曲告以陰謀不軌二十一年俘至京師磔於

市忠義遺臣奉孱主以崎嶇賸水殘山之間無足責也若乃歸命興朝剖符兩世一旦慮徹侯之無實覬帝制以自爲其罪已不可勝誅 聖朝寬大優予自新而又首鼠兩端焉是狗彘不食其餘矣自逆耿誅夷福州晏然二百年乃有光緒甲申之役

法人犯閩

法國以越南諒山之戰

中法失和議償賠款未定忽又開仗於諒山

謂中國不遵條約

廣派戰艦駛進中國海口既佔據臺灣基隆復於甲申閏五月三十日突以七艘進泊閩垣之馬尾時督閩者爲香

山何環閩海口岸天險礮臺森列守臺見法艘將入電請
何督進止何督以和議未定憚先行開仗允其入險要一
失寇在門庭省垣貴富相率遷徙當事恐匪人乘機竊發
飭按鄉辦聯甲晝夜梭巡又設團練局四局各招百人奏
保故山西布政使林壽圖爲團練大臣人心藉以少安焉

馬江燬師

法艦自閏五月二十日泊馬江後人心大震先是廷議以
督撫不知兵撫軍爲張兆棟命侍講學士張佩綸會辦軍務於五月
到閩至是專駐馬江調集兵船十一艘曰揚武永保琛航

濟安飛雲振威福星福勝建勝伏波藝新以壯聲勢法則
兵艦九艘別有新式水雷船兩艘相持月餘日和戰之議
未決我軍漸懈七月初一日法人忽遞戰書於揚武管駕
張成成達之船政大臣何如璋秘不發初二日各國領事
商人均下船衆知必戰入請亟備佩綸斥之出嗣船政學
堂洋文教習法人邁達告學生魏瀚曰明日開仗瀚不敢
白越日辰見法船升火起旋急馳告而法已照會未刻開
仗乃遣瀚向其帥孤拔以詰朝請比登敵舟而礮已發我
船猶未起旋裝藥敵連發巨礮揚武首受其禍福星振威

福勝建勝殊死戰無如陣勢旣失預備又後皆相繼碎毀
餘船放火自焚惟伏波藝新二艘逃回自鑿沈林浦江計
失輪船九龍槽船十餘小船無數陸勇盡潰法則僅沈魚
雷船一而已是役也陣亡管駕以福州人爲多若林森林
葉琛陳英許壽山尤爲慘烈水手死者無慮數千人水軍
旣覆法人乃專轟燬船政局礮聲徹午夜而後已時將軍
穆圖善駐師長門防其逸出嚴飭閩安南北岸各礮臺互
相犄角初五日法兵攻閩安礮臺及火藥房我師潰敵皆
登岸將大礮毀壞投水而去初六日南北岸礮臺復被夷

爲平地乃萃全力攻金牌長門礮臺初八九兩日夜礮聲不絕卒被闖出法人既出口會垣人心始安張佩綸何如璋奏報不實於是閩省京官請密派公正不阿之大臣查辦疏入并督撫速問罷黜有差先是廷議以臺灣重地命劉銘傳爲福建巡撫移駐其間至此乃以大學士左宗棠督辦福建軍務浙撫楊昌濬爲閩浙督兼管福建巡撫會辦軍務又起故陝甘督楊岳斌率馬隊入閩皆於是年秋冬先後到福州時閩事粗定相與籌辦浙臺防務岳斌渡臺後旋告病歸宗棠於次年乙酉七月亦卒於軍

兵事錄二

涉及兵事

福州非用兵之區然三面距海海鳥肆飛匪今斯
今且上下游諸府皆若股肱警報朝聞援兵夕發
自臺灣入版圖地無土著不逞之民易相倡亂三
百年間爲臺變而福州不能已於枕戈衷甲者尤
數見焉彙而誌之是曰涉及

晉

盧循據島

閩海漢代卽有戰事然樓船所經角逐而已晉安帝隆安
間始有憑島爲寇者孫恩縱橫海上大爲閩浙患而其黨
盧循爲尤劇時劉裕方屢著戰功乃自永嘉追入晉安

元興

二

年大敗其衆循走番禺閩人之患始息

唐

李椅平粵

李椅之爲觀察使也當代宗大歷八年哥舒冕適反報至
閩椅投袂而起卽命將率水師西與鍾陵軍會以援番禺
推誠誓衆士皆奮勇遂擒首逆誅之五嶺以定焉

宋

莆田煽亂

林居裔者莆田游洋鎮民也太宗太平興國三年擁衆十餘萬據游洋及百丈二鎮稱西平王邑涵江人陳應功自請討賊戰死勢益張遂進攻泉州城中兵裁三千危甚監軍何承矩等堅守待援權福州留後楊克讓得莆田令黃禹錫請兵信禹錫遣其子觀同
莆人陳靖上請親率福州屯兵赴之賊解圍去泉州兵馬都監王繼升潛以精騎二百追擒其魁送闕下餘黨悉平

彭孫平盜

廖恩久寇閩中熙寧十年詔除左藏庫彭孫福建路捉殺賊盜恩奔信州孫招降之

汝爲負嶠

汝爲范姓建州民也其諸父鄉人名曰黑龍黑虎皆事盜販善鬪群不逞附焉官不能捕建陽人江鈿

儒林

老而有

謀郡使權甌寧令圖之皆就誅其徒因依汝爲作亂汝爲粗知書勢張甚屢討不克已而餌以官降焉未幾復叛乃詔參政孟庾爲福建江西荆湖宣撫使神武左軍都統制

韓世忠副之時建炎四年也次年正月世忠進圍建州當
世忠初至福州衆以賊銳欲留以俟元夕世忠笑曰吾元
夕還見公矣攻六日拔之汝爲自焚死餘黨悉平

安撫勦寇

海寇陳小三以艘六十擾福州界安撫使陳弼給鄭廣兵
三百期三日破賊求濟師不許屬兩日大風賊舟不能進
退廣盡擒以獻因請曰以一擊十公料三日何也弼曰第
從吾令無問所由其料敵決勝多類此積四年凡平賊百
七十部時爲紹興十五年

元

長泰靖亂

至元二十六年春正月畚民邱大老等寇長泰縣福州達魯花赤脫歡同漳州總管高傑討平之

漳州討盜

二十八年漳州盜歐狗作亂福建行省平章徹里討之

王善寇福州

順帝至正十三年正月朔江西徐壽輝將王善與康壽四江二蠻等由福寧連陷羅源連江進犯福州帥憲兩府急

以禮聘漳州羅良

良漳州新翼萬戶

良募兵千人沿海進直抵城下

與賊死戰既入城夜復引敢死士出賊不意攻其營良每擊賊皆以藥弩挫敵遠近畏之至是賊見弩驚曰此漳州羅萬戶軍也各駭散善退屯連江縣發病死江二蠻殮而焚之方善之陷羅源也連江巡檢劉濬率兵赴援拒之辰山戰已頻捷有訛傳福州陷者衆乃潰濬遂中箭墜馬次子健下馬掖之濬不屈死健亦以死拒賊善義之釋不殺使斂濬屍歸

元史劉濬傳則云健詐爲工商流丐入賊中夜半發火大譟禽善并手斬害父者事聞追贈濬官授健古田尹

傳曰先

聲足以奪人王善連陷諸縣勢已難遏卒折於羅良良不

外千人之兵耳而摧劇寇如拉枯焉方是時豈無大將哉而不能禁賊功乃出於萬戶求虎豹以壯藜藿不採之威可勿念哉

仙遊平賊

至正十四年夏安溪縣盜李大南安縣盜呂光甫聚衆爲亂秋八月遣其黨劉廣仁等陷仙遊縣萬戶成三寶以福州軍與同知官保率兵擊走之

明

丁瑄戰功

沙縣鄧茂七名雲素建昌人因殺人拒捕改名徙居焉時福建多礦盜凡村聚各置望樓編民爲甲擇豪者總之茂七爲甲長益役虐鄉里民訴於縣逮不至下巡檢追攝遂殺巡檢及知縣於英宗正統十三年二月發兵反稱王設官聚衆數萬連寇汀州邵武延平各府屬詔巡按丁瑄自福州馳詣延平招撫瑄旣至茂七殺使者不受命尋詔左都督劉棗等帥兵討之不克於是復命寧陽侯陳懋佩征南將軍印督諸將出師十四年二月茂七復寇延平瑄及指揮劉福擊斬之函首送京師而陳懋與保定伯梁瑤按

察副使邵宏譽等又分路捕殺餘賊逾年悉平焉

張瑄平賊

成化八年福安賊葉旺葉椿作亂巡撫福建右副都御史張瑄討平之

聶琪受檄

按察司僉事聶琪於嘉靖三年受巡按御史檄召督諸縣兵大破饒平及汀州賊之犯永春縣者是役也連戰皆捷斬百六人餘俘擒無漏官兵惟義民陳良一人戰死

余爌戰功

嘉靖二十六年冬安溪縣賊陳日輝作亂逼同安按察司僉事余燿適分巡泉州境遣將吏捕賊賊回據安溪煽謀知巢穴險易分兵掩擊之擒日輝餘黨悉平

周宋平

萬歷十六年冬莆田縣民柯守岳等以鬼道惑衆作亂剽掠及永福縣之五都巡撫周宋遣兵討平之

朱欽相撫寇

海寇鄭

之龍 南安縣石井人

頻犯沿海諸縣天啟六年秋巡撫朱欽

相遣巡海道蔡善繼

善繼嘗有恩於芝龍

招撫之芝龍已降尋復叛去

新撫朱一馮檄都司洪先春擊之先春大敗

荷蘭肆擾

熹宗天啟中奸民潘秀導荷蘭停舶閩海挾互市以肆搶掠東城澎湖據之西擾及福州閩撫以驍將王夢熊等相機率兵三路齊進破之又計擒其帥福州迺安外人之深入中國皆有爲之俚者種族之辨漠然不明振古如茲良可歎矣

汀州會勦

崇禎四年秋廣東平遠賊鍾凌秀等犯汀州府巡撫熊文

燦提兵入汀州會廣東江西兩院共勦之斷凌秀右臂銅諸獄其弟復秀潰圍出然汀州得粗安焉

劉香寇閩

海寇劉香者本海澄人連船由粵犯閩洋巡撫沈猶龍選將截勦大捷於白尾洋連江令于可舉射殲其酋海上用兵其難於陸路者倍連江令文士也而能手射劇寇其戰功亦足尙矣

鄭芝龍滅劉

劉香爲盜於閩海連犯下游諸縣遂及連江巡撫鄒維璉

遣降豪鄭芝龍於崇禎五年夏敗其衆八年又命芝龍至
廣東討劉香滅之

鄒維璉戰功

崇禎六年秋荷蘭陷廈門犯閩口鄭芝龍不受閩撫鄒維
璉之檄而紅夷操大艘焚我戰艦官軍失利維璉急回福
州洋追至銅山苦戰八晝夜大敗之擒其酋數十因疏劾
芝龍芝龍方有內援上先入其言論將士功而議璉罪璉
解組歸卒芝龍狡黠擅橫海上朝廷多得賄賂而優容之
益招其輕侮斯役之功罪倒置懈將士之心海上所以多

事也

援汀不克

唐王之立於閩也廣東賊蕭聲陳舟等犯汀州府福建巡撫張肯堂遣兵援之把總林深鄭雄戰死識者早知其不振矣

國朝

陳錦戰績

順治五年秋閩浙總督陳錦與靖南將軍陳泰等分兵復長樂連江二縣遂破興化府故明大學士朱繼祚等死之

進攻泉州復同安縣六年春又遣總兵張應夢等復閩清
羅源永福諸縣秋九月江西賊陷延平府又以副將馬夢
龍率兵勦之復其城斬新建王朱由棧等

會師援漳

順治九年秋八月都統金礪師至福州會總督劉清泰統
滿漢兵援漳州鄭成功解漳州圍去

率泰兵略

總督李率泰於順治十四年九月遣兵勦降永春陷城賊
林忠十月克復閩安鎮十五年遣舟師圍降賊復叛陳斌

盧謙等收復羅星塔斬二人於市康熙元年又會靖南王耿繼茂擊走海寇之犯定海小埕者其冬十月建寧延平邵武山賊俱猖獗復遣兵捕其逆渠斬之

經營臺灣

康熙十七年總督姚啟聖遣子游擊姚儀率兵援海澄

是歲

鄭經遣將劉國軒犯海澄

其秋啟聖自同海澄公黃芳泰遣兵復平和漳

平二縣又同巡撫吳興祚等分路出師復永春德化二縣旋與將軍賚塔都統沃申等大破劉國軒於蜈蚣山復長泰縣十八年連破國軒之師遣人招撫不從十九年二月

啟聖遂同將軍提督攻玉洲澳國軒走廈門鄭經歸臺灣
偽總兵蘇堪以海澄降又進克廈門金牌國軒復走澎湖
二十年秋 朝命施琅爲水師提督靖海將軍印與啟
聖會征臺灣二十一年春啟聖率兵出定海以風不利而
還琅奏請獨任討賊督臣留廈濟師啟聖遂專駐廈門二
十二年秋七月臺灣平省垣解嚴者垂四十年乃有朱一
貴之亂

滿保督師

康熙六十年四月臺灣奸民朱一貴作亂五月辛酉朔總

兵歐陽凱等戰不勝皆死之賊遂陷臺灣府時閩浙總督
爲覺羅滿保聞變以廈門控臺灣咽喉宜駐師其間以便
調發乃以巡撫呂猶龍留守省城庚午發福州乙亥至廈
門先是滿保檄南澳總兵藍廷珍會水師提督施世驃尅
期進討及總督至廈世驃已出港兩日矣六月癸卯復安
平鎮癸丑進攻府治克之一貴遁閩六月丙寅就禽械送
京師臺灣平

爽文亂臺

乾隆五十一年冬彰化縣奸民林爽文作亂連陷諸縣知

府以下皆死之五十二年春將軍兼總督常青至臺灣督
勦 朝命兩湖督李侍堯代常春督閩浙駐廈門籌辦軍
需五月福州將軍恒瑞又率兵至臺灣府久未蕨功冬十
月協辦大學士福康安率參贊海蘭察等統兵抵鹿仔港
大破之次年正月獲林爽文送闕伏誅又搜誅餘賊二月
臺灣盡平

殲除海寇

嘉慶二年海寇蔡牽

泉州同安人

猖獗於閩海屢犯臺灣累年不

克浙閩水師提督李長庚大破牽幾獲矣旋中砲隕十一

年夏福州將軍賽冲阿督兵至臺灣勦之十四年秋八月水師提督王得祿邱良功等蹙之於黑水洋率窮投海死其黨朱渥率其衆至定海乞降總督方維甸遣福州知府朱桓往受之於是海寇盡平

戡定臺民

道光六年夏臺灣嘉義二縣閩粵庄民茲事總督孫爾準渡海至臺密授機宜令總兵陳化成等分路搜勦生擒黃斗乃等二十餘人置諸法人心乃安

俘獲張丙

道光十二年閏九月臺灣嘉義縣張丙糾眾倡亂殺知府
呂志恆知縣邵用之巡撫魏元烺權督印馳檄陸路提督
馬濟勝提兵討賊濟勝以二千人往聚咸少之總督程祖
洛在浙江聞變倍道抵廈門調兵方集而濟勝已破賊得
渠魁次年五月俘丙於京師誅之臺灣平

廈門之役

道光二十一年秋七月英人復犯廈門

英人曾犯廈門閩督邵廷楨擊却之

時顏

伯燾爲閩督以鄧廷楨之不能出洋截擊爲非乃增築礮
臺廣修船礮備多而力分遂水陸皆潰總兵江繼芸等死

之英人反將我大礮轟毀官署伯燾退保同安鄉民陳姓
率抬槍隊五百人抗英師五千大敗之乃棄廈門據鼓浪
嶼不出伯燾以收復奏聞八月又以大艘五入犯副將
林大椿等戰死提督普陀保礮沈其大船一復退駐鼓浪
嶼降伯燾三品頂戴留任次年以怡良爲閩浙督方英夷
之寇沿海諸省也嘗分股窺伺臺灣不得逞二十二年臺
灣道姚瑩敗之於大安港在淡水廳彰化縣界乃奏籌海防之策舊制臺灣鎮道
得專摺奏事忌者誣其冒功以蜚語上聞二十三年遣怡良渡臺

查辦逮姚瑩達洪阿

臺灣

入都

勦平會匪

咸豐三年粵匪連陷沿江諸省勢張甚各直省土匪咸乘機起應之於是閩之漳泉建邵亦相繼蠢動連陷諸郡縣同安廈門永安沙縣先後失陷時署閩浙督王懿德委派漳州鎮郭仁布鹽道瑞璜帶各標兵會同地方官兜圍旋漳州府城與永春州城又陷幸遊擊饒廷選與署遊擊恩霈等奮勇勦擊分別收復二城匪勢稍斂然上游之永安沙縣下游之同安廈門等縣均淪於賊又另股竄踞興化仙遊縣在京御史晉江陳慶鏞詳奏情形王懿德乃移駐

泉州督率將弁分路援勦尋於十一月先復廈門繼復仙遊餘亦以次肅清次年正月懿德奏閩省營務廢弛上

諭閩省水陸各營除每年赴臺換防外內地存兵尙逾四

萬何至盜賊竊發還當咨請鄰省協勦

時江浙粵皆派水陸會勦

此後著

該撫會同署總督有鳳認真整頓方內地會匪之竊發也其時臺灣土匪亦圍攻府城賊目有林許爲渠魁吳王二姓爲主謀在京御史侯官蔡徵藩詳奏緣由又奏保臺灣在籍前任禮部員外郎鄭用錫等堪辦理團練勸捐事宜報可且諭令王懿德照該御史所奏迅速解散賊黨掩

捕賊蹤無任蔓延旋臺民踴躍捐餉以備軍需知府裕鐸又自出家財助之團練成立地方漸肅清遂於五年冬間獲其僞元帥陳子仲等九名逆首林房王辦等四十四名經臺灣總兵邵連科奏報南北兩路並洋面一律肅清焉

分剿髮匪

閩省會匪於咸豐四年肅清後五年秋復有順昌土匪勾結江西叛寇爲亂未幾亦平定於是閩中軍務漸鬆獨派兵援應江南浙粵而已十年夏江西大股粵匪竄入閩疆邵武光澤失守分陷汀洲圍建寧府下游亦騷動總督王

懿德馳駐延平居中調度然兵力單薄乃飛咨鄰省請援
旋建寧府劉翊宸勦賊大勝建郡解圍提督鍾寶三督兵
收復被陷郡縣凡三月盡平之八年三月江西逆匪多由
鉛山等處分撲浦城崇安陷焉道員趙印川陣亡上游各
屬又復危急王懿德請假慶端署閩督仍移駐延平七月
浦城崇安收復邵武諸處賊勢窮蹙八月懿德銷假卽赴
延平慶端回駐省城九年正月順昌汀州諸賊薙髮投誠
惟連城未復尋亦於二月收復閩省旣平客軍皆凱旋焉
十月慶端補閩督時浙江吃緊福鼎亦爲賊據詔慶端駐

閩浙交界督兵畏葸不敢行十一年秋始奏報福鼎克復
移駐建寧其年十月杭州陷慶端以救援不力革職暫留
同治元年三月慶端抵浦城進勦浙逆接仗失利溫州平
陽會匪闖入福鼎縣北路緊急福州戒嚴六月以廣撫耆
齡爲閩督接統慶端全軍仍駐浦城二年三月以浙江巡
撫左宗棠補授閩督改耆齡福州將軍宗棠在浙督勦派
員管帶浦城閩軍以爲援應三年杭州克復江西新城亦
收復餘賊悉趨閩界竄陷建寧雖旋收復而賊蹤已闖入
將樂縣境復陷寧化縣僞侍王李世賢等股由徽州開化

竄至上饒鉛山逼近崇安浦城閩防緊急巡撫徐宗幹會商宗棠分路防堵八月臬司張運蘭到閩接印後卽出省赴邵武府擇要駐紮十月江西瑞金逆賊敗挫繞竄廣東鎮平大埔等處突入閩境窺伺龍巖直逼漳郡漳屬南靖等縣復有匪起與勾結張運蘭轉戰失利陣亡漳州龍巖失陷汀州所屬皆賊焚殺慘虐徐宗幹派林文察由同安一路進兵左宗棠檄派黃少春劉典等分路勦辦宗幹又檄催由臺內渡之總兵曾玉明統領水師宗棠亦由衢州入閩十二月宗棠師抵浦城署陸路提督林文察已陣亡

幸高連陞一軍急趨同安以保泉厦宗棠先飭四營馳赴延平扼守尋親抵其地調度時粵軍方耀已收復武平等縣進札上杭然下游賊勢尤披猖復上諭蘇撫派兵協勦四年正月宗棠派遣各軍俱獲勝仗二月臬司王德榜等遂大破李世賢收復龍巖諸縣惟漳郡尙爲賊踞且有下海之志幸李鴻章已飭提督郭松林率兵八千人航海至閩宗棠檄會同粵軍由海澄進漳浦以攻漳郡斷其入海兼杜其竄粵四月二十一日遂將漳州府城收復餘匪尙分據旁縣五月高連陞黃小春等次第克復閩境一律肅

清客軍均凱旋原省

甲子平臺

咸豐五年邵連科肅清臺匪後臺地稍安未幾彰化縣轄境會匪復滋事同治元年臺灣道孔昭慈督兵勦捕勇丁譁變縣城失陷總兵曾玉明夙爲臺人信服馳赴勦辦上諭徐宗幹久任臺灣情形熟悉着在省就近調度九月蒼齡任總督添派金廈興化等營弁兵渡臺助勦二年七月署提督吳鴻源革職拏問卽命總兵林文察

本臺人

署理

時臺灣道洪毓琛病故丁日健補授與林文察等會商勦

辦尋於三年六月收復彰化林文察曾玉明內渡勦賊臺之餘匪先後就擒其年冬遂告肅清焉

甲戌臺防

同治甲戌日本以臺灣生番戕琉球難夷事肇釁駛兵艦進瑯嶠入牡丹社示將戰閩海戒嚴 朝命船政大臣侯官沈葆楨爲欽差大臣渡海察辦葆楨嚴密設防旋因廷議小償日人兵費事乃寢

甲申籌援

光緒甲申法人既敗我師於馬江旋出口分擾臺灣浙江

皆閩督所轄地籌兵籌餉福州殆疲於奔命焉其時基隆久陷防臺者爲劉銘傳屢失利 朝議以左宗棠督師守閩穆圖善楊昌濬楊岳斌皆爲幫辦大臣冬岳斌及吳鴻源沈應奎王詩正先後乘閒入臺軍報絡繹越年夏和議成於是移閩撫爲臺撫常鎮海東以銘傳首任之

甲午防海

光緒甲午日本緣朝鮮開釁和議不就言者慮其南下沿海戒嚴福州亦按鄉籌辦聯甲焉明年和成日本入臺臺人拒之累月始定然福州晏然

庚子北援

光緒庚子聯軍犯京師下 詔勤 王閩督許應騫以
曹志忠爲統帶率赦天印等由浙北援屬衢州各邑土匪
蠱起城多失陷天印時爲前隊次第收復有功旋以和議
告成 詔各省勤 王之師仍各歸駐所

耆舊錄一

德行

唐

孝
子 林郇陽

事親以孝聞連帥羅讓禮異之登博通三史科應詔入內侍講授評事終潮州刺史

任
卹 林 浦

唐末避亂海濱凡山巖水涯可維舟處皆鑿井以給行人人名林公井今世新法取水如自來水東洋井之類最利

民生果師其制則浦不得專美於千載矣

五季

忠
孝 唐延嗣 孫淑附

本姓王字季先忠懿諸子也其改姓唐者示弗忘唐非特以王唐音近也幼失怙恃忠懿撫如已出延嗣亦孝事之羣從好馳焉試劍延嗣獨耽書忠懿戲曰吾家措大兒也唐拜忠懿節度忠懿欲官之稱疾不出復上書切言其不可朱溫篡唐進封忠懿閩王延嗣以不帝秦爲諫且陳修政練軍爲國討賊忠懿不能用自是有隱遁志然念鞠育

恩未忍去日言梁不足患在江表吳越忠懿不省顧深以諸鎮僭號爲非忠懿然其說終身不稱帝延翰建國嗣歎曰沐猴而冠吾族其不血食乎隨估舟逸去更名唐延嗣閩亡嗣衰經出郊東望故國一酹大慟而返曰王氏覆滅非天也碭山竊鉢沙陀猾夏亦非天也生計日困惟授徒自給人皆以唐五經呼之孫誠宋嘉祐八年進士爲河陽節度推官

孝
友 劉 甫 子若虛附

以孝友廉介聞於吳越屢徵詣漸卽歸隱武夷子若虛宋

咸平中第進士侍親側雖大暑中夜必正衣冠親有疾不
酒食丁謂欲羅致之不往以屯田郎出知邵武軍卒

宋

孝
睦 林殆庶 諸弟太素等附

字希顏淳化三年進士累官秘閣校理知明州醇懿孝友
弟太素太徽太易太蒙皆貴顯同釜而食子孫彬彬肅睦
稱德門云

孝
悌 劉藻 族子嘉譽世南砥礪珩附

字昭信游羅從彥之門以孝聞賜粟帛名其閭爲孝弟里

嘉譽李侗門人也官樂昌令譽子世南終迪功郎從林之
奇學砥字履之礪字用之並舉神童甲科師事朱子得性
理之傳礪子玠學於黃幹世稱一門道學

孝
子 盧孝孫

元 字玉溪奉親孝養常著書立說爲學者所宗卒葬藤山

元

任
郵 吳海 見明史
隱逸傳

字朝宗號魯生博學負氣節立志不仕明太祖強起元潮
州路總管王翰海與爲知交白衣冠往弔之至己自裁爲

撫其孤稱使知名焉所著有聞過齋文集及命本書禍等

書

詳明史

明

孝子 林興祖

事母以孝聞洪武初從父宦遊遂家潮之海陽以才行舉於朝官終廣西叅政

孝子 蔡梅

母陳氏疾籲天求代割股和粥以進尋愈王假書孝友傳林銘爲之贊

任
俠林觀

字用賓洪武初隱居不仕情厚而直鄉人化之凡有訟者
皆往質其感人之深若此

孝
子羅

泰

子叙釋附

字宗讓母喪貧不能葬語及輒泣既葬而後飲酒食肉性
穎異於書無不篤嗜尤邃於易春秋洪武時閩士以二經
取高第者多出其門應天聘司文衡曰布衣也敢校畿甸
士哉與同邑林誌倡爲詩古文詞有覺非詩集子叙釋永
樂間偕舉於鄉

陸
郵林 誌

字尙默永樂間鄉會皆第一廷試第二其學博究百氏咸
得要領十歲避雨染坊漫閱其簿數日坊遭火失簿錄與
之不爽一字然痛自克治羣居一語一笑不妄發族弟喜
幼孤無依育於異姓取歸撫使成立焉

孝
子 陳叔剛 弟叔紹子煒燿叔紹子焯附

名根以字行祖鉦族人有困賦役鬻產他徙者鉦勸之還
構室廬予之父過嘗葺萬玉潭草亭楊少師士奇爲之記
根宣德初充經筵講官居親喪廬墓哀毀卒弟叔紹名振

以字行亦孝友母病營糞以驗增減姪焯十歲而孤撫之
成立叔紹少無宦情晚官御史台中建白皆爲之倡焯繼
官御史有直聲歷藩臬尤多異績焯弟燿家居侍母母病
喘侍奉唯謹比歿哀毀盡禮叔紹子焯舉人工詩善草書
達官貴人求之不易得云

孝
子 薩 琅

字用讓家貧勤勞養母母病禱天願以身代母絕而復甦
曰我以子孝益壽三十四矣三年乃卒計三十四月也嘗
得遺金待人還之部使欲薦辭不起

孝子 薩琦

字廷圭琅之子也以編修預修仁宗實錄歷禮部侍郎兼詹事卒官琦事親孝爲人耿介仕宦不以家累自隨其先本色目人

雁門詩人薩天錫之裔

琦一變其俗喪葬皆用朱子家禮士

論賢之天順元年賜祭葬建祠西郊廉山

任郵施綸

字克端性慷慨樂善累貲巨萬輒施親故之貧者友人鄭建負人金除夜索逋急綸爲代償郡守唐珣每修舉郡邑廢典或有工役綸必輸助珣數稱之

孝
友 車甯

字子靜正統中以郎中出爲湖廣叅議保靖蠻負險甯單
車造諭邊圉遂安遷廣東叅政廣西左布政峒獠久叛或
議勦甯復單車諭之得編戶六萬八千四百歲徵租五千
七百八十餘石甯多學強設磊落有權略居家尤篤孝友
云

孝
睦 何顯

字繼善性敦朴愷悌事親睦族有聲於時精經學知湖州
府屬邑安吉孝豐民頑曠顯奏改安吉爲州而治其尤軌

法者一方以安胡銓所建書院祭田在遂安久爲僧寺產
顯釐而歸之書院

孝
義 鄭伯和

字節之天性至孝嫡母林撫之有恩忌日哀慕異常年逾
六十祭猶泣下親故貧者量力周給而意皆眞摯鄉人感
其孝義焉

友
睦 林 登

字世集知陽江縣陞主事推己田宅以贍兄弟囊無餘貲
焉

孝友 鄭汝信

天性肫篤事繼母如所生無孤弟甚友愛年九十餘尙強
健人問頤養之術曰必承龍虎吾所不知少愚寡欲庶幾
有之

孝子 高瑤

明倫
有節

字廷堅景泰丙子鄉薦性剛直少負氣節至老彌甚蚤孤
事母盡孝成化初詣闕陳十事首以復景帝廟號盡親親
之恩旋知番禺奏罷貢獻宦官韋春不法瑤籍其資中貴
誣奏逮戍永州民遮道泣送賜環後家居二十年不異寒

素著有松塢集

詳明史
列傳

孝莊思正

號樂間叟邑諸生年十五割股愈父疾父歿哀毀不欲生以嚴肅治家以正道型俗有以急告者不惜傾囊以贖其意精醫術年八十餘猶手錄古人忠孝節義以教子孫成化間學使奏旌其閭大書孝義以表焉思正子姓紹書香者十數世文行孝睦亦相續不衰

友睦李廷儀

子源附

字鳴鳳爲定海令民戴若父母滿秩遷判順天外戚奪民

田儀判以田歸民坐謫同知六安州屬邑霍山饑儀散賑全活甚衆擢貳南安岩郡也賊阻山谷時出剽掠儀募能走險者帥以進討俘斬甚衆降渠魁督府攘其功恥自白引疾歸內行脛摯少乳於嫂母事之嫂歿哀慟異常子源官通判有詩名仍世友睦衆稱之

任俠高文達

字思德戶部主事請告家居起歷員外郎旋乞休吏部上其賢擢浙江副使世饒于財然好施與歸里荷笠灌園客有造廬者問高副使安在及入冠帶出灌園人也與都御

史林廷玉兩平閩卒之亂嘉靖末詔立祠與廷玉同祀

忠 許天錫 明史

有傳

字啟衷選庶吉士思親成疾陳情乞養還朝改給事中有
氣節與何天衢倪天明稱三天正德乙丑使安南正朝禮
却贖金交人爲建郤金亭歸見劉瑾專橫條上其罪夜宿
朝房瑾遣人縊殺之謚文穆 詳明史

列傳

孝 鄭餘慶

睦

字從善

又作崇善

少孤奉母至孝睦族屬厚姻黨爲定海令勞

心撫字嘉靖倭亂繕修守備境內獲全又建閘溉民田修

學造士逢歲饑不待命發倉且陳救荒十事以勞卒於官
慶少時大母欲多分先業與其諸父兄弟慶請於母承志
弗違舅氏以屋售既予直百金矣母色不怡慶卽以券還
舅士大夫義之私謚孝恭

孝
義 袁宗耀

字世明舉於鄉以母病不隨計官教諭年四十餘未有子
妻爲置妾耀以年暮遣還後妻舉一子喜曰吾向憂嗣續
今有子歸老決矣遷開封不赴家居敦尙行誼嘗分產讓
其庶弟

孝
睦林燧

字世成幼孤母徐氏督之嚴朝夕溫清命之去乃去年五十餘猶孺慕母或色不怡跪伏問故愉而後起有美田宅同堂兄以礪瘠易之慨然無吝里有爭訟或兄弟不睦惟燧言是聽卒年八十五里黨皆流涕

孝
子林森

字起新十六歲負父骸還里

父澤爲糧長運米至京姻友黃某額短期迫澤先以其米墊之迨兌收澤米而黃某

遭誤森匍匐赴救父已罹刑裹骨歸海船遇風欲搜骨投之水森仰天一呼大風頓息穩抵淘江故里葬焉

奉母孝嘗曰吾無以

慰母惟當作好官耳後舉賢良方正知縣縣邑有糧長常

例亟革之恤困窮抑豪右定圖均役吏胥束手調象山行
李蕭然民釀金爲贖不受以母老告歸卒里人謚以孝義

孝友 林 堪

字尙乾外溫內肅性至孝大母許治家嚴堪侍竟日未敢
移寸趾奉父母承顏順志有一弟父母愛之弟子一而堪
子三堪體親意以己業均焉舉於鄉嘗分校南關力却關

節終宣化令

國朝侯官林堪居鳳岡任定南令與齊名

友 陸 林 秋

字貞義文安公瀚孫性孝友好施兄熾終於賓州吏目秋

萬里歸其喪婚嫁其子女晚鬻所居寓約自守官至靖江
長史有廉聲

忠
孝楊一謨

字世文由進士歷官貴州叅議乞養歸晨昏問侍孺慕不
衰親歿以哀毀卒雍正六年祀忠孝祠

孝
子鄭靜夫 鄒天挺附

少孤嘉靖間倭寇入境靜夫棄二子挈木主負母避山中
遇賊索金見空囊欲殺其母靜夫泣告母老且病殺我足
矣賊斷其右臂木主墮猶以左肱衛母族人收葬之時又

有鄭天挺者母喪在殯倭至天挺守柩不去賊索金拜且哭曰家貧安得金所不去者母柩耳賊殺之併焚其母柩

義 林

煜

原名華
旁避諱

有醇行著微辭什伍爲卷共二十有四成一家言有友人嘗寄煜珠葛倭亂友歿於難煜召其子還之人咸服其篤誼

任 陳伯亮 子諱附

生平不食言家積粟有糴者誤遺金急追還之嘉靖間倭掠郊野亮移入城買宅後屋主訟官求增價官不直之欲

罪其人亮增之直而請免之曰當日吾急避亂多取吾金不悔也官甚重之子謹字德言嘉靖間狀元及第徐階爲考官察謹所爲自朝謁讀書外不輕交接妄取與益器重之歷中允丁艱歸營丁與家人鬪謹要絰出視誤爲槌傷病月餘卒著有內制集

友 王夢麟

字維振父子聰遺四弟貧且穉夢麟舌耕哺之讓宅諸弟躬就敝祠以居舉鄉試官桂林通判

孝 林貞勝

字益甫官都城廂使孝謹有大節父疾顛天請代母患眼
親舐其鬢爲伯父後生事死葬無異所生溥著設漿於門
歲祲設粥於道凡津梁道路之傾圯者靡不修葺博洽能
詩文著有益甫集

孝
子陳樂

字九成父得奇疾樂晝夜不解帶渴甚含水啣之父竟瘳
鄉人咸推爲篤孝舉鄉試官司務病無帳以席禦風然不
言貧也

睦
卸董世道

字克濟少貧節縮治生久漸饒給與兒子中分田宅凡族姓不能婚葬者周之居瀕海屢燬於倭捐貲城其地立平糶法春夏出粟至冬收穫率免其息見流殍輒爲收葬王叅政應鍾傳其事

友陸林宅賢

邑諸生事父母孝家貧教授里中兄有狂疾家人幽閉之賢輒出兄共飲食兄食已乃去生平無怒容人有非理賢見之色漸莊鄉人輒訾曰汝見怒於林君足恥也

孝子鄭雲鎬

字周卿爲伯父坦後事嗣母鄧氏孝謹無異所生歿猶孺
慕不衰生父卒上書學使請終喪弗許舉鄉薦守連靖二
州有循聲終成都知府

任董廷欽

字仲恭公車抵徐州郡人林孝廉偕春病革林族多大估
附錮京師數千金其從者謀分其金去欽急請於官封識
囊篋并經紀其喪歸閩遂不及試歷任郡邑多惠績牧欽
州籌邊弭變民立祠分茅嶺

孝林一鷺

字汝周父道政精春秋三傳一簞從父授經家貧爲塾師以供菽水家門之內彬彬禮教直指周昌旌其門曰義方仁壽晚歲制行彌篤著儒碩德爲鄉閭達尊者又十餘年

孝子朱應冬

性至孝每出必告父所往近則爲父治一日糧遠必數日俱備歸則與父同榻抱父足而眠父患瘡疾割股肉裹以他藥敷之少間復發泣曰必我行誼有虧累父至此吮瘡三日遂愈司理周之夔爲作朱孝子傳

純孝許希賢

字世昌兩居親喪哀毀骨立既葬廬墓二十八年虎不爲
暴子孫懇請乃還家以壽終葬貴安山有司刻純孝字於
墓門以表焉

孝
睦 莊 脩 子以浚附

字聞修孝義思正七世孫也廩生以文行著家居聚徒講
學悉依白鹿洞規從遊者屢滿孝於親厚於族冠婚喪祭
具修古禮子以浚亦以孝聞

國朝

孝 林 偉

字堅之父公衡明末官南寧通判鼎革棄官歿於南寧傳者異詞偉決計往尋入南寧徧叩官吏無知者金盡夜宿天鏡山投老僧薙髮僧審實歎曰孝子也贈之金旋於破亭中得木主爲塵土掩拭之卽南寧通判林公六字偉狂號曰吾父在是矣抱主返菴適遇老翁亦閩人爲示其父葬處啟土負骸歸計行二萬餘里千四百餘日聞者哀之爲助其葬

孝
子張之材

性篤孝順治戊子土寇圍城城內食盡守者下其令凡出

城市米必官給符乃行而民憚賊迫甘爲餓殍者相枕也
材痛父母垂斃出市米賊要而奪之材奮勇手批賊數輩
賊亦不持兵拳毆材折脅流血及衣復盡掠去匍匐至南
關以所給符未失門者納之時圍城中無醫藥而創自平
父與母亦無恙人謂孝感云

孝
義 鄭 起

順治戊子兵荒父母及祖父母相繼沒起年十七附身附
棺備具撫二幼弟成立旋俱蚤世撫諸姪及姪孫如撫其
弟百口共饗庭無閒言晚年復捐金收骸施棺鄉人高其

義行

任 卹施元陽

字廣白年十三封股療父疾順治五年福州饑出已粟多贍族衆十三年鄭氏兵圍城居民分陴堅守敵軍尋退皆其措餉之力有塋地在北麓奸人盜鬻某姓臨窆事覺陽見其七棺半朽竟捨之壽九十六

孝 義林 靖 子鏞附

字獻卿性至孝侍母疾數月未嘗解帶事嫂如母撫孤姪如子順治五年大饑靖分粟於鄉鄰人咸賴之子鏞字永

範庶子錡幼鍾篤愛錡及成立推產以讓鑣生平好關人
急道路傾圮悉捐貲修庀之

義
叶良駒 子宗秉附

性豁達力行善順治初疫氣盛行良駒施藥全活甚衆貧
不能殯者埋之歲饑賴以濟子宗秉承父志增款構學舍
延師課族中子弟置義田爲膏火資又建宗祠創壽祭業
俾永奉祀

忠
汪汝修 弟汝欽附

順治十年冬海寇周瑞登岸肆掠與弟汝欽率鄉人禦之

殺賊數十以衆寡不敵鄉人潰兄弟皆被執賊曰爲我用
貸汝死俱不從賊怒殺之逾二日子大美收二屍面如生
遂合葬焉

孝子楊必亨

國學生年十三從父讀書光德里順治丙申鄭氏稱兵掠
福州父被執必亨哀告願以身代曾感動父子得俱脫母
沾瘋疾起居飲食悉躬親七閱月不少怠人稱其孝雍正
三年旌表

孝子鄭璿

字若文父正誠司教南安鄭氏陷泉州俘知縣教諭拘繫
鷺門璿徒跣奔救遇前同學翁氏子告以處伺道旁數日
見其父父曰吾命懸指顧間兒留增一累宜急歸璿悲傷
饑餓臥翁家頃之父忽至曰俘官已議釋歸兒先渡海吾
稍後卽歸璿歸父逾年不返突傳俘官悉解臺灣璿不告
妻子復蹈海尋父至臺而父先遁歸時鄭氏緝捕嚴密璿
竄身窮島出沒蛟蜃之窟晦迹丐中每至急如有神祐後
遇老艍工指微茫小路一痕曰由此可達泉州璿趨回而
父先抵家三月矣兩涉漲海父子生全咸謂純孝所感云

義 趙沂

字閻仙進士宰新城歸後遇寇薄會垣焚城外民居有從賊中大呼曰勿邇趙長者家比屋千餘家得免及避寇東山下亦免寇難爲人古心道貌瀟灑出塵文采迥豔有燕遊草歸來堂集

志 胡牧孟 亦作穆孟

義 妻王氏附

名守謙以字行其先以武功世襲衛指揮父上琛忠於唐藩閤門殉難僅餘二子牧孟其長也右衛守備王邦鎮憐其忠臣之後字以女爲經紀其家舉武科耿精忠反徵之

不從會其友沈廷棟函論精忠不道事洩論死其妻謂牧
孟曰沈君死母老妻無依將有族滅之慘牧孟曰然則我
承之耳亟赴刑曹自伏廷棟之書皆已筆也

廷棟與人書致孟
竊視之爲潤色更

書乃辟於市婦亦從死 王師復閩贈官蔭子焉

義陳國琦 子治滋附

字琢菴五歲喪父九歲失母悲號躄跣哀毀若成人康熙
丙午補弟子員游學浙中值耿變道阻蕩平後始歸帥府
稔其文行題授教諭歷任沙縣大田甌甯戊午海寇林信
陷潭平移兵大田防將余虎素與令侯執纒不協乘勢繼

橫夜半寇將乘垣琦急檄諸生范文景田乃章等率練長鄉兵分陣守城親馳虎營中責以大義虎爲感愧出師追賊城賴以全子治滋字以樹號德泉穎敏力學十歲通五經大義能屬文康熙癸巳館選授編修母老乞歸歸八年而親喪葬畢改御史尋掌京畿於民生利弊詳切敷陳轅蒙嘉納旋擢奉天府承爲人篤孝躬行爲都人士倡教子以居家必孝弟居官必清慎勤治滋三子朝礎朝柄朝棟皆登第

老
時翁應宣

字士宜孝事繼母兼敬養兄嫂撫姪如己出遭耿變迫之
仕不屈避地琴江以讓產陸族稱

任
俠林 萱

字乾之諸生康熙十五年 大師逾嶺耿部潰軍南下者
擄掠無虛日萱率鄉民竭力堵禦里黨獲全耿變既定臺
曾部卒復盤踞內地掠子女索餽餉萱復營解焉

梯
俠謝 宣

字爾旬刻苦力學尙氣節事兄宏如嚴父一錢寸帛必稟
命焉常傾囊爲業師林啟平葬及五世康熙庚午舉副榜

貢生出閩邑令溧陽吳琇之門歲甲戌琇以郡移缺額去
官家累二十餘口宣繼粟肉三年無缺琇迫於對簿謀鬻
養女閔氏以償宣聞之嘆曰官斯土以鬻其女凡爲子民
者不忍見况門下士乎立措三百金遺琇止閔氏己而琇
復如前謀將舉券宣復釀錢二萬昇女於家撫爲己女盛
裝擇佳耦歸之一時人士高其義

孝
子 林祖植

字建伯康熙戊寅商人何某觸怒齶使波及其父植挺身
代質父不忍欲自投獄植泣曰兒以身代父職也父有子

而坐視父入獄生不如死謫戍永平臨行猶以父老不能躬養爲念抵上谷會李光地巡撫北直稔其孝力請減等釋歸都中公卿咸贈以詩德州孫勤爲之傳

友 吳庭樛 子尙焜附

字崇卿五世同居康熙四十六年壽躋百有二歲奉 詔建坊旌表逾年卒子尙焜年七十事期頤老父晝則杖隨夜則聯榻一宿三起寒暑不輟父卒時年八十餘苦塊必循禮年九十一卒

孝 任 張世燦

字雲階雍正癸卯鄉薦歷知增城饒平普寧興寧永安歸善新會七縣多善政始任饒平歲饑燦先賑後聞長官重之邑隆都堤幾潰率工堵築三晝夜完固水患以免歷宰各邑皆以拯災恤患興利除弊爲己任獄多平反一切餽遺干請無所受以疾乞歸天性純孝年十五親吮父癰居喪哀毀盡禮歸田後恤及戚屬瘞族人之不能葬者

孝
子 劉兆基

字開周舉人雍正初巡撫滿保以孝廉方正薦至京以病乞歸尋官教諭未踰年亦解組歸兆基少孤養母盡孝主

共學書院造就學者甚衆子孫繁衍相繼舉甲乙科

義 孝 陳 仁

字惕存德行凝定以文章振一時勤學授徒供奉二親又
爲業師營葬領康熙乙酉鄉薦著有鐵硯齋集

任 俠 高 琬

字騰士善文兼習武備值海氛熾總督姚啟聖聞其才延
贊軍事馳驅海上冒矢石擣賊巢勦撫兼中機宜歷五歲
寇平論功奏 獎晉琬一品頂戴

友 孝 莊念勤 弟其葵附

字若丹舉於鄉力學不懈遊其門者多掇巍科而去母病與弟庠生其蓑衣不解帶者二載兄弟式好視姪猶兒家法爲鄉黨師

按念勤先入曰思正曰修曰以浚均已詳明代德行

友 劉聖振

弟鄰初附

字虛舟康熙閒舉人授廣西興業縣居官寓寬於猛一以仁愛爲心革排柵錢馬蹄錢諸陋規邑人立碑志之解組歸囊橐蕭然性好施與每多周恤昆弟三人更相友愛常以詩書課弟鄰初成進士入翰林有時望

孝 友 林世發

字君奮父歿哀慟幾不欲生母老病日夜侍湯藥不倦母
色少變卽跪問故俟瘳乃起撫三弱弟極友愛後相繼沒
鞠諸姪無異己子腴田大厦悉以讓之鄉鄰高其行有爭
訟者皆取決焉

孝
陸張綸

字道羽貢生綜洽羣書爲文淵懿博大執親喪三年絕葷
酒置田以供祭祀又分弟與從弟餘悉給族之貧者自是
綸亦貧然緇袍粗糲泊如也

孝友
王勅

字聖仲侯官志耆舊九徵子也生平品端行粹篤於孝友勵志紹家學研究易理雍正己酉舉人任安溪教諭專以實學課士焉

孝義 黃輔德

字紫列少穎異好讀書事親孝持身廉介雍正中成進士宰定襄興利剔弊民勒石頌其德後改邵武教授捐修學舍以立品敦行課士士風不振親老乞歸居鄉敦睦好義年七十一卒

孝義 王廷樑

字維才號美溪喪母廬墓三年慕離家五十里每三日一歸省父父好施樑皆先意而行生平篤兄弟其他輕財好施多不勝舉

孝 王朝屏

字雲根幼警敏能文父應元雍正丙午舉人屏承庭訓文譽日起乾隆甲午舉於鄉爲人孝友肫篤見義必爲衆曰王氏有子矣仕至刑部員外

孝友 魏開葉

郡學生早失母哀毀盡禮隨父客吳門先意承志父喜周

賙皆力辦以成之繼母有五弟友愛怡怡幼弟患痘幾殆
禱於神願減已算以益之獲愈體素弱父病日嘗藥以進
勞瘁而卒

孝友 何佩珠 子恒潮附

字嘉瑀拔貢生力學稽古事親先意承志母沒衰毀骨立
篤愛諸弟季弟早世撫其孤教養兼盡及長又殀更顧復
其遺孤念仲兄食指繁割田數百畝爲公業生平尊師重
學給衣施棺並周郡中節婦之貧者於戚族尤厚恤之子
恒潮舉人工詩文善繼父志

孝 子 趙繼蕃 方元平等附

父病割股以進父母歿以哀毀卒同里方元平亦然母病割股無效亦以哀毀卒更有江際田劉志清高行均皆以割臂割股調羹療父母疾獲愈行均有姊亦與同割股焉

孝 悌 陳 榮 子駿元附

兄弟五人榮居次父歿年十三哀痛若成人及葬隨兄適墳操作母止之號泣請往朔望必造墓所哭奠母以壽終榮哀毀骨立事兄如父兄病願以身代兄沒言及必涕泣撫從子如子撫從孫如己孫從孫名廷魁道光間舉於鄉

皆榮培養之力也子駿元母卒哀毀不食父諭以滅性違
禮乃稍進然猶茹素者三年父壽終哀戚如喪母時其宅
心仁厚喜義舉皆如其父道光十八年奉 旨旌獎廷魁
從孫培倬大挑四川令有吏績

孝
義
文
哲

鑲紅旗滿洲人駐防福州三歲喪父孺慕哀泣及長饗殮
不給與兄竭甘旨以奉母乾隆間隨軍渡臺征林爽文有
功母沒三年號於墓累擢協領駐三江口廉公有恩人以
文父母稱之地方義舉皆竭力成之曰吾不待有餘以濟

人也以父歿時家貧棺衾粗具終身爲憾故生平不敢以
豐腆自奉及卒遺命薄歛曰無易吾志以得罪於先人其
摯性若此

義俠 薩龍光

以庶吉士改戶部主事丁外艱歸治鹽筴以贍族戚地方
公益皆倡輸數千金不吝嘗曰吾豈以財爲德哉視吾義
所存從之而已必俟有餘而後散焉則爲善無日矣時以
爲名論

孝 陸 陳薰南

字蕙畹母病風孿兩手不舉薰南每飯親哺或出就館間
日歸則妻代哺有友宰歷城訂歲五百金延入幕以母老
病固辭母壽八十有一親哺者二十餘年事叔如父三弟
有室皆其筆耕成之幼弟苦學病瘵卒以次子篆嗣之勗
學勵品卒舉優貢以成弟志薰南能文著有鋤經書屋文
集啖蔗齋遺草道光間 旌表

孝
卹 梁升南

諸生孝事父母及親歿哀毀幾滅性篤友愛雖與兄弟異
產然撫遺孤皆如所生三鄰有急視其力所得爲無吝色

道光間旌

友
嫗 陳 叟

失其名字少時積錢數萬以娶婦會其姊家坐馬價賠累
鬻甥女以償叟聞之罄所藏贖歸遂不復娶好談史從市
肆購零本綱目閱之積久遂能通貫早歲從軍後棄尺籍
鬻琉球燈以餬口士大夫雅重之

孝
子 鄭義正

父病足疽醫治無效或謂吮之可愈義正請於父父責之
曰吮則毒入爾心腹矣義正號泣以求從之遂愈母得偏

枯轉側需人義正臥母側奉侍三年母病亦愈與兄友愛

尤篤

孝 陸鄭璿 子恭附

字子中諸生父胸生疽禱於神以身代父卒母病醫治無效乃發篋陳百家方書得母病之由治之立瘳遂以方濟人族之孤女因亂沒爲婢者二皆贖而嫁之

此又一鄭璿與康熙時鄭孝子同姓

名子恭縣學生補抄謝皋羽歸髮集五卷至八卷爲之後

序又作月令中星考均田論學使沈涵重之

孝 何道源

字廣文五世從祖履旭 旌表孝子父志高負販廣東遭
風漂泊不返道源年十五屬弟道泉奉母獨往尋得之於
越南時父病療服事五日而卒葬父畢乃返與弟奉母惟
謹母卒廬墓三年每朔望必偕弟至宗祠讀祖訓以勸族
人歲暮於普濟堂按名給錢又建塔於漏澤園以掩枯骨

孝
陸 廖岡陵 子鴻翔湯茶等附

字陸峯父昂官把總以剛直忤上官落職懼禍及避去時
岡陵甫九歲泣告諸父執爲營護事白而父去不知方乃
白母往尋得之於永安旅次母好施與苦家貧岡陵時陰

以錢實篋中，匱則益之。篤厚姊妹，有寡者，月給薪米，撫其孤，成立，通堪輿言，而助貲勸葬，不吝。卒年七十八。子鴻翔等五人，皆舉甲乙科。鴻苞，官揚州府鴻藻官。江西督糧道鴻荃，籍侯官。官工部尙書。諡文恪。侯官志別有傳。

孝
俠 陳士鑑

習儒，以佐父持家，遂改就會計事。父盡孝愛，兄篤以雍睦，訓族同居六代，不析箸。歲稔，倡捐賑貸里閭，中遇忿，爭必力爲排解，道光間旌表。

孝
義 何恭崇 弟恒喜恒挺，翁子則賢附

字慎齋叔弟恒喜季弟恒挺並以孝義稱伯兄早世次爲家督同產合巹厚女兄弟其孀者皆撫孤成立外此地方義舉尤極力爲之兄弟同心如一已而恒挺恒喜先後卒恭崇漠然無所問而督諸子加嚴未幾恭崇亦卒諸子咸能成三父志於施濟之事尤力道光間大吏上恭崇兄弟行義於朝皆得旌建坊恒喜子則賢舉於鄉篤志程朱之學爲時所稱

孝悌 陳瑞魁

字學仲少孤棄儒學賈以養母母壽終營葬不惑堪輿之

說歲時祭掃疾風驟雨不避兄早逝事嫂盡禮撫從子成立中外三鄰間絕者繼之孀者卹之助婚助葬尤必殫其力而後已座右皆書忠孝節義軼事以自勗卒年七十二

孝
義 洪 福

字季汀少孤事母至孝侍疾衣不解帶者累月母卒三年歡粥遇父母忌辰必抱木主號泣與兄弟共財終身無問家素貧而卹孀賑貧必勉力行之

任
俠 林于制

與弟三人浮海爲生皆雄武善戰于制尤勇敢面黑如鉄

時海寇猖獗被劫者無敢與抗獨于制兄弟以計破之前
後殺賊百餘皆棄尸海中賊渠憤恚伺于制船出天津設
伏環攻之獨舟無援鬪兩晝夜勢窮皆爲賊所害猶相顧
咋舌曰好男子使官軍用此輩吾無瞧類矣

友 睦 許朝均

號和齋篤友愛兄弟皆早世遺孤皆幼值兵寇擾攘避匿
深山朝均以一身理之卒能撫孤成立爲婚娶并析產分
給焉

梯 弟 林 祥

字叔擊父開瓊

傳見
事功

官教諭卒家貧有三寡嫂窮不聊生

祥誓不娶竭力以卹方兄病刲股以進竟不起遂終身不復葷食銳意文章不求聞達嘗病誓後復明力學有悟乃號懺凡居士

孝
卹 陳顯揚

字惟錦侍父疾衣不解帶母患風毒吮血舐癰祝以身代前後居喪哀毀骨立憫孤恤寡凡三鄰間嫁娶喪葬必竭力助之道光間 旌表

孝
卹 劉廷章

字建綸號芸圃職員先儒劉履之後少有至性事生父母
嗣父母皆以孝聞親喪哀毀骨立遇忌辰必哭泣篤友愛
撫從子若子女弟孀迎養於家教育其子女歲饑有鬻女
者出數十金爲倡贖歸令母子復全著有省心錄家訓錄
若干卷道光間旌表子存仁官知州有循聲著述尤夥

自有傳

孝 王世光

字植庭乾隆間由長樂遷閩縣祖父皆有隱德世光生有
至性未冠失怙恃哀毀如成人兄世耀客建安弟世輝早

逝寄食外家伶仃孤苦常以嗣續爲憂遂力營生計以娶
木支復盛篤厚親故冠婚喪葬攸助不吝子弟遵其訓誠
皆馴謹嗜學學使彭蘊章手書孝友慈祥旌其門

孝子方英穎

字隆文其先長樂人移閩縣父遊幕山東肥城縣挈與俱
父卒英穎年纔十五號哭典衣負骸歸路經蘇州病月餘
金盡逆旅媪逼取餐錢解其囊見骸棄道旁英穎抱之啼
縣令過而詢之泣訴顛末令曰孝子也罰媪給旅費並予
文憑俾護骸歸

孝友 鄭文久

幼失恃卽哀慟不勝數日不沾水米事父並繼母極得歡心篤友愛弟天亡弟媳年僅笄撫卹之始終無間爲人排難解紛尤稱於里間道光中 旌表

孝子 鄧

庸

族人韶光楷應軫熾昌附

字敏齋母陳病劇午夜焚香籲天封股和藥以進病隨愈終以瘡傷得疾囑弟曰母疾新愈幸有四弟可終養吾無尤矣且吾以身易母雖死亦生言訖而逝詔字希舞年十一歲父官化州卒於任聞訃哀慟屢絕水漿不入口數日

欲躬赴迎喪伯父憐其少阻之未幾庶母扶櫬歸走迎江
干望舟一慟幾絕路人爲之流涕光字景晦事父母以色
養侍疾衣不解帶雖中裙廁踰皆躬浣滌居喪哀毀骨立
楷字正夫應軫字世南應斗字世瞻皆孝友得 旌表熾
昌父墮水下負父已死哀毀逾恆咸豐間 旌

孝 高文駿

生有至性九歲母病卽憂戚如成人朝夕問視無間父病
封股和藥獲愈兄文駒早世撫姪如子年二十五歲父復
病時酷暑服侍積勞成疾猶強起奉視以慰父懷疾甚遂

卒戚黨哀之道光間 旌表

孝
義 林雨化

字希五少有至性父課以大義感激奮發以舉人官教諭
有某生直而受誣雨化申辯諸府府得劣生三百金反坐
雨化罪謫戍旋賜環父尙健在相見怡然人爭稱之晚歸
里以課徒自給直聲亮節尤爲鄉邦所重每講學門外聽
者常滿雖顛愚亦咸領其意而去著古今文集二卷文筆
嚴重如其人培陳功梓之功官御史有聲雨化飲食而教
誨之者也世尤服其知人

同里林昌彝硯耕緒錄載雨化賜環時知府某
緣事謫戍相逢於旅邸雨化贈以詩曰三日白

金亦小哉忍將名教掃塵埃好還
天道君知否我却回時爾又來

任 鄧庭訓

字東峯家不甚富而好善不倦建義學立社倉修橋梁諸
善舉恒終歲違違蓋有瘠己肥人之風焉

任 李慕鏊

字振烈號方溪祖父皆以舉人官知縣訓導有聲慕鏊幼
岐嶷九歲通五經顧獨困於試場以歲貢終內行脛擊執
親之喪哀毀逾常既乃推親之志力行施濟以爲孝凡三
鄰中冠昏喪葬必竭其力以俛助又念節婦最苦月立敬

節糧以卹冬月鬪別給棉衣焉然於當世之務未嘗不講求精審侯官林文忠督軍粵西要與偕行未赴獨以金石書法自娛世爭寶其字蹟焉

友
卹 徐品芳

字鞠人喜任俠不事家人生產光緒甲申法夷突犯馬江所居浦下鄉係陸路要衝乃與林主事元廣

傳謝學業

倡辦團

練衆恃以無恐事平獎職銜品芳尤篤友愛兄早卒撫猶子如己子課讀甚嚴尋其子與姪同年舉於鄉人艷稱之宗祠燬於火獨倡捐重新凡關宗族之事視其力所能爲

無難色皆此類也

友 王景郇 弟景莘附

字起龍號雨田貢生十世同居凡二百餘人光緒初奏旌
得 獎浦江家法區弟景莘字起根號任農領鄉薦亦有
文行

孝 陳承裘

字子良大司寇若霖孫也以孝稱母病剖臂和藥以進居
喪哀毀柴立服闋補弟子員旋以進士官刑部浙江司主
事時輦下公卿多尙書公僚屬咸以進取相期君獨以侍

奉爲樂隨父景亮居山左藩臬署者有年及歸閩又待奉
不出生平好施與重品行以長厚待閭里以詩禮課子孫
待師有加禮猶恤其後人不衰晚年以金石自娛里黨稱
之

自來表彰錫類志乘所載若割股負骸多出孤寒畸行而世祿
養志者寥寥豈以庸行爲當盡乎然畸行難庸行尤難取錄之

義
行 陳錫瓚

字形尙幼穎警篤孝異常兒弱冠籍學氣概豪宕累試弗
售橐筆遊四方嘗爲天津水師學堂漢文教習提調吳仲
翔叩所學大奇之待以上賓時嚴復已負海內重望一見
亦折節請執弟子禮旋就臺南守包容聘渡海佐其幕客

服錫瓚文行令其子若婿師事之光緒辛卯領鄉薦壬辰成進士授工部歸逾年卒年四十八孝友本其素性於書則無所不窺然多畧觀大意不竟學及叩以經史疑義仍辨晰纍纍如貫珠其才殆天授也工詩古文詞尤精醫學所活戚友中沈疴垂死者不下數十人少慕韓魏國李忠定之爲人思以經濟顯鐫一印云撐住頽風不量力可以知其概矣晚得一第未竟所學齋志以沒士論惜之

孝
子羅義進

字孚高孝弟出天性父病目爲義進舐愈者兩次業南臺

文林 清苑

避元弗仕居山寺變姓名郡守過寺驚其儀表引爲吟友
守論閩海人物曰聞有林清者雄才碩德惜未見其人清
默然次日守再訪清則不知其所之矣

文苑 鄭天祐 林岳等附

字君祚避元亂隱南湖後遊四方日飲醇酒賦詩人呼顛
公不能測其所存晚歲辟火食麻鞋散髮走道上歌屈騷
以見志螺江林岳及弟歸髮先生巒姪巢雲子積亦皆不
仕

焉壁書進膳晷刻不使少差日於午後扶父往演劇處晚
又往扶歸歷四十寒暑無惰容嗚乎難矣

孝子許顯駒

窮古今達異域未有無倫常可以爲學者故閩省學堂成立未幾而卽有許孝子殉母事孝子名顯駒字漢英少孤事母最孝以弟子員肄業高等學堂平居嘗慨人子得竭力奉親親率中壽日月不居蒼顏易老誠人生憾事每言及此輒哽咽欲絕會母病朝夕不離側然竟不起哀痛殊常其女兄力勸乃稍進糜粥及其母受弔之次日乘間仰

藥死預書遺囑數十百言有母死亦死至愚也然我涓埃未報各是其是而已殿以絕命詞云世上是非惟我定生平心事只天知聞者哀之

孝介陳親

字壽慈事母最孝年六十餘母病侍奉湯藥皆躬執而不委子婦少籍學授徒鄉里藉修脯以養母固亦取所得潤筆以佐之其作書能以指濡墨尤見重於時遂有浼之關說當軸者駭曰士之守身如婦女守節君將污吾節耶其狷潔不苟若此丙午秋卒遺囑治喪不用浮屠其學養蓋

可徵矣

耆舊錄二

學業

唐

文苑 陳通方

貞元十年登第時年二十五屬公道大開采及孤寒故閩人亦得與選時論榮之後因失歡王播困躓以老然文行卓著流傳人間不能掩也

文苑 陳詡 子納附

字載物貞元間及第三府交辟以文名於時嘗知制誥有

詩集十卷子納會昌進士仕大同軍節度副使

文苑 邵楚萇

字待倫貞元間得第以詩名侍中馬燧有亭甚偉麗爲作馬侍中亭子歌馬以爲愧遂毀其亭

邵琦青岩有萇宅

文苑 陳彥博

林諤附

字朝美元和進士貴溪令得時名邑人林諤博學不仕撰閩中記十卷談者兩美之

文苑 歐陽袞

子琳玘附

字希甫寶歷初進士官御史與項斯齊名長子琳字端卿

咸通七年及第亦官御史次子玘咸通十年中第仕至書
記並有時譽

文苑 李滂

字注善開成進士大理評事文名籍甚與長樂林鷗侯官
蕭膺同登第閩中文學自是與上國並

文苑 鄭誠 林滋唐雜附

字申虞會昌間及第同邑林郎中滋字原象詹布衣雄字
伯鎮俱有才名時稱誠文滋賦雜詩爲閩中三絕

文苑 薛承裕 林袞陳蜀附

字饒中咸通初進士國子四門博士又有秘書郎林袞字
謹言乾符進士陳蜀字文郁皆同邑亦有聲於世

文苑
連總鄭希顏附

字會川咸通九年中第賦筆典麗爲溫庭筠所重又天復
五老榜鄭希顏亦本境人

五季

文苑
黃廷樞子夷簡附

有文名爲王審知從事甚被親任延鈞以女妻之子夷簡
字明舉少孤好學善屬文尤工詩初仕吳越勸錢俶納土

終宋光祿卿秘書監平江軍節度副使太宗眞宗皆禮遇
有加

文苑 沈 崧 林鼎附

乾寧中進士與臨安羅隱齊名吳越錢鏐延爲鎮海軍掌
書記奏授兵部尙書及元瓘卽位拜丞相謚文獻有集二
十卷同邑林鼎字渙文亦爲元瓘宰相俱能佐其不逮鼎
謚貞獻有文集數十卷

儒林 陳 貺

志操淡樸通經籍力學苦吟得句未成章已播遠近不苟

仕進隱廬山四十年學者多師事之開白鹿洞宗風南唐李景以幣徵入見進止嫻雅景喟然曰眞儒者也以天寒特降札曰欲贈卿綾綺卿必不受今送卿以朕自服紬縑衣三十事卿其勿却乃獻景陽宮懷古詩以諷之景稱善授江州士曹不就歸卒年七十餘

文苑 陳保極 弟元亮陸都附

字天錫原籍永春後遷閩縣

閩書八閩通志無不閩永兩見

好學善屬文第進

士爲秦王從榮從事忤王貶推官從榮敗歷三署賜金紫又忤晉相桑維翰不自安假歸翰言閩人狡恐走淮海追

下台獄將鍛成其罪李崧救解降衛尉承憤甚未幾卒詩賦震一時性傲而倅與人奕將敗則亂其局得祿未嘗自奉日惟蔬食身後囊金爲他人有弟元亮仕南唐亦以文學名後主目爲二英又有陳郁者篤學博覽仕閩王曦爲諫議大夫以冲淡免禍

宋

經 劉彝

字執中從胡瑗學第進士爲邵武尉有惠於民熙甯初爲制置三司條例官以言新法不便罷後知處州俗尙巫鬼

病不求醫著論以辨之俗遂變著書繁富紹聖初郡守溫
益建五先生祠以髯與陳襄鄭穆周希孟陳烈并祀

按髯所著以七

經中義明善集居易集

水經爲尤有功經史

儒林 劉康夫

字公南祖若虛

傳附德行

父奕以屯田員外郎爲韓琦判官贊

畫有助季父昇早退稱隱君亦官屯田世謂其兄弟大小
屯田康夫從周希孟學鄉人師其孝弟仁愛久主鄉校鄭
俠表其墓稱其羽翼詩書推獎臻至著有經訓及禱文古
律詩又有志術二十七卷

文苑
林陶

景德中舉特科累官員外郎有集四卷又著元統二十卷
詞旨該博

文苑
謝伯初

字景山以詩知名歐陽修謫夷陵寄以長歌修稱其佳句
無愧唐賢然仕宦不偶困窮以卒

經學
林洪範 一作鴻範

幼苦學博通經傳工文累舉不第後還家教授鄉里著諸
經義方三十卷與建州徐復論詩之通樂復大悟遂得其

樂律之傳

儒林陳

陽

宋史有傳
兄祥道附

字晉之中制科爲太常博士著樂書二十卷趙挺之稱其貫穿明備終禮部侍郎兄祥道字用之一作蒞之
或作復之籍閩清治平間進士上禮書一百五十卷范祖禹歎爲不可及除秘書正字兼館職禮樂二書并行於世

詳宋史
儒林傳

儒林王普

字伯照禮樂律歷皆精治宣和進士官工部侍郎使金還卒朱子嘗評福州前輩明禮者三人普爲最劉藻

傳見
德行

任

文薦次之

皆占籍
本境者

國朝阮元采普入疇人傳

文苑蔡蒙叟

字素臣博通古今隱居教授從遊甚衆郡守李欣薦授本
州助教八十餘卒號貞白子著繩子三卷凡五十七篇

醫學田 嵩

以醫名尤善治療診候察形度病淺深期以月日未嘗失
也

疇人阮興祖

精天文算法乾道四年詔訪通歷者遂上言新歷差謬太

史局官荆大聲不以白部卽補興祖局生初大聲旣偕天文官劉孝榮爲新歷至是忽以興祖所主太陰白道九道變七道別演一法與孝榮異孝榮訟諸朝興祖說廢不行

文苑
陳修

紹興中及第第三人年七十三矣尙未娶高宗讀其四海想中興之美賦有云葱嶺金堤不日復廣輪之士泰山玉牒何時清封禪之塵手書粘壁及唱名問卿年幾何有幾子修具對詔出內人嫁之

經學
俞咸熙

少應舉不遇遂閉戶窮經性凝靜操履不苟鄉里稱長者
有文集十卷

儒 李 樗 子北海先生附

字若林與兄榘林之奇同遊呂本中門後舉於鄉其學以
孝弟忠信窮理力行爲主著毛詩解學者稱迂齋先生子
北海先生失其名亦以文行爲學者師

儒 鄭 湜

字溥之父烏詔興進士官終大學士湜乾道進士光宗初
爲秘書郎因轉對上言盡事親嚴家法明教子不報出知

建寧府慶元初權直學士院趙汝愚罷相湜草制有持危定傾任公竭節等語韓侂胄以其無貶詞罷知福州尋坐免入偽學黨籍後官侍郎卒諡文肅

儒 林黃幹 宋史有傳

字直卿循吏瑀之子受業朱熹門熹以道統託之所著皆羽翼經傳名目繁多

詳宋史本傳

此外又有勉齋文集并行於世

儒 林李浚

字履中記博而醇嘗論孟子集義養氣之義謂其動必由理朱子稱其獨得大旨著有澗水集

儒林 曾逢震

字誠叟與林性之俱從朱熹遊恥爲科舉之學於經史百家無不窺究而胸中渙然洞見道體隱居道山家之有無不問也自編錄詩文名月林醜鏡

儒林 陳長方 弟少方附

字齊之循吏侂子少孤依外祖太僕林日居吳師王蘋得二程之緒讀論語至一貫歎曰六經無踰此言榜其齋曰唯室紹興中上言以嚴師律備長江謀漕運爲急旣成進士尉蕪湖吏不能欺有兄弟訟者教而遣之調江陰教授

曰教官幾於尸素當育材以報稱使後進聞孔孟之道未
行以疾卒朱子重之稱唯室先生而不字弟少方孝宗時
爲東宮講官號二陳

儒
林鄭昭先 子逢辰鄭文通附

字景明

或作景紹

淳熙進士主浦城簿得受業朱子焉獲賊不

受賞右相葛泌嘉之擢宰歸安除端明殿學士簽書樞密
院辭弗允旋拜叅政卒謚文靖子逢辰字伯昌以蔭稍遷
部郎同官會食祭酒蔣峴論孔子誅少正卯之非逢辰笑
之旣峴兼殿中侍御劾罷逢辰淳祐初起知衢州有惠政

舉推官馮惟悅廉賢劉晉之希史嵩之意彈其謬薦投劾
乞歸後提舉江右常平首劾吉守戚里王克讓罪累平寇
亂調湖南又平郴寇且越境討勦江西之賊旋以浙東提
刑致仕鄭文滂亦朱子門人先從黃幹後與幹俱受業朱
門朱子命編次喪禮著喪禮長編及門呼昭先文滂爲二
鄭云

元

文苑 方伯謙

幼登陳文龍門強記善問與俗殊趣薄科舉程文而喜爲

詩時諺人分十等有一官二吏及八娼九儒十丐之目人問載何不應舉笑曰吾首居娼之下丐之上乎

文苑黃六有

與謝文節善不仕元貧不自活携二子行五百里教學代耕暇或歷訪先賢講習之地借書高誦聞有遺逸之士雖懸崖窮谷亦必造謁蓋當時有心人也

文苑吳鑿

字明之工文詞爲一時所重集雖久佚士大夫家猶寶其殘編云

文苑
林清

避元弗仕居山寺變姓名郡守過寺驚其儀表引爲吟友
守諭閩海人物曰聞有林清者雄才碩德惜未見其人清
默然次日守再訪清則不知其所之矣

文苑
鄭天祐

林岳等附

字君祚避元亂隱南湖後遊四方日飲醇酒賦詩人呼顛
公不能測其所存晚歲辟火食麻鞋散髮走道上歌屈騷
以見志螺江林岳及弟髡髮先生巒姪巢雲子積亦皆不
仕

焉壁書進膳晷刻不使少差日於午後扶父往演劇處晚
又往扶歸歷四十寒暑無惰容嗚乎難矣

孝子許顯駒

窮古今達異域未有無倫常可以爲學者故閩省學堂成
立未幾而卽有許孝子殉母事孝子名顯駒字漢英少孤
事母最孝以弟子員肄業高等學堂平居嘗慨人子得竭
力奉親親率中壽日月不居蒼顏易老誠人生憾事每言
及此輒哽咽欲絕會母病朝夕不離側然竟不起哀痛殊
常其女兄力勸乃稍進糜粥及其母受弔之次日乘間仰

文中起爲高安訓導卒旭於學無所不窺爲王偁林誌所
推重著有詩經總旨初學提綱諸書

文苑

文苑

明史附傳子肇五世孫應時應鍾附

字中美

舊志作閩縣人明史作侯官人未知孰是

詩人林鴻兒女婿洪武間鄉薦宰

永豐預太祖實錄攙脩撰爲大典總裁應詔賦詩多稱旨
好汲引不當帝意他日仍復薦之同郡陳仲完高廷禮王
恭皆因以進詳明史文苑林鴻附傳子肇字開若工詩文書畫永樂中
屢徵不起著有蒙齋集五世孫應時官雲南按察使應鍾
嘉靖時御史屢論宦官忤嚴嵩罷歸提學宋儀望爲建道

山書院

藝術 陳 郊

工詩明天文與林鴻陳仲完唐泰高棟唐震王恭鄭定王
偁王褒稱閩中十才子洪武三十年進士廷對第一人一
榜無北士太祖怒戍考官劉三吾及郊尋召郊回爲鴻臚
署丞時禁習天文人競傳郊善此遂殺之

文苑 周 元

明史附傳

字又允一字凝之永樂初徵授員外郎詩瓌奇悲壯有宜

秋集

詳明史文苑
林鴻附傳

文苑 陳申 鄧誠兄弟附

字孟庸博學善文詞洪武間由教授擢潮州知府有惠政人稱文章太守誠黃州守弟定有耕隱堂集季弟佑

文苑 鄭定 明史附傳

字孟宣善擊劍工古篆行書陳友定辟爲記室有定敗亡命交廣後遷長樂洪武末年徵授延平訓導歷國子助教著澹靜齋集 詳明史文苑林鴻四傳 或謂十子之鄭定卽鄧定非也

文苑 陳景著

名從以字行官編修豫修五經四書性理大全書成丐祿

便養改本府教授父歿以母老不仕終於家

文苑 王恭

明史附傳

字安仲

董志作國縣人明史作俊官

少貧採樵自給號皆山樵者善詩歌揮

毫立就永樂初薦修大典年六十餘矣書成授翰林典

不就歸徜徉邱壑著有白雲樵唱諸集

詳明史文苑林淵附傳

文苑 林樞

字謹夫官知縣擢同知所至有政績好學至老手不釋卷

修福郡志考斷精密惜未成書著有如齋類稿續稿等集

儒林 鄭善夫

見明史文苑傳

字繼之官主事忤劉瑾歸旋起用奏今歲及前年三次月
食分杪時刻不合占步請改歷不報江彬導武宗南巡杖
諫官黃鞏等下獄善夫疏諫罰跪午門五日杖三十不死
受杖時猶匿疏懷中謂郎中方豪曰死則上之駕發哭曰
無所容吾言矣歸以詩自娛築室南湖顏曰遲清以見志
嘉靖改元再起吏部郎經武夷窮探諸勝中寒抵家卒

明詳

史本傳及阮肇
徵太傅嗜人傳

文苑 劉鴻翔 謝直相等附

字雲卿直臣世揚之子官知縣工詩古文詞以雅健典則

稱同時有謝宜相謝啟元薛欽拱葉麟俱能詩

文林世璧 鄭溥諧

字天瑞通政司參議炫子工詩古文詞有彤雲集或問誰可與談詩者矐視良久曰獨郭稚源耳稚源古田人文涓也時同邑鄭溥懷安林鳳儀福清王廷欽皆豪於文能詩與世璧齊名

經鄧遷 族子庭曾附

隆慶間舉人終嘉興守著禮經講義山居存稿庭曾字道宗以貢生司訓亦撰有禮經集解禮記訂補春秋傳說

文苑
林懋和

字惟介天資絕人少孤家貧事母孝由庶常歷官左布政歸八十餘卒數歷中外手不停披存書數萬卷於學無所不窺詩文皆有法著櫟寄集及雙臺詩選

文苑
林有臺

黃川中附

字南山與姪元立同舉於鄉歷官郎中能詩善畫於唐宋名人墨蹟靡不精考有南山集用中工詩寫意作山水亦妙

文苑
袁表

子敬烈附

字景從官戶部郎出守黎平病免少以詩名偕里人趙世顯王湛吳萬全林世吉等結社嵩山烏石間宗開元大歷作者精嚴有法著逋客集八卷與張荆部煒馬叅軍燦相廣和子敬烈字無競亦有詩名

文苑 王 湛

字汝存博學有偉才盡通百家之言文章與麗萬歷中歲貢有王生集

文苑 商家梅

字孟和少工詩聲調高鏗萬歷末遊金陵與鍾惺交一變

爲幽閒蕭寂不多讀書然詩特精絕客死太倉

文苑 鄧原岳

明史附傳

字汝高由進士歷官副使所至有聲稅璫辱諸生岳爲學道治之長於詩以氣格勝著有西樓存稿葉向高稱閩自十才子後則鄭吏部繼之吏部歿鼓舞風雅必推鄧公

詳明

史文苑鄭善夫附傳

經學 林子勉

字行甫萬歷恩貢官教授相國李廷機目爲金玉君子著易經說四卷又有蓬學石溪諸集

文苑 陳勳

字元凱官郎中權廣陵關盡却陋規當時尙黨援獨孤行
無依倚引疾歸杜門以文翰書畫自娛起紹興守未任卒
有元凱集堅臥齋雜著諸稿

文苑 齊莊

字望子家貧嗜學備力於人不廢讀書遂淹博以五經爲
諸生作文根柢六經從遊常數百人多掇科第著有白湖
集及史論

文苑 陳衍 子澹庵

字槃生篤學好古喜談邊事利害及將相大略窮老不衰
著大江集元冰集篝燈碎語槎上老舌四十卷子濬亦多
才

文苑

徐燿

明史附傳弟燿燿
子延壽孫鍾震附

字惟和永寧令榻子與弟布衣燿俱擅才名燿舉萬歷鄉
薦有幔亭集二十卷又選晉安風雅十二卷燿字惟起一
字興公博學工詩文章隸與曹學佺狎主詩盟性嗜古存
書甚富有徐氏筆精諸集詳明史文苑
鄭善夫附傳子延壽字存永有尺
木堂稿孫鍾震字器之有雪樵集

文苑 董養河 兄養泓子謙吉附

字叔會任俠廷欽子也工詩賦官工部司務緣黃道周事與文震亨楊廷麟等并下獄獄中與道周及濮州葉廷秀唱和號西曹秋思獄解擢主事遷員外卒著有羅溪閣書解及奏草雜文若干卷兄養泓有文名官司馬子謙吉以進士官員外

文苑 康彥登 重纂通志作廖彥登

字元龍 莆風清韻集作興化諸生 爲人慷慨負氣一言不合輒拂袖去嘗

遠遊邊塞著代奕篇朔方游稿萬歷七子彥登其一也

經學
林先春 弟鼎春子迪誥

字元圃孝睦一餐之子以進士宰嘉善狷介絕俗邑紳魏大中忤璫斃詔獄猶追鍰春力爲周旋秩滿擢給事中以憂歸先是嘉善民顧朝衡忤其親春捕治之跳至京投權璫璫固以籍沒大中事憾春遂嗾考功以春死註冊春赴補始知或勸自白春不辨歸後衡爲御史劾置法春家居聚徒講學布衣蔬食年八十餘乃卒著易象參洪範孝經解等書弟鼎春諸生有學行子迪字惠子仕唐王明亡隱居授徒以終

文苑 鄭邦祥 子楨孫善述附

字孟麟三落副車與曹謝二徐迭執壇玷牛耳著有玉蟾菴詩編子楨順治副榜孝友能文孫善述康熙舉人知固安縣著敬脩堂集自有傳

文苑 炎 原名玉
旁避諱

字翰卿布衣任俠詞館諸公爭延致之高文典冊多出其手每閉閣不聽出炎笑曰吾具有鬚眉安能悒悒若此遂走之金陵徐興公常稱其工七言少遊邊疆多悲壯語半生行一篇尤膾炙人口

藝 陳价夫

弟薦夫從弟平
夫從子公選附

字伯孺性曠達工吟詠尤精書畫所著有招隱樓稿弟薦夫字幼孺能爲六朝文尤工詩舉於鄉有水明樓集行世從弟平夫字長孺有釣磯集從子公選以孝聞爲諸生篤行誼不得志以詞人自命著有蕉雨亭詩鈔

經 學 王 字

字永啟進士官南京武選郎旋改山東督學參議又入爲戶部郎著有經說及詩文集行世

文 苑 王 穎 如

字哲開資性敏異氣度宏遠年十三隨董應舉遊鎮海樓
仿王勃作序頃刻數千言工詩文老於諸生著孝經頌贊
及三樓紀勝諸篇

經學 鄭羽儀 鄧林棫附

字敬生官中書舍人興試粵中明亡殉難著有戴禮新旨
行世同殉者兵部鄧林棫 國朝並 予追諡忠愍

文苑 王 奐 林孕祺附

字子巖博學各屬文與同年林孕祺等相切劘工詩古文
恆撫時觸景以見志著述繁富存於家孕祺字序之

醫學齊德成

字仲孚事親孝質實好義弟卒無嗣撫孤女如所生精岐黃術貧者爲治不望報全活嬰孩尤衆年八十餘卒著有全嬰寶鑑

文苑 陳選

字子俊布衣績學能文務躬行以著述自娛啟禎間遊江淮歷覽景物悲歌見志著有亦呂集子祖虞

國朝學業錄自有傳

方技 鄭雲翁

少遇異人授種牙方其法欲治者予七丸食飽後悉吞之

復傾末藥於湯使漱口片時牙輒且搖可下矣下則淨洗而記其序乃用預備之活鼠一枚去腸和藥搗爛成膏依牙原序逐枚醮種三日不可飲食然亦不饑七丸之功所種之牙至死不落有不全種者則未種者落種者亦終不落雖近世西洋補齒專科無其效也

國朝

儒林黃晉良

字朗伯明季弟子員得黃道周易象正三易洞璣二書窮年伏誦明平陂往復之數重氣節善於排難解紛人比之魯仲連工詩古文詞兼長書法遍遊齊楚吳奧間每託詩文以見志晚號東叟還居井上草堂著和敬堂集井上逸古桂林筆錄等書

遺逸孫學稼 子起宗附

字君寶

東越文苑後傳作侯官人

祖父皆顯於明垂髫籍學唐藩開儲賢

館諸父居權要學稼獨避居長樂之三谿順治五年北遊
各省常廬西湖自署聖湖漁者歲一省母不污耿逆僞命
行芳而氣和其自處在謝臯羽楊鉄崖間世以是多之同
時若福清林古度名茂請田余澹心名懷皆同志康熙二十
年九月九日卒於懷慶僧舍子起宗走數千里奉其喪及
遺書歸有羣言彙鈔四十卷十六國年表並論四卷蘭雪
軒遺集三十卷同邑高兆黃晉良曾並爲之序陳庚煥與
其姪鍾癘覓得詩文殘藁傳之類抄年表二種竟亡起宗
字蔚若詩亦偉麗

藝林 寵

字異卿，遺老也。工楷書，倣歐陽詢，而間以黃庭之意。文士奉爲模楷。福州題榜多出其手。

醫學 齊洪超

字儀魯，大父任吾以醫名於明。嘉慶間，故齊氏世通醫學。洪超少受業於漳浦黃道周，學易象，復以母痢卒，恨不早習醫，因究心醫理，以傳家學貧者與藥，不受直，時稱仁醫。著痢症辨疑。

儒林 薛 鎔

薛鎔字子燮

或作編清人
亦作侯官人

崇禎末年流寇起山海交訖鎔以

貢生負重名已屢却徵辟及大清興更不出以著述自

娛著有南窓草存六卷南窓草又存十卷存存草十卷草

腴二卷筠陽詩集六卷釋書十卷禮經徵解十卷先儒語

錄十卷

經學葉矯然 子聲遠附

字子肅以進士出宰樂亭懸罷歸康熙辛卯重宴鹿鳴

聖祖垂念科甲舊臣詔與王尚書士正等復還原職年九十六卒

著有易史易經灌叅筆印四經學筆印理學史學古文學

龍性堂集諸際詩文集子聲遠詳侯官耆舊錄

文苑 鄭宗圭

字圭甫官烏程令沈酣經史著讀史卮言十卷又有山園堂集及續讀史諸篇年九十五卒

文苑 林泉

字六一任漳浦教諭講經課文多所造就尤博綜今古藏書數千卷皆手自丹黃所著有數堂詩文集行世

文苑 林榮芬 子日毅附

字勉之舉人官翰林院待詔著有如蘭稿子日毅博雅工

詩著有浪谷集

文苑 陳夢雷

字則震一字省齋官編修請假歸會耿逆叛凡名士皆脅受僞官夢雷託疾稽之有陳昉者污賊京師譌傳夢雷亂平逮下獄幾不測獄中成杼哀賦同年李光地密疏救之減等謫戍尙陽堡或云夢雷預策蠟丸功不見錄

同時御史蕭震陽受

耿官寔陰圖之謀泄一門無
噍類久乃得雪祀褒忠祠

值

聖祖東巡獻詩稱 旨召還教習 西苑傳誠親王出入 禁廷

奉 命編緝圖書集成三千餘卷夢雷才敏通國書間關

塞外十餘年緒公卿子弟執經問難者踵接雍正初復緣
事謫戍卒於戍所著有周易淺述八卷松鶴山房集十

六卷

松鶴山房因
御賜松高鶴老詩聯而名

天一道人集百卷

文藝 鄭 磊

字三石康熙己巳歲貢性豪宕善草書詩名籍甚有南湖
集五十卷

儒林 方 邁 子側附

字子向初以進士令肅山嗣調蘭溪尋解組卒邁博極
羣書議論醇正以著述自任著有四書講義十六卷九經

衍義一百卷春秋補傳十二卷考正資治通鑑前編十八卷古今通韻輯要六卷詳見陳恭甫東越儒林後傳子佃康熙庚子舉人

文苑 苦鴛來

字叔威性豪邁不羈文名籍甚一試鄉闈不售遂棄去遊京師與名流談經濟稽掌故論經學衡文章者必以叔威爲歸叔威雅量容納久而無倦卒不遇乃一洩於詩以傳其不得已之懷詩格在元白蘇陸間著友鷗堂集八卷

文苑 林祖望

字脩伯康熙癸未庶常未幾卒生平爲文雅不一律兩掇
巍科未竟厥志士論惜之著有禮記詮解

文苑

衡子從直附

原名璣字義儒文苑榮芬孫也諸生工詩古文辭性孝而
勇於爲義閩令撻諸生於堂衡憤其冤率同學籲憲司求
理以此除名後再入縣庠改今名著四書講義全宋詩注
鳴書竹窻筆記博古錄草廬詩文集共一百七十卷子從
直乾隆甲子舉人亦工詩

文苑
陳祖虞

字燕臣歲貢生通經史潛心程朱之學於古樂府尤擅長
耿逆欲延致之逃之江中乃免喜蘇詩蒙邊惠漫句門第
子因號爲蒙邊先生

文苑
郭美

字謙居籍福清氣質端重而勤於學六經子史諸家靡不
手錄未冠補諸生張清恪公撫閩愛其詩古文辭器重之
雍正癸卯成進士知邢臺縣詢民疾苦賑荒斷獄悉公而
明在任八年吏畏民懷丁母憂歸哀毀骨立遂致疾而卒
生平孝於親友於兄弟坦懷樂易爲文皆根柢經史著雪

泥鴻爪秦蜀遊菑藏於家

儒林 吳于岸

字太士邑諸生性耿介不隨俗俯仰與親故遊處未嘗一言涉譖謔盛暑集生徒談經必正衣冠以是人皆敬之學使曾枉過其門欲以賢良應詔辭不就時以爲難

文苑 陳憲周

字時夏工詩詞閩中詩派自曹能始謝在杭後憲周爲得其宗以進士知海城縣不枉一民不名一錢卒官邑人賻之乃得歸葬

儒林 李開葉

字奕夫以庶吉士觀政吏部權貴人某領吏部欲羅致之落落不就遂引疾歸纂輯濂洛關閩諸書以授徒訓子朋友過從惟以講學論文爲事著教學源流等書孫光雲進士累官至太常卿

儒林 謝道承

字又紹幼孤力學康熙庚子以第一人舉於鄉明年成進士選庶吉士授編修乞假歸省晨昏侍養築一枝山房率子弟讀書二梅亭中家居十三年母卒喪葬畢 召見授

中允晉侍讀轉國子監祭酒居監中與生徒講習崇正學
斥浮囂尋遷內閣學士兼禮部侍郎仍領祭酒事未幾卒
官性介特不驚聲驟被峻擢大學士趙公國麟實薦之
未嘗執門下禮麟以是益重之在朝歷職日淺未盡其蘊
時論惜焉子瓊進士官戶部璟舉於鄉皆有父風

儒林枝春

字繼仁號青圃祖湛爲副貢時力却耿藩之聘作水晶宮
賦諷之卒免於難舉康熙丁卯鄉薦詳侯官耆舊錄枝春
以一甲第二人授編修累官左通政督河南江西學政崇

正學精鑿別旋假歸巡撫陳宏謀延主澹詒書院賢士等
出其門常佐當道興利除害尤有德於鄉里性至孝官中

書時

先以舉人
考取中書

母家居多疾感噩夢心動翌日家書至虔禱

於天航海歸侍湯藥者五十餘日人皆以爲孝感學者奉
其主祀熬峯書院子儀鳳一彪皆以舉人作宰浙皖

儒林 孟超然

字朝舉號瓶菴祖傳德晨值遺金待其人還之手錄書千
百卷方書尤多超然由選拔舉副貢巡撫陳宏謀惜之語
學使馮鈐欲逸章奏舉鈐不可曰孟生才達非小竄器也

旋領解首成進士選庶常改吏部累官郎中屢掌文衡釐剔弊竇拔取精當其督學四川士民爲立德政去思二碑歷宦十三年皆不携家累以親老告歸年甫強仕遂不出巡撫徐嗣曾延主鰲峯書院才俊輩作士之來者橫舍不能容踐履篤實老而彌篤家居無半刺入公府賙卹族戚不遺餘力或稱貸以濟之常曰吾不敢望范文正公近嘗自矢先族戚之憂後族戚之樂而已學者祀之鰲峯書院大吏奏祀鄉賢孫曾穀亦由副車以第一人舉於鄉當時蓋以爲嘉話云

儒林 鄭光策

字蘇年舉進士歸主講泉州會臺匪林爽文亂巡撫徐嗣曾其師也因上書言臺事嗣曾從其計會協辦大學士福康安至泉州徵光策見於行館光策長揖不拜康安禮重之邀與俱以疾辭因上平臺策八條尋當事延主鼇峯書院以制藝古文迭相考課欲學者力經史之學以期實用士習不變焉卒祀鼇峯書院

經學 林茂春

字崇達號暢園以舉人歷官教授精三禮左氏傳及馬班

二史時福州多爲文會治制義茂春獨約朋輩立程限考經史時太傅朱珪爲學政令與知名士十餘人合爲漢書社不數年各著聲光以去茂春尤工詩沈博宏肆出入韓蘇間所著則以五禮通考詳節史記兩漢書拾遺爲最

儒 陳壽祺 子喬樞附

字恭甫官編修記名御史以外艱歸念母老遂不復出主講泉州清源書院旋主講鰲峯書院旣在省凡興利除弊常佐大吏爲之閩中自李光地王士讓官獻瑞爲宋儒之學兼崇漢儒壽祺初受業於孟超然爲宋儒之學及出朱

珪阮元之門乃博聞強識喜爲鄭許之學以經術經傳於
閩中實開其端焉兼善沈博絕麗之辭詞館中尤推重著
作多有功經學卒祀鄉賢子喬樞舉人官撫州守能繼其
業亦著有禮堂經說考等凡十種

文謝職

字育萬號發川父仕驥善草書波折清澹不兼仕進工
詩構齋曰逸居曠幼承家學少籍學卽以筆墨遊諸幕府
然取予不苟舉孝廉方正年八十九卒

文蔡容

字惟英號于麓歲貢生獨喜經濟之學旁及騎射技擊嘗
浮海泛江周覽形勢交其知名士浩然有得嘗客某知府
幕一言不合遽歸鬻詩文以養親屢如也及疾革囑其子
聖門論學必依諸事論政必本諸心汝其誌之時以爲名
論不刊

經學 趙在田

字穀士官編修歷主道南權英玉屏各書院課士先持躬
立品次道藝文章士習不變繼主鳳池書院士尤翁然宗
之精三禮三傳好金石聚書萬餘卷卒祀鳳池書院

經學 何治遠

字郊海篤嗜漢學尤精說文於惠棟全祖望諸儒所著述皆能挾其違而彌其隙兩廣總督阮元聘修廣東通志同邑陳若霖爲浙撫時爲刻其論辨文字與經解名何氏學然其未刊行及未成書者尙多

儒林 魏敬中

字治原號和齋籍甯德官編修充

國史館總纂幼卽穎異嗜學年數歲從父讀稍倦父督之讀書大字以自警謂易言君子自彊不息欲爲君子似宜法

天行傑識者知爲偉器主南浦書院講席適閩縣陳壽祺纂全閩通志未成而歿大府聘卒其事旋兼主講鳳池書院其教人以變化氣質爲先嘗語及門爲學之法當以聖賢要語返躬循驗之從容默會於幽閒靜一之中超然自得於書言象志之表生平孝友以身已得仕歸產叔父移居會垣族戚求貸無不給著屋漏訟過錄觀我生日記年八十三卒祀閩縣鄉賢祠

經學張甄陶 子經邦附

字惕菴籍福清父捷春字天侯閩縣名下士不屑俗學勵

志窮經肄業熬峰書院爲蔡世遠所深器手書語類勉之甄陶少講求經濟之學爲文浩瀚由拔貢生舉乾隆元年鴻博不遇然大學士朱軾侍郎方苞皆待以國士旋以編脩改官知縣以耿直罷歷主雲南貴州五華貴山書院滇黔人士於其身後數十年追述遺愛猶有歎息泣下者歸主熬峰書院以考求經學提倡學者風尙爲變著述宏富皆羽翼經傳不苟作尤精鑿開藝書院生鄭光策以試藝政甄陶曰如無經邦者元矣揭曉果第二經邦甄陶子以閩縣籍舉省元尋由進士官知縣有俊才惜早卒

文苑 薩玉衡 子大年謝震林仰東附

字檀河以舉人官知縣有白華集其詩沈博絕麗不可一
世堪爲竹垞梅邨之嗣響幾欲跨其遠祖雁門集而上之
如大瀛吹波魚龍萬怪出沒其間沃日蒸霞極照爛於天
表閩自林膳部倡閩派我 朝二許莘田恭甫旬男先後
登壇玷先生則自闢塗徑震蕩一代天才也子大年字蘭
臺成進士授中書以詩鳴旬男者同邑謝孝廉在震也一作
長樂人或改名震終順昌教諭篤氣誼尤嗜輿地之學志用
作侯官人世而弗遇嘗撰禮案精核過敖氏 見陳壽祺東 詩其餘事也
越儒林後傳

有櫻桃軒詩

集若干卷

兼精醫算久羈旅輒匹馬往來關雒荆梁隴蜀

間謂人曰終南七百餘里亘數郡將吏狃承平弛控馭不
數稔難其作乎嘉慶初教匪果以南山爲窟穴仰東字子
萊機警早慧才敏瞻舉於鄉旋歿未竟其學傳者僅小芙
蓉舫詩鈔與侯官鄭西灑耻虛集同邑陳東村垂老集并

稱

西灑名洛英
東村名煇

文苑 鄭應瀛 林文儀附

字國登有至性讀書以寸計爲文不務時趨困阨終身而
自尙其志其誨人以端趨向爲先視及門若子弟其卒也

門人林文儀等葬之且以時祭掃焉其教澤之感人若此
撰著宏富未梓而稿失其存者河洛書說醫理易解二種
文儀字祖瑜以任郵稱其子廷煌孝子也

儒
林陳庚煥

字道由籍長樂高祖曠奉親避地居九仙山下煥以歲貢
官教諭累辭孝廉方正與實學諸薦舉篤志程朱之學身
體力行從之遊者皆講明弗懈里巷間風俗一變焉所著
宏富名其詩文彙曰惕園集以童子撫談二十二史人物
表兩種爲最益於世孫文翁典試貴州號得人

藝 術 高體華

號碧巖工詩善畫尤精山水嘗對鏡作荔甘瓜苦行樂圖
以寄志林文忠公則徐爲之序名流多題詠焉

文 苑 劉家謀 弟水松族弟勳附

字芭川

祖國柱兄
侯官著舊

少舉於鄉與弟永松齊名所交遊皆知名

士長樂謝章鋌負恃才畧獨推服家謀兄事之然屢躓禮
闈終臺灣教諭守陣殞年方四十所著有外丁卯橋居士
時集觀海集東洋小草鶴場漫志等書多章鋌序行之且
祀其粟主於小西湖宛在堂詩龕永松字筠川少籍學善

篆隸姿稟雄異亞其兄惜亦早卒族中有稍晚起而亦以詩文鳴者曰勳字贊軒少豪邁好結客嘗橐筆從戎遊林剛愍軍中福州故有聚紅詞榭各負才名勳年最少而尤跌宕既乃以舉人卒官教諭非其志也授徒里中弟子箸錄者數十百人多顯於世者第三子齊衍副舉人學甫成先卒

文
藝 溫松雲

原名某以字行原籍宛平以其祖幕遊吾閩遂家焉松雲布衣不仕最工詩兼精醫術其時知名之士如高澍然林

昌彝劉存仁相與倡和皆稱其詩豪邁不可遏抑有聽濤
書屋詩集六卷

文苑董平章

字琴虞由進士改甘肅知縣擢知州少穎悟絕人出語輒
驚長老作宦尤著政聲年甫四十陳情乞養卽不出著有
秦川焚餘草以久宦壘坂多筋吹之音讀者亦爲之慷慨
不已

經學林春溥 子懋勳等附

字鑑塘官編修假歸閉戶著書當軸延主鼇峰書院以經



史爲本一字之訛必辨士風不變重冥瓊林爲科目盛事
焉所著有古史紀年等共十餘種皆津逮後學世爭寶貴
子懋勳進士禮部郎懋烈舉人國子助教孫齊詔等亦多
舉於鄉者咸有文譽能世其家

文苑 高支離

布衣與俗殊趣文亦如之試官率不知句讀兼工詩酷肖
王無競曉風殘月躡屐屣吟矮巷中有獨得之趣

文苑 王景賢

字子希號希齋能文工書年二十四始籍學名噪一時屢

躡棘闈中年舉於鄉座主道州何子貞先生賞其書法六
上春官不遇及門皆一時俊彥咸豐紀元 詔舉孝廉方
正制府王靖毅公博采輿評以景賢首薦嘗爲閩撫李星
衢掌奏牘尤留意於地方利弊知無不言晚年好程朱之
學尤喜施濟里中善舉多所提倡卒年七十有六著有薑
齋隨筆長子崧辰字小希號蘭君三歲能辨之無及長負
文譽以庶常改官甘肅知縣以親老改浙江餘杭繪棒檄
圖以見志常書汪龍莊苦心未必天終負辣手須防人不
堪三語懸座右修南湖水利杭嘉湖三區並沾其澤邑經

兵燹多荒田有河南客民千餘負耜至民譁爲盜崧辰釋
其有妻孥田器者白中丞計口編籍旋以母憂去職遂不
復出天性孝友老而彌篤家居以著述自娛次子葆辰字
荔丹九歲能文爲林文忠公所賞左沈二公創設船政辟
爲幕僚得以悉心研究西洋機器著扶輪機宜以勞叙知
縣發江蘇復援例得道員調回充船政總監工甲申之役
襄辦團練 賞按察使銜粵督張公之洞創設廣東水師
學堂檄襄其事以積勞卒於工次

文苑 劉存仁

字炯甫晚號蘧園道光丙午優貢己酉舉人咸豐紀元舉
孝廉方正論者咸謂名實相稱父早卒奉母孝家徒壁立
尙有三弟一妹授徒不自給出掌書記以贍家三弟復早
世撫其孤數十年其爲諸生時出陳壽祺門下又嘗從高
澍然問學與之遊者有張際亮林昌彝葉修昌林壽圖輩
皆一時雋才嗣以謁選 京師先是壽圖早達噪 都下
與遊率知名士聞存仁至倒屣相迎題襟接襪文酒過從
猶及見乾嘉壇坫餘風焉出宰甘肅大府辟爲幕僚歷署
渭源永昌平羅諸邑補大通縣擢秦州牧壽陽祁文端公

薦天下循良三存仁與焉方其官遊隴首去家萬里消息不通兩子皆歿老妻稚孫時有飢寒之色存仁未之諗也回亂方殷秦州道梗有勸之退者乃乞病歸日以課孫爲事料理著述有岷雲樓詩文集篤舊集勸學芻言此外未刊甚夥寶應王文勤聘主延平道南書院講席卒年七十有六季弟溥仁亦以孝友稱

文苑 邱景湘

字敬韶號鏡泉籍長樂能文以庶吉士改官吏部郎中躡而復起出爲廣東惠潮嘉兵備道主鼇峰越山書院卜築

小荔灣一曲在城東北隅風趣佳絕

文 陳鳴秋 從弟師祁子篋等附

字韻菴祖鼎銘叔鑑華世以名孝廉名諸生領校職有聲於時鳴秋蚤孤喜出從鄉先生釣游吟嘯大有所得益自刻苦於學酒後洒翰畫竹石山水獨得天趣以副車疊膺鄉舉垂老迺官庶常改外知粵東廣甯縣績最未調卒宦橐蕭然詩畫端硯之外無長物鳴秋從弟師祁最穎異從鳴秋學畫甫冠詩畫精絕憶天中子篋字子武少有神童之稱雅擅文藻累試不得志於有司僅以優行貢於

廷幕遊歷數行省歸而卒幼子湯奏榜名義圖知名尤早
顧多愁善病仕亦不得志竟終於一第其詩詞頑艷畫亦
得其父神髓士林多深惜之

文 苑
陳 翼

字芭庭其先曰嘉言仕南宋上書忤賈似道歸隱侯官之
柯嶼閉戶不再出著書隱集後人有增康者爲築書隱堂
及叢桂堂族中多聞人至翼始占籍本境家世寒素幼穎
敏師異之日憐其困資使成學年十七遽於咸豐五年與
同邑梁吏部鳴謙長樂林學士天齡等同舉於鄉同治二

年偕侯官楊觀察仲愈晉江龔太史顯曾等並入詞館名籍甚典文衡無虛歲光緒初大考翰詹翼及同邑葉學士大焯同日遷贊善尋改司業視學秦中丁內艱歸主鳳池書院講席卒有春秋新義葩經集對及詩文等集若干種

製
造 陳兆翺

字鶴亭馬江船政學生出洋畢業累保至總兵工製造營創抽水機器爲西人所宗卽以陳兆翺名其器輪船車葉兆翺化平爲側外洋競效之蓋巧思遠駕白種人云

時程萬里 潘湖禮附

字樸菴隱於市精天文推步積四十年之力以講求之著有天學稗編時孝廉潘鴻禧擅詩畫亦著有算學啟蒙四種

文苑何履亨 林元廣附

字翊卿以進士官甘肅知縣有賢聲假歸不出少工詩而於制舉之文尤善居鄉授徒最衆門弟子著籍者數百人同邑進士林元廣官刑部歸隱不仕所授生徒亦多

文藝李遇春

字小溪少穎異勤學於書法尤工結交多知名士以優行
貢於廷歷官致諭晚始膺鄉薦嘗掌教仙遊金石書院
多士屬至世尤寶藏其書宦輟所至求者踵接焉

經學
謝章鉞

字枚如籍長樂少孤力學著述宏富詩詞多豪邁語壯達
四方所至大吏倒屣歷主關中書院白鹿洞講席中年後
尤肆力於經晚乃得進士對策切直不見用歸隱于山寮
賭碁山莊居之其掌教致用堂最久文益遠名公鉅卿詩
版多出其手吾閩經學家曰芝圃吳氏詩學家曰十硯黃

氏兩家後人皆能世其學嘉道後左海沔治訓詁林派
治掌故相持不下近與謝氏並世治古文詞者有歐齋林
氏治時務經濟者有雁汀王氏治辭章者尤多則有子安
魏氏子恂楊氏禮堂梁氏而希村林氏允卿李氏伯初陳
氏伯仲輒思所以繼之顧天或不假之年惟謝氏享大年
儲碩望自少至老文境數變卒乃集漢學宋學經史掌故
詩古文辭諸家而成爲舊學一巨子可不謂盛耶

文苑 何爾璜 周長庚李格等附

字玉璩工詞章兼善書法最篤友愛與兄爾康同籍學旋

同鄉薦矣而瓊以額溢爲副逾十餘年乃復舉於鄉一與
計偕不遇感時事作新樂府百餘什以寄諷卽不復出以
授徒自給門弟子著籍者數十百人嘗偕周星仲李次玉
等結支榭詩作變徵聲所著有文選類纂韓非子錄要南
椒集凡十餘種自號止泉道人年五十作止泉道人自壽
序而以詩緯之尤爲人所稱星仲名長庚籍侯官進士知
縣麟章之子早歲舉於鄉負氣節官彰化教諭時鹿港巖
務苛勒小民清賦擾尤甚且激變臺撫劉銘傳欲痛勅示
創星仲力爭幾爲所殺然臺中數十萬家悉以保全歸益

窮益致力於詩以自娛次玉名格

又名向榮亦名宗祿

家世殷富輸邊

饒得員外郎隆於交際自奉若寒素以其子蚤達遂絕意

進取有雙辛夷館合集

多與其兄廣信守聯吟之詩

後客死江南其友桐鄉

令方家樹哭之慟未幾亦卒官家澗字兩亭侯官人支廩

中詩豪之一也以朝考第一人選庶常散館改兵部故

請外云時同縣之名下士最著稱者曰何燿字子逸祖大

經荆宜道父同文知縣季父同律與兄先後舉於鄉燿早

孤有夙慧以選拔領鄉薦好諧謔人亦以此忌之官不達

僅就山左知縣未任卒子誥進士宰三河甫數月遽歿亦

未展其學又星村老人者爲聚紅詞社社長名應庚詩極
工有琴寄集哀感頑艷使人不忍卒讀兄金庚舉人官知
縣而星郵終其身無所遇晚省於目窮困至死別有侯官
大布衣周詠字永言一字夔歌太朴後人也祖梅初副舉
人能詩詠生而岐嶷不屑應舉詩境肖虞山樊榭而忠孝
本天性發之文章尤精輿圖天算之學能以寸幅測繪方
輿顧癖孤淪落落寡交遊復訥於詞罕知其爲人者當光
緒初與閩邑陳宗道

號雲窗從未赴試
有補眠庵詞刻

孫夢瀟

號湖隱後又改號
商於星坡

曰

閩海三布衣詠死後處幽居卑者更闕然無所聞

耆舊一

事功上

漢

賢 良 騶三郎 越弩將軍王長瑞

閩越王郢第三子常乘白馬稱白馬三郎

後王審知亦號白馬三郎

城東

鱣溪有巨鱣屢傷害人畜禾稼馳射中之鱣尾捲三郎人馬與俱沒患遂除民德而祀之改名善溪以志不忘時復

有王將軍戰功

楊暉反景帝徵閩越兵擊之長瑞殲暉於赤林嶺亂平

唐

名 侯 固 姪嶽

字子重登第後歷官節度使平章事操履仁厚談笑不苟
爲鄉人敬愛姪嶽字公祝進士亦有鄉望

循吏 林 昺 柯春卿

字公懋官吉州刺史於民無所取飲吉水而已其後同邑

柯春卿宰宜春

舊志多作淳熙間重纂省志列唐代

剖決精明擢倅大府亦以廉

能稱

忠義 張 謹 郭榮

字信美累官福建招討使黃巢寇閩謹迎戰多所衝陷後

又遇於鐵山殺傷甚衆賊絕謹餉道謹與裨將郭榮

字景華

及部校十八人突入陣斬百餘級自旦至暮十八人與榮

俱戰沒謹創甚箕踞罵賊與其妻子俱死

忠 唐書
義 有傳

黃

碣

唐書
有傳

初爲閩小將喜學問抗志希古以戰安南功刺漳州徙婺
州有治績董昌反諫不聽遇害贈司徒詳新唐書忠義傳

忠
李彥堅

字成實御史中丞黃巢入閩僖宗以堅知閩險要命守建
州至則刺史李乾祐已棄城走乃募民兵與戰於政和之

高宅東溲弗克死之

忠 義 李相

隨王緒入閩王潮殺緒索緒子建齊急相以少子與齊易名而呼索者至呼建齊相子應曰諾索者殺之相携齊居閩縣冒姓李兩家子姓多至大官

又王緒妹夫劉行全挈弟德全待全亦從緒車行全驍勇在光蔡時

屢摧黃巢秦宗權之兵緒忌行全久一日聽讒駢斬之緒以是敗閩人追念被巢功哀行全兄弟祠之螺江滸或曰劉行全子卽劉存五忠八賢皆存後故廟祀之

五季

忠 義 黃岳 妻林氏

籍長溪

今寧德地

來會垣家焉通經尤邃歷數唐末鄉貢入太

學王審知累辟力辭及受王封必欲起之投淵死妻林氏
慨然曰夫能爲忠臣妾獨不能爲義婦乎亦投淵以從

名 臣何瓚

唐進士後唐莊宗辟判軍事代張承業守太原轉諫議大
夫明宗使副孟知祥鎮蜀祥改任心腹趙季良以瓚爲行
軍司馬勉待甚厚後欲脇降之不從錮於私第瓚死兩川
遂失

忠 義 盧 光

爲南唐守尤溪李仁達遣將陳承弼襲光敗拒益力

戰久民
得避去

曰誓與此邑俱亡手斬數人死之四子從歿其家聞變棄
幼子草中鄰媪感而收育之訪其母送歸金陵李景郵授
總管

循吏張錫

初爲棣州判官時天平節度以牙將主支郡麴務駐棣者
尤橫民犯三斤卽死自盜官麥百斛造私麴錫判三斤不
克求生百斛更宜論死裁判如錫不負司法之權矣尋歷
數郡邑皆有政聲馮道召爲御史以清節聞

宋

循吏
連光裕

太宗朝知應山縣有功於民其卒也應山人思其惠政迎
柩葬之子正家焉

名
謝德權

宋史
有傳

字士衡匠心獨運最善於將作其先曰瞳者試不第事黃
巢將朱溫勸溫歸唐奉表於蜀唐僖宗大悅授率更令刺
陵州溫表爲亳州團練使充宣義副節度鎮滑十三年增
戶五萬益兵數千遷僕射卒於滑溫旣受唐禪追錄瞳功
加贈梁司徒德權仕宋蔭殿直屢典營繕以功擢內殿崇

班持論忠厚爲都巡檢時有誣執政與許州民構西夏者
自其誣管城蒲陰言事卒如所料築汴堤爲大錐試虛實
植樹數十萬規畫咸陽浮橋用鐵牛法餘詳本傳

名卓祐之

字長吉景祐初進士歷秀州判官爲人正直里居屢捍劇
寇自謂死猶當保桑梓及卒里人祀之閩山社

卓所居也

名孫奕

字景山皇祐初進士爲監察御史論新法不便爲鄧綰所
劾出監陳州酒稅陳襄在經筵言奕外樸中敏事行著於

鄉閭節義信於朋友歷官所至以善政聞宜使當一路以厚俗安民元祐初除福建轉運使以本境人官本路由其鄉望素孚故人無間言云

名許

將

宋史有傳
子份

字冲元官制誥契丹壓境使不敢往命將行語折之又與肆射破的進翰林學士知開封無犯法者爲兵部侍郎論事悉中機宜所全元祐正人甚多其諫開司馬光冢尤爲盛德餘詳本傳終門下侍郎謚文定子份字子大崇寧初進士授國史編修直學士徽宗嘆爲能世其家政和中簡功臣

子牧郡出知鄧州政尙寬平圉幾空改蔡州奉詔賑飢
置塲列室具器用鳴鼓給食率三日一往視飢飽而察羸
疾所活二萬餘人水漲沒城份登視祝曰郡守失政溺無
恨百姓何辜水頓退再改揚州值金警勤王解亳州圍撫
馭諸道援兵甚有法莫敢縱掠民獲安去之日涕泣遮留
者相屬於路

循
吏楊 肅

字持正以進士爲渭州推官權長汀縣稅賦不催而集盜
賊嘯聚捕治首惡境內肅清明年之渭州道由京師上書

論詔聖奸臣言最切直移知建陽終建寧節度推官

直 臣 辛 炳 宋史

有傳

字如晦

重纂通志
作侯官人

以進士官御史蔡京廢運司轉般倉爲直

達綱極疏其弊謫監新豐塲紹興初爲中丞罷福建八州
添差冗食官八十餘員論張浚悞國劾丞相呂頤浩倡和
不可從

名 臣 李 芑

字績仁靖康中叛卒殺福州帥柳述古芑方待次諭以禍
福而定之芑炎中卽提點福建刑獄寇攻豐樂門冒矢石

登陴諭之退范汝爲東下鄉民張毅乘亂襲古田單車入
招之使擒汝爲自效莖官本籍屢著戡定功則迴避桑梓
蓋猶一偏之說也

循
黃 瑀

字德藻官饒州司戶叅軍歲旱郡檄視屬縣民田當免租
者瑀請免什九他縣或不以實告守疑瑀俾更其狀瑀執
不可權華亭縣歲凶不待報發賑全活無算歷官御史提
刑轉運使改知漳州丐祠卒

直
黃 唐

字雍甫官考功郎韓侂胄爲其父請謚唐不肯覆議遂辭官

名許應龍

宋史有傳

字恭甫父仲容知漳浦縣應龍五歲能文由進士累官著作郎論李全有遺患不用出知潮州講求軍政賊不敢犯督齊敏等搗穴擒渠擢侍郎拜學士權兵部尙書簽書樞密院事時邊郡任文臣奏改用諳邊事者謂和守戰當因時制宜謚文簡

循吏李光裔

嘉定十二年知寧陽周知民隱舉荒政禁溺女輕女之習
一變焉

名趙紉夫 姪時儻

嘉定十三年宗子正奏甲科紹定四年以贛尉攝雩都令
時石城寇黃元仲猖狂乃預葺城濠爲守禦計賊至射退
之復追擒元仲繫於市明年還職父老磨石紀功時儻亦
知雩都平礫下賊曾四功與紉夫等

直潘 枋 宋史

有傳

字庭堅以字行端平二年廷對獨以濟邸爲言有曰宜厚

東海之恩裂淮南之士皆人所不敢言者論者以爲王十朋張九成一流人御史劾請置之法理宗不許屢諷諫皆凱切雖顛沛不忘納忠

遜 彭彥班 或作彥堅

字國器知循州省檄數糶請減五千石轉輸之費不及民蠲佃丁之困賦役者五十餘家士民祀之州學

名 朱挺

字烈仲端平中知循州先風教行鄉飲舉課試習俗不變復申明節制以御六成咸遵紀律屬有外寇遣兵捕斬幾

盡

循吏 吳秀發

字宗魯以進士判饒州務便民歲饑議賑有法全活甚衆尤留心獄訟出罪犯給以農工之具使治生蓋若今之習藝廠者

循吏 陳 琥

字少嚴知南豐曰民不得安者吏爲之蠹也取其巨猾斷手足以徇群吏股栗琥號恕齋或問其義曰吾恕於民吏弗恕也牧馬者去其害羣琥眞得治本矣

廉吏 王勳

字克壯以進士知樂昌決事若流公庭晏然秩滿去有問舟人何所載者曰吾止販一船徒耳

忠義 林琦

宋史附傳

德祐三年元兵迫臨安琦集數千人捍禦赭山以功補宣教郎文天祥開府南劍琦佐其幕後敗於五坡被執脫走惠州爲遊兵所獲護以北行乘間投河援出憤死詳宋史

忠義 鄒瀾附傳

按明末又有福清林琦事亦類此

忠義 朱牧

字子文舉進士主安溪簿調隆興府參軍宋亡死之鄉人
私諡文貞

元

忠義張良材

有武勇仕貴溪尉壬辰之亂集義旅保障一邑一夕賊忽
大至圍之數重材匹馬雙刀馳殺伏尸十餘里後以深入
遇伏馬躓戰死

忠義賴天賦

至正中爲興寧主簿賊據邑之龍母砦出戰被執不屈死

林海子枝

字必潮至正間仕興化路學正明興抗節不屈謫鳳翔後
釋歸卒賜謚文節子枝字昌達繼父志不應試工詩文有
效顰等集彼生長元朝而懷異志者其海父子之罪人乎
明

循吏趙景純

名明以字行洪武間官御史言事忤旨同列七人俱死太
祖奇其貌獨黜爲民更名李潛隱於閩清會赦薦爲閩清
訓導攝縣事成祖召知上饒乞養不允在饒正風俗均賦

役善政備舉廉介不避權要視民事如家事卒官貧無以殮邑人祀之

忠 義 林 眞 妻陳氏

字子純官濮州知州燕兵陷州城大罵不絕縛桅杆上叢射之死妻陳氏抱牒自焚以殉

循 吏 林 眞

字汝實舉於鄉荐爲庶吉士侍御筵出知慈谿江寧等縣上書言事成祖嘉納妖賊冀伯諒株連無辜辨釋八十餘人以勤勞卒於官

道 鄭 閻 見闕弟閣

字公望精三禮旁通醫歷二學以進士官刑部與尙書爭獄丐歸真無忝司法者也兄闕弟閣皆俊邁有德門三鳳之目

名黃澤 明史有傳 孫雍

家數仲以進士歷官河南參政南陽汜水饑民流散澤招集使復業嘗率丁役之京無失所者宣德初遷浙江布政使疏陳十事言遠奄宦尤切帝嘉之而不能用奏罷無徵米六十萬石及溫處二屬坑冶課九萬兩劾不職守令五

十七人謗議四起落職孫雍字伯敬孝友築室前嶼躬耕窮經歲入輒分貧者

直林

碩

明史有傳
鄭珞

字茂宏官御史疑獄必命往讞宣德初按浙就遷按察劾督漕中貴裴可烈烈誣其誹謗逮訊碩抗辨帝爲動容責烈終廣東布政同邑鄭珞字希玉以進士出守寧波片言決獄禁邏捕之擾盜賊屏息減染織弓_非等局汰歲辦費可烈以公事至郡貪暴不法珞上其罪詔置烈於法

府志以
鄭珞爲

侯官人故
以附此

珞子堂名諸生以善誼傳

直臣 陳 傅

字巖說宋參樞八世孫官刑部給事中鯁直敢言值邊警進安邊四策劾會昌伯孫忠應城伯孫傑貪淫福建叅議顏擇之科索御史丁俊阿縱都督王愉撓鹽禁皆逮問册封琉球餽遺不受勳戚周氏奪民田遣傅按之追田還民繩其諸不法者刑部尙書魏源阿周氏論傅凌蔑皇親下獄科臣交章言當抑貴戚容直臣以全國恩彰法紀竟謫戍大同旋賜環而傅已卒贈太常少卿

名 趙 榮

字孟仁先西域人以中書直文淵閣英宗北狩也先犯闕
名爲送駕索大臣出議榮請行至營辨論無少屈敵退眷
遇日隆英宗復辟擢尙書呼其官而不名曹欽反榮躍馬
市中呼集數百人誅欽於陣

直 孟 玘 明史
謝傳

字廷振官戶部主事扈從土木矢貫臂墮積屍中不死再
授禮部主事鄧茂七反用其議成擒郎中章論御史鍾同
力諫易儲向杖死綸死復蘇幽於獄玘繼言之自分茅蕉
而不及禍英宗居南內羣臣無朝謁玘因旱極言謫守萊

州改知廬州謝病歸明史附鍾同傳

循吏邵銅

字振聲景泰中官御史風裁峻整英宗復辟曹石擅威福與同列劾之帝怒下錦衣獄謫知壽光改博羅蒞政嚴明吏卒不敢爲奸嘗督造冊籍括爲易見圖至今博羅以爲式成化初擢守溫州

名林瀚明史有傳

字亨大父元美永樂進士終撫州守多循績瀚成化進士入翰林薦升祭酒餐錢歲百緡悉貯以營學舍歷南京吏

部尙書屢陳時事與林俊章懋張敷華號留京四君子諡
文安孝友質直不畏強禦立朝建白悉本至誠子九人俱
貴庭榻庭機最顯孫炫爍煙能世其家三代膺八座者五
皆爲時名臣

衛 王 俊

字世英以進士官袁州府持大體吏民始憚其嚴久而懷
之修學宮復水利尤著稱於民擢廣東叅政撫化儻犛粵
人甚德之

衛 黃 窩

字世用進士歷知武寧當塗等縣有惠政人號冰鏡轉工部主事督運河築城垣咸底績旋改戶部以不合於時歸

循吏 林鐸

字克振成化間知崖州平苗亂尤注意教養卒官崖人祀之名林公祠

循吏 鄭琳孫述

字文玉成化鄉薦知象山剛介莫能干以私太宰屠某目曰此硬頭官也時呼鄭硬頭孫述字世美以進士歷江西僉事廣東參議不能俯仰綽有祖風嚴嵩奪民漑田湖塘

民訴迷命各荷鋤以從群共開掘頃刻還民未幾嵩敗遂
得無恙

直臣陳紀

字叔振成化進士按察陝西清滯獄八百餘人宏治中巡
撫宣府黜叅將之贖貨者威振邊境天性孝友不阿中貴
時李廣擅威福紀獨不顧廣敗時論益重之

名臣林泮 兄清源弟溶淵

字用養父鈍以舉人歷官教授典湖廣鄉闈正行賄求售
者罪諸生懷之泮遊太學時有誣奏祭酒陳鑑者伏闕直

之以進士歷南京大理評事寺正讞獄多平反遷知廣州
藍冀諸山峒蠻叛服不常泮攻之擒其魁又豐湖堡賊劉
庚作亂單車造壘諭降之擢戶部侍郎總儲務權倖歛手
正德二年拜南京戶部尚書忤劉瑾致仕罰米二百石助
饜歸假僧舍以居布衣蔬食談經不輟兄清源字用清進
士官戶部主事弟濬淵與泮同舉進士官浙江按察司僉
事皆有父風

循鄭蘊中

字德輝以舉人司教石首多所造就擢貴池令堅持司法

之權與上司議獄不合拂衣歸織蓆爲食有門士以御史按閩屢候弗見一指揮欲得善地持厚賄丐關說巡按蘊中曰此言胡爲及我哉強之怒呼里人欲執詣官乃跪吐實曰御史念公貧藉此爲餽耳終不納

循吏王鼎子鍵

字器之進士知上饒改樂陵擢御史大理丞覈勳臣莊田稱旨官至總憲在樂歲饑賑卹有方流民歸者四百餘戶邑人立祠祀之子鍵字公度以舉人授常山令著清德卒官常山人祀之

新
吏 稍德剛

字崇節以進士令德興桃源寇至邑無城伐木作柵與賊角憲使將以錢啗賊曰民困安可重斂往諭賊被執以計脫且誘賊黨數十人戮之賊引去歲大饑力請蠲賦八千石給賑民獲再生爲立碑頌德官終武昌府通判

直
臣 張孟中

字道宗父澤以進士官大理多平反孟中正德進士官戶部主事劉瑾江彬日導武宗居豹房設酒店爲樂乾清宮災求言應詔請開言路親朝政罷豹房凡八事甚切轉兵

部職方員外復上言請崇聖學建儲位六事帝怒廷杖之
創甚越數月卒於寓邸歸葬茶園山萬歷十七年建祠東
郊中山之麓

循吏鄭潭

字世績孝義伯和子也以進士守肇慶督學蕭鳴鳳恃勢
潭與爭朝議直潭潭自劾歸起知登州書真西山十事四
害於屏以自警擢兩淮鹽運使創築通湖墩李默典選薦
刑部侍郎默得罪言者及潭遂乞歸性狷介不屈同年夏
言爲相激潭竟不見嚴嵩父子重餽賂潭以左轄入覲獨

携青布爲贄卒日僅遺書數十卷而已

直 劉世揚

明史
有傳

字實夫進士官給事中典試山右稱得人嘉靖初諫加興王大號內侍有崔文者始興齋醮率抗疏彈劾又言營事官非其人忤旨切責予杖下詔獄鞠之猶執前議俄得釋復陳修省八事大臣惡之激帝怒再杖謫江西布政司照磨少卿陳察請召用亦坐謫長楊內行修自期大雖黜沛直氣不衰久之稍遷通判旋督河南學未上卒

直 謝賈 載元

字維盛檢討睿之子以進士官禮科給事中嘉靖初疏諫乳媪劉氏及宮人孫氏濫封因勸世宗節恩澤戢內侍又論救翰林呂柟悉見嘉納會冊中宮有闈寺女姪入選賚按籍劾罷之南宮災疏請修德又陳科舉之弊乞革宿弊而求實學諸建白皆關國體大禮議起語都給諫張紳曰吾禮臣當以死諫力排桂之議一日旨取議臣疏賚當直以朝議進再索復進帝怒曰直科者誰左右以賚對己而賚復與同邑戶部主事戴元等聯諸給諫遮百官伏闕泣陳詔杖闕下賚元幾斃尋轉右給事中閩海潮汐舊紆

迴爲三十六灣折入河口海寇不得揚帆內窺宏治間鎮
守鄧監或蕃舶厚利鑿新港徑趨大江至是贊陳新港六
害乞塞之以弭海盜有詔填塞命替覈楚粵邊儲自湖南
上言權姦煽禍後天下官吏習於用刑不重民命今當痛
行禁革譬擬切直帝爲通飭各省觸時忌知太平府道
卒隆慶改元錄議禮諸臣贈太常少卿亢字思賢後官貴
州僉事平土官王阿響之亂

直林庭學

字利節文安從子成進士官兵科給事中彈劾不避被命

勘遼事言開原等衛三面臨邊宜設備遷戶科都給事疏
奏嚴嵩諸不法狀世宗震怒逮繫詔獄廷杖六十謫湖廣
幕職遷雷州守未任卒

名 陳 柯
將

字君則以戶部郎出守杭州浙督胡宗憲方計欵汪直以
間徐海陳東使內潰而議勦者多梗之柯獨與宗憲畫策
海東果相屠直亦伏誅擢南贛兵備道殲大嶺山賊林朝
曦等屢建奇勳時稱戰功第一

名 鄭雲鑒
臣

字邦用以戶部主事權鬪獨著廉潔出提浙學持正絕諂託調湖廣參政楚世子幼武岡王構飛語將爲不利按治之世子得襲擢藩河南河決淮邳當事者承張居正風旨議濬五百里以通漕乃躬詢利害上河議數千言事遂寢居正奪情暫歸治喪諸司奔走迎送數千里相屬繼無加禮坐是調廣西念母老乞休侍養特起四川左轄瑩曰豈有九十親年而狗祿萬里乎不赴尋卒

直林 材 子宏衍孫之蕃

字謹任孝友堪子進士官給事中率六垣疏請皇子出闕

以定國本又力詆平壤無功石星誤國初大司馬鄭洛等語連三輔臣及劉元震等累疏指切時政有旨責材誣謗大臣降調光宗時起尙寶永歷官南京通政子宏衍溫台兵備道有政聲孫之蕃崇禎癸未進士爲唐王郎中明亡疽發背卒

忠義傳
蘇夢暘

明史在

初司南都獄聞有浦江人孫一謙者善其職乃踵其所爲戢獄卒不使苦諸囚又懸一鉦令日夜有虐者鳴以聞獄中肅然其他恤囚法悉備轉粵東吏目司寇丁賓憐其貧

資遣之郎中沈玠指獄曰此生地獄也蘇司獄去吾不敢繫人矣後擢祿豐令萬歷三十五年武定鳳騰雪作亂圍雲南府城轉寇祿豐夢陽力戰却之次年賊出不意突陷縣城執之不屈死

名董應舉 明史有傳

字宗相進士歷吏部四司所舉高攀龍鄭三俊劉宗周等皆召用遷太常少卿疏請安插流民開墾屯田擢右副都御史興天津屯利募人開河治閘以便海運請葛沽屯兵以所入抵餉無轉輸扣糴之費兼工部侍郎督理錢法

政條陳半爲崔魏所格目爲黨人奪職歸築附海城堡疏
水利修學校置社倉義田議官糴嚴海禁認漢課皆造福
桑梓暇與諸生講學老而不倦著有崇禎初集十七卷卒
年八十三族子伯起有義俠聲以倭變與弟貞起力戰死
之

直臣陳國是

字定遠以舉人官教諭轉監丞以監生越次事力與祭酒
爭迺止出爲蘇州同知魏璫擅柄遂掛冠編內監輯畧一
書條列春秋迄明宦者以垂戒時媚壻者風各省立生祠

鄉縉紳集議不決獨以從容二字諷止之故天下皆有魏
嗣而固獨無蓋其一言之力云

忠義
鄭逢蘭

字楚澤以舉人官國子助教歷兵部車駕司員外李自成
圍京師蘭分守西直門相持不下賊從他門入被執不屈
賊偉其貌欲降之蘭自嚙舌血噴賊大罵不已以頭觸牆
而死

忠義
胡上琛 明史附傳
委劉特娘

字席公年十六襲指揮嘗過易水賦詩有一死誠知已文

夫非所難旬崇禎初登武科任福州右衛十六年詔天下
勸王琛勒兵北上會解嚴迺歸未幾南北都相繼失唐藩
授琛總兵拜鎮國大將軍隨御營至延平命先赴嶺召援
兵中道聞汀州之變遂微服潛還福州偕中書張汾諸生
齊巽等乘間起事又敗知不可爲諭妻子奉母之長樂獨
與妾劉慧孃朝服再拜並端坐仰藥卒各有絕命詞琛詩云
孝既存
宗忠惟盡職欲求死所於斯爲得其妾云嚴純
朝大士大士亦低眉守忠君得死殉節妾安辭時年三十七妾甫二十母
聞之自長樂回憑棺一哭曰兒無所憾矣遂不復哭附見明
史鄭爲
虹傳 琛工文翰有武經輯要飛玉齊詩集子牧孟 國初義

士也亦有傳

在德行錄
事計本傳

忠
義林

鋌 陳聖佐

字質賢邑諸生負氣節多才畧與楊廷麟萬元吉等死於
贛州時復有諸生陳聖佐以學行受知於黃公道周營佐
黃出師黃既死節陳棄家入壽山終身不出

9919189

